

ANALYSIS LOGICA IN EPI- STOLAM AD HEBRÆOS.

AVTHORE D. ROBERTO ROL-
loco Scoto, Ministro Iesu Christi, & Re-
ctore Academia Edimburgensis.

Accessit brevis & utilis tractatus de
Iustificatione eodem Authore.



GENEVÆ
Apud Iacobum Stœr,

M. DCX.

AWAY

TO THE

WIND

AND

THE

WIND

AND

THE

WIND



THE

WIND



EXIMIO VIRO
ET AMICO SVO SVM-
ME DILIGENDO ET OBSER-
uando GVLIELMO SCOTO Ab
Elie, HENRICVS CHARTERIS
S. & G. per Christum.



VANTI intersit iuuentu-
tem cum humanioribus
studiis, & politiori litera-
tura, vna etiam imbibere
eminentiam illam cogni-
tionis Christi, tu optimè nosti, Vir exi-
mie, qui sæpiusculè solitus es prædicare
sordete omnia ista humana, humanam
prudentiam, industriam, eruditionem,
artes etiam ipsas & scientias, imò noxia
esse & exitiosa, si à cognitione Christi
separentur. Quo mihi videntur fœlicio-
res, & non Deo tantùm, sed & Præce-
ptoribus magis obligati, qui ab ijs
cum Apostolo loquar, didicerunt
2

EPISTOLA

stum. Professus est iam olim Alexander magnus se Aristoteli, à quo puer formatus est, nō minus quàm patri Philippo debere, cū ab hoc quidem viuendi, ab illo verò rectè viuendi accepisset initium. Tantam ille gratiam retulit præceptori suo, qui communibus naturæ nostræ tenebris inuolutus veram rectè viuendi rationem, nec ipse tenuit, nec alios docere potuit. Quanto maior referenda est gratia ijs Præceptoribus, qui ad genuinum rectè viuēdi fontem Adolēscētes reuocant, & ex verbo Dei informāt in vera pietate & fide in Christum. Quo spectasse omnes beatæ memoriæ D. Rolloci labores ignorat nemo cui ipse notus fuit. Atque in hunc finem præter alios Scripturæ libros quos subinde discipulis suis prælegit, Epistolas Pauli ad Rom. & ad Galatas, in quibus plenius & clariùs quàm in alia quauis totius Scripturæ parte mysterium Christi reuelatur, accuratissimè explicatis postremò adiecit Epistolam ad Hebræos, quæ eò tota tendit vt nos ad per-

perseuerantiam & constātem professio-
nem fidei in Christū adhortetur) eamq;
hac, quæ nunc in lucem prodit. Analyſi
Logica illustrauit, qua mihi quidem vi-
detur ita ad viuum Scriptoris mentem
vbiq; expressisse, vt & à rudioribus par-
uo negotio intelligi possit, & peritiori-
bus fontes aperiat, ex quibus vberes cœ-
lestis doctrinæ riuos commodè possint
diducere. Non sum nescius esse nonnul-
los qui hanc Scripturæ interpretādæ ra-
tionem improbent, quòd Spiritum san-
ctum in Scripturis loquentem ad artis
Logicæ præceptiones alligare videatur.
Atqui nos nullas sacrosanctæ Scripturæ
ab arte vel scientia quacunque humana
leges imponi, aut debere, aut posse arbi-
tramur, sed Logicam duntaxat hac in-
terpretandi ratione Scripturæ ancillam
pedisequāque esse ostendimus. Cùm
enim Theologiam omnium disciplina-
rum Dominam & moderatricem esse
omnes iure agnoscamus, Logicæ famu-
litium cur ei denegemus? quamq; ea o-
pem ad profana hominum scripta intel-

ligenda confert, cur non eandē ad Pro-
 phetarum & Apostolorum scripta *ἑρ-
 μεύσει* ministraret? Hāc certē Analysin
 Logicam in nonnullis Pauli Epistolis
 iam antè à Rolloco foeliciter tentatam
 plus lucis attullisse quàm plerorumque
 prolixas cōmentationes, facillè iudicare
 possunt omnes, qui eam penitiùs intro-
 spexerunt & examinerunt : ex quibus
 multi sapius professi sunt se non medio-
 crem fructum ex hoc scriptionis ge-
 nere percepisse, eoque hortatores Rol-
 loco fuerunt ut ad reliquas, quas adhuc
 nōdum attigisset, Epistolas simili Ana-
 lysi illustrandas manū admoueret: quod
 ab eo proculdubio præstitum fuisset si
 Deus longioris ei vitæ vsuram concef-
 sisset. Ex horum numero facillè primum
 fuissete, Vir eximie, nōrunt omnes qui-
 bus notum est quā arcto amicitiae vin-
 culo D. Rolloco coniunctus fueris, quā-
 tāque eum semper prosequutus sis be-
 neuolētia. Quo solo nomine, si alia nul-
 la subesset occasio, deberi tibi hoc opus-
 culum nemo ibit inficias, sed alia longè
 maior

DEDICATORIA.

maior & grauior accedit causa, Authoris ipsius suprema volūtas Testamēto cōsignata, qua quicquid supererat operum ipsius sub tuo nomine exire voluit, & solennia hæc dedicationis verba præ se ferre, **GVLIELMO SCOTO IN PERPETVVM TESTIMONIVM AMICITIÆ NOSTRÆ DEDICO CONSECRQVE.** Accipe igitur hoc grati animi testimonium quaecunq; *Analyfin* Logicam in Epistolam ad Hebræos, simulq; breuē tractatum de Iustificatione, quē ideò placuit cum hac *Analysi* cōiungere, quòd & propter breuitatē seorsim excudi non poterat, & ad quæstionem de Iustificatione hominis coram Deo determinandā doctrina de Christi sacerdotio, quæ in hac ad Hebræos Epistola accuratissimè tractatur, singularē vsum habeat, cū illa ipsa oblatio & sacrificiū quod Sacerdos Christus Patri ad expiāda peccata nostra in cruce obtulit, sit, vnica illa iustitia quā nobis Deus imputat, & propter quam nos è tribunali suo iustos esse pronunciat. Hanc autem *Analyfin*

cùm D. Rollocus, immatura morte pre-
 reptus, absoluerè non possèt, ne manca
 in lucem ederetur, eoque Ecclesiæ vsui
 (cui secūdum Dei gloriam omnes suos
 labores vnicè semper cōsecrauerat) mi-
 nus inferuìret, hanc mihi prouinciã de-
 legauit vt ei supremam manum impo-
 nerem. Quod onus, etsi (tenuitatis meæ
 mihi probè conscius) agnoscebam hu-
 meris meis impar esse, malui tamẽ in me
 suscipere, quã in animi ingrati suspitio-
 nem apud eum incurrere, cui me omniũ
 officiorum ratione obstrictum sentie-
 bam. Dedi igitur operã vt in tribus po-
 stremis capitibus (exceptis sex primis
 versibus capitis vndecimi) ad eam quæ
 Rolloco familiaris fuit, *Analysews* for-
 mam quàm fieri potuit proximè acce-
 derem. Quod si hic meus labor rerum
 diuinarum studiosis aliquam afferet vti-
 litatem, & tuo iudicio probabitur, satis
 amplum operę pretium meretuisse pu-
 tabo. Vale in Domino. Idibus Aprilis
 1605.

IN

IN ROB. ROLLOCI COMMEN-
taria Hen. Charterij recensione aucta.

VEndibili (Vetus est Verbum) suspendere Vino,
Non opus est hederã: proba merx præcone re-
Emptorẽ inueniet: quæ cedro digna loquutus (mota
Entheus assiduo verbilimatus in Vsu

Rollocus, Charitum flos, nostræ & gloria gentis,
Victuris vel quæ illeuit monumenta libellis
(Perpetuum quibus est mihi fas sperare virorem)
Arte sua auctorem insignem satis edita laudant,
Sint licet indieta, ingenio aut detrita minore.

Namque parem meritis tribuat si Gratia honorẽ,
Si studium, aut Virtus, dignâ mercede beari
Promereant, aurata foro tibi staret imago,
Et caput auricomum, (fors quæ tibi debita) Laurus
Cingeret, ornâris qui publica commoda Vixus
Ante alios, quantum stellas fulgore minores
Cynthia præradiat, (rumpantur Vt ilia Codiis)
Quâ scriptis, quâ voce, Deum quoque redditus albo
Surpuit Vt mors seua orbi, cæloque locauit,
Alternis patriæ faculam transmittis alumnis,
Postuma in exhausta mansura & pignera mentis.

Quæ licet imperfecta tibi sunt morte reuulsa
Supremam nec passa manum, laudatur in illâ
Dimidiam tabulâ Venerem quâ pinxit Apelles
Extra omnes: & habent si quid præsagia Veri,
Vt quondã Hippolytum superas reuocauit ad auras
Discriptum, incolumemque suis Epidaurius Heros
Restituit, mancis Charteri ita dextera chartis
Paonias porrexit opes, vacuâsque lacunas,
Ne qua lacuna foret cerâ compluit eâdem.

*Sic memor officij veteris, veterisque magistri.
Lampada qui extremâ moriens sibi tradidit horâ
Esset Apollinei deinde ut Pars maxima cætus,
Magnâ opere in tâto & partem memoratus haberet.
Nec dubium parili fuerint si analecta labore
Quæ iam sparsa situ sordent cariæque sepulta
Fælici purgata manu, quin viuet vterque
Æternum, ut meritis, chartis immortalis, æuum.*

GVLIELMO SCOTO ROLLO-

ceorum scriptorum assertori.

T Vis auspiciis, Amice magne,
Qui mancus, mutilus, lacer, iacebat,
Orbatus citiùs suo parente
Quàm lucem aspiceret liber miscellus,
Nunc fartus, nitidus, venuſtulusque,
Succo & Nectare, per Librariorum
Proſtat ſcrinia, tectus, integellus:
Sic ut nec ſycophantias malorum
Omneis vnus æſtimet vel aſſis.
Abſque te foret hic liber diſertus
(Certum *μνημόσυνον* tui ſodalis,
Qui ſolatiolum fuit Sophorum,
Non horum modò, ſed quot aut fuerunt,
Aut poſthac aliis erunt in annis)
Depaſtus tineaſ malas tenebras
Indignè incoleret tenebricoſus.
Perge vindicias tui clientis
Sic poſtliminio parare Chartis,
Famæ ut vindicias tibi clienti
Laus poſtliminio parare pergat.

Io. Rayus.



ARGUMENTVM EPI-
STOLÆ AD HEBRÆOS.

IN hac epistola ad Hebræos, Author, quis-
quis ille fuerit, Hebræos hortatur ut eā
doctrinam quam audiuerant constanter
retineāt. Epistola igitur exhortatoria est:
Exhortationis propositio est, Retinete eam
doctrinam quā accepistis, vel tenete pro-
fessionem vestram. Eius multa afferuntur
argumenta ad caput ultimum. Primum
argumentum partim est à persona mini-
stri, partim ab ipsa docēdi ratione ac mo-
do, sed præcipuè à persona ministri, Filij
Dei per quē, non πολυτεχνῶς, sed una ea-
demq; forma tradidit nobis ultimis hisce
diebus salutis doctrinā. Hoc argumentum
proponitur primis statim Epistola huius
verbis, & concluditur initio capitis secun-
di. Ad huius argumenti amplificationem
digreditur in magnificam descriptionem
Filij Dei, qua quidem vult à nobis cōspici
quanta sit illius personæ dignitas, à vers.
2. ad finem capitis primi. Secundum argu-

mentū est à certo Dei iudicio, quod sequetur neglectum professionis nostræ, vel doctrinæ tã saluificæ, à vers. 2. capitis secundi, ad posteriorem partē versus octauī: ubi varia digressio est & multiplex occupatio, partim de Christi gloria, partim de ipsius passione ad finē capitis. Tertium argumentum coniunctū est & compositum, partim ex Prophetia siue Apostolatu, partim ex sacerdotio Christi. Hoc argumentum explicatur ab initio capitis tertij ad alteram partem versus sexti, & repetitur vers. 14. & 15. cap. quarti. Quartum argumentū est à beata nostra conditione, quod si teneamus professionē domus Christi sumus, ab altera parte vers. 6. ad vers. 17. capitis tertij. Quintum argumentum est à priuatione cœlestis illius requietis, de qua loquitur David Psal. 95. Ad hoc argumentum transit in fine capitis tertij: habetur autem argumentum ipsum capite quarto ad alteram partē versus tertij. Quo loco egreditur ad ostendendū requiē illam, de qua loquitur David, diuersum esse, & à requie Sabbathi, & ab illa requie quā populus

lus obtinuit per Iosua, cum collocaretur in terra Canaan, ad vers. II. Vbi est exhortationis conclusio cum argumento quinto repetito & confirmato, ad vers. 14. Sextum argumentum est à Dei gratia & misericordia, versu ultimo capitis quarti. Capite quinto digreditur in confirmationem Pontificatus Christi in genere ad versum undecimum, quo loco proponit de Melchisedeco dicendum, idque in eum finem ut demonstret Christum esse Pontificem secundum ordinem Melchisedec, hoc est, certum quendam ordinem Pontificatus Christi. Verum à proposita hac de Melchisedeco doctrina digreditur, primum in reprehensionem segnitiei & ruditatis Hebraeorum ad quos scribit, à versu 12. ad finem capitis, deinde in exhortationem, qua hortatur ut ferantur ad perfectionem, adiecta graui denuntiatione in Apostatas, à vers. 1. cap. sexti ad vers. 9. ubi correctio est & mitigatio illius denuntiationis ad vers. 11. quo loco specialis quadam exhortatio est ad perseuerandum in charitate & bonis operibus, ad alteram partem vers. 12. Atque hic redit ad exhor-

tationē principalem, cuiusq; argumentum
affert septimū ab exemplo veterū & pio-
rum Patrū, qui per fidem ac patiētā obti-
nent promissam hereditatem, ad postero-
rem partem vers. 18. In altera parte vers.
18. est argumentū exhortationis octauum,
quod cursum eo corripuerimus vt spē pro-
positam obtineamus. Capite septimo perse-
quitur doctrinam de Melchisedeco propo-
sitam vers. 11. capitis quinti, & primū
quidem Melchisedeci, vt erat typus Chri-
sti, descriptio est, cuius occasione de excel-
lētia eius agit ad vers. 11. Vbi digressio-
ne facta probat mutatum esse sacerdotiū
legale pariter & ministerium legale, ad
versum 20. Ab eo loco agitur de ipso Chri-
sto, cuius typus erat Melchisedec, cuiusque
præstantia & excellētia multis argumen-
tis ostenditur, ad finem capitis noni. Capi-
te autem decimo persequitur fusiū quod
cœperat ostendere versu 25. capitis 9. de-
monstrans Christum non sæpius offerendū,
sed unicam eius oblationem sufficere ad
vers. 19. Quo loco reuertitur ad exhorta-
tionem principalem (à qua digressus fue-
rat

rat ab initio capitis septimi) eiusq^{ue} argu-
menta affert duo, nonum & decimum. No-
num est à libertate ingrediendi sacrariū
cæleste: Decimum est à Præfecto domus Dei
sive sacrarij in quod ingrediendū est. Hæc
duo argumenta coniunguntur, à vers. 19.
ad vers. 26. Undecimum argumētum est à
pæna apostasie & defectionis à fide, à ver-
su 26. ad versum 32. Duodecimū argumen-
tum est à mercede fidei: Decimum tertium
à vita aterna quam consequuntur perse-
uerantes in fide. Duo hæc argumenta ha-
bentur sub finē capitis decimi. Capite vn-
decimo toto digressio est in commendatio-
nem fidei. Capite duodecimo redit ad in-
stitutam exhortationem, cuius argumen-
tum decimum quartum est vers. 1. à testi-
bus, sive exemplis credentium qui perseue-
rârunt in fide. Decimum quintum est vers.
2. ab exemplo ipsius Christi: unde sumpta
occasione exhortationem generalem, ad
retinendam professionem, & constanter
propositum nobis stadium decurrendum,
præscriptis quasi specialibus quibusdam
currendi legibus, illustrat, & ad patien-

tiam in afflictionibus, ad praeundum alijs
bono exemplo, ad pacem, ad sanctimoniã,
&c. tanquam speciales currendi modos
adhortatur, à versu 3. ad versum 25. ubi
est argumentum exhortationis decimum-
sextum, à iudicio quod sequetur eos qui
Christum loquentem auersantur, ad ver-
sum 28. Quo versu decimumseptimum est
argumentum, à participatione regni illius
quod concuti non potest. Versu ultimo est
argumētum exhortationis decimumocta-
uum, à natura Dei nostri qui ignis est con-
sumens eoꝝ, consumpturus omnes qui non
perseuerantes in fide ipsi non seruiunt iu-
xta ipsius placitum. Post exhortationem
principalem capite ultimo doctrina est
paranetica, qua hortatur ad officia quæ
ad secundam præcipuè legis tabulam per-
tinent, ad versum 18. Vbi postquam He-
braeis ad quos scribit preces pro se commen-
dasset, Epistolam hanc precibus primùm,
deinde hortatione, postremò alijs aliquot
varijs argumenti sermonibus concludit.



ANALYSIS LOGICA IN EPISTOLAM

Ad Hebræos.

Argumentum Capitis Primi.

Huius Capitis duæ sunt partes : Prima est propositio primi argumenti exhortationis hac epistola institutæ, ut doctrinam quam acceperunt retineant vers. 1. Secunda est digressio in amplificationem propositi argumenti. Amplificatio est per descriptionem Filij Dei magnificam, à versu 2. ad finem.

CAP. I.

I *Deus multis vicibus multisque modis olim loquutus Patribus per prophetas, Vltimis diebus hisce loquutus est nobis per Filium.*

DEVS multis vicibus) Argumentum exhortationis primum vers. 1. proponitur, tum reliquo capite illustratur & amplificatur : Propositio argumenti est. Deus vltimis diebus hisce locutus est nobis per filium suum. Propositio argumenti non est simplex, sed tractata est per comparisonem, vel dissimilem, vel minorem, doctrinæ traditæ Patribus. Comparatio igitur est,

Deus olim locutus est Patribus per Prophetas, vltimis diebus locutus est nobis per Filiū, Dissimilitudo (vt sic dicam) locutionis Dei maximè hīc consideranda est in Ministris: olim locutus est Patribus, per Prophetas tanquā ministros, vltimishisce diebus locutus est nobis, per Filium tanquā ministrū. In personis igitur ministris sermonis Dei, maximè posita est dissimilitudo, vel (si lubet) imparitas. Verū ad dissimilitudinē in personis addita est secūdo loco dissimilitudo in forma loquendi, ac docendi. Deus locutus est Patribus *πολυμέρως, & πολυτρόπως*. Quibus verbis mihi videtur innui varietas Politie Ecclesiasticæ ac Diuinæ, quæ inde ab initio fuit, ætatibus Patrū, ad Christi vsque aduentū. Nā vt taceā species illas Politie diuinæ varias, politiam familiæ Patrum, deinde Politia Ecclesiæ, quæ cœpit esse quum populus in Ægypto collocatus est, profectò in politia primū familiæ, varia fuit *οικονομία* & dispensatio eorum quæ ad cultum Dei pertinent, & singulis ætatibus Patrum, aliquid in *οικονομία* vel mutatum est, vel auctum. Rursus si ad politiam Ecclesiasticam descendamus, in ea quoque progressu temporis varia fuit *οικονομία*. Si lubet has voces in distincto sensu accipere, prima vox significabit multitudinem, & varietatem partium doctrinæ Patribus traditæ. Neque enim omnes doctrinæ de Deo partes, simul ac semel traditæ sunt, vna aliqua ætate: verū diuersis ætati;

ætatibus Patrum, diuersæ partes doctrinæ sunt traditæ, & successu temporis doctrina de Deo augmentum cepit: Verbi gratia, Tempore Noachi cœpit auctior esse, quàm fuit tempore Henochi: Deinde ætate Abrahami cœpit auctior esse quàm fuit ætate Noachi: tum sub Isaaco cœpit auctior esse, quàm sub Abrahamo, &c. Vox autem altera πολυτροπῶς ad doctrinæ propositæ formam pertinebit: Nam eadem doctrina, alia atque alia ætate, forma alia atque alia proposita est. In ἀποδοσι nihil expressè habetur, quod respondeat his vocibus, quas habemus expressè in προτασι dissimilitudinis: Contrarium autem facilè intelligi potest ex contrario, nempe quod Deus salutis doctrinam, non πολυμέρως, sed simul ac semel totam, non πολυτρόπως, sed vna eademque constanti forma, tradiderit nobis vltimis hisce diebus, per Filium suum. Atque hætenus sic explicata est propositio argumenti primi comparata: Est autem argumentum partim quidem à persona ministri, partim verò ab ipsa docēdi ratione ac modo, sed præcipuè à persona Ministri.

2 *Quem constituit heredem omnium: per quem etiam vñdum condidit.*

3 *Qui quum sit splendor gloria, & character persona illius, sustineatque omnia verbo illo suo potente purgatione peccatorum nostrorum per seipsum facta, sedit ad dextram maiestatis illius ex-
celsissima.*

4 Tantò pręstantior factus Angelis, quanto excellentius prę illis sortitus est nomen.

5 Nam cui dixit Vnquam Angelorum, Filius meus es tu, ego hodie genui te? Ac rursum. Ego ero ei Pater, & ipse erit mihi Filius.

6 Rursum autem quum inducit primogenitum in orbem terrarum, dicit, Et adorent eum omnes Angeli Dei.

7 Et de Angelis quidem dicit, qui Angelos suos facit ventos, & Ministros suos, ignis flammam:

8 Ad filium autem, Thronus tuus, Deus in seculum seculi: Virga recta, Virga regni tui.

9 Dilexisti iustitiam & odisti iniquitatem: propterea Vnxit te Deus, Deus tuus, oleo exultationis Vltra consortes tuos.

10 Et, Tu in initio Domine terram fundasti & opera manuum tuarum sunt cęli.

11 Ipsi peribunt, tu autem permanes: & omnes Vt Vestimentum Veterascent:

12 Ac Velut amictum circumuolues eos, & mutabuntur: tu autem idem es, & anni tui non deficient.

13 Ad quem autem Angelorum dixit Vnquę Sede ad dexterā meam, Vsq̃ue dum posuero inimicos tuos scabellum pedum tuorum.

14 Nonne omnes sunt ministratores spiritus, qui ministerij causa mittuntur propter eos qui heredes erunt salutis?

Quem constituit) Ad amplificationem propositi argumenti primi, egreditur in magnificam def.

descriptionem personæ ministræ, Filij Dei, ex qua quidem descriptione vult à nobis conspici quanta sit eius, personæ dignitas: Describitur autem persona ministra, Dei Filius, ex argumētis, partim simplicibus, partim comparatis. Primum argumentum est ab hæreditate ipsius amplissima à Patre ipsi data, vt qui sit Filius Patris vnigenitus: Nam si Filius est, hæres est necessariò. *Per quem*) Secundum argumentum descriptionis est à mundi creatione, quæ fuerat per Filium.

3 *Qui quum sit*) Tertium est argumentum descriptionis, à gloriosa sessione ipsius ad dexteram Patris sui: huic sessioni fundamenta subternūtur tria, primum est similitudo Filij cum Patre suo: Similitudo posita est in duobus, primum in eo quod sit splendor gloriæ paternæ, hoc est, gloriæ ipsius essentiæ: hæc similitudo, vel potius (vt sic dicam) identitas, est in substantia vna eadēque. Deindè similitudo in eo posita est, quod sit character personæ illius: hæc similitudo est personæ, qua Filius non tantum idem est cum Patre, quoad naturam & essentiam vnā eandēque, sed etiam quoad Personam filij Patri similis est, & refert quasi imagine Patrem suum. Mysterium hoc similitudine è medio sumpta aliquo modo adumbrari potest, sic: Filius aliquis, qui non tantum natura sua, & essentia, idem sit quodam modo cum Patre, nempe paternæ essentiæ participatione,

sed etiam Patrem suum referat externis corporis lineamentis, quantitativis, qualitativis, vultu, voce, gestu: jam hic filius quod ad naturam dicitur imago essentiae ac naturae paternae, quod verò ad externa corporis lineamenta, &c. dicitur imago personae paternae. Similiter res habet in Dei Filio, qui est Imago Patris, non tantum quoad naturam, & essentiam eandem, ac totam, sed etiam quoad personam, hoc est, ut sic dicam, illius unius essentiae lineamenta, vultum, vocem, gestum, hoc est, quoad ea quae in Deo Patre incomprehensibilia sunt, & quae necesse est mutuatitij huiusmodi vocibus exprimere. *Sustineatque*) Secundum est fundamentum, quo nititur gloriosa illa sessio ad dexteram Patris, à conservatione rerum omnium creaturarum. *Purgatione*) Tertium est fundamentum à redemptione humani generis, quam vocat purgationem peccatorum nostrorum: Purgationem hanc *δι' εαυτοῦ* per seipsum factam dicit, hoc est, per sui ipsius oblationem in cruce & per lauerum, non externum aliquod, verum sui ipsius sanguinis: hoc enim purgationem per Christum factam mirificè commendat. Apostolus Philip. 2. 9. & deinceps, dicit Christum (ob hanc ipsam purgationem peccatorum nostrorum qua se exinanivit) euectum esse ad summam sublimitatem, hoc est, ad dexteram Dei Patris: ergo & sine dubio hoc quoque fundamentum est quoddam, gloriosae illius

lius sessionis ad dexteram Patris. *Sedit ad dexteram.*) Ex fundamētis istis iā iactis, sequitur tertium illud argumentum descriptionis Filij Dei, à gloriosa ipsius sessione ad dexteram Patris.

4 *Tantò præstantior*) Nunc describitur Filius Dei comparatè, facta nimirum comparatione cum Angelis, qui creaturæ sunt præstantissimæ, & gloriosissimæ. Propositio comparationis hæc est: præstantior factus est Angelis: Ratio, excellentius sortitus est præ Angelis nomen: sensus enim huius versus est, quasi dicat, præstantior factus est Angelis, quia excellentius præ ijs nomen est sortitus. Verùm propositionem cum argumento suo inter se copulavit, per argumentum varium simulque proposuit. *Nomen* intelligo, honorificam appellationem, & mentionem Filij in scripturis, non vno in loco occurrentem cuiusmodi est nomen Filij Dei.

5 *Nam dixit*) Sequuntur testimonia, partim de Filio ipsiusque honorabili nomine in Scripturis sacris sese offerēte, partim de Angelis, ipsorumq; ministerio: adducūtur autem omnia quæ sequuntur testimonia ad ostendendum id quod dictum est versu 4. Filium præ Angelis excellentius sortitum esse nomen, id est, honorabiliorem Filij in Scripturis sacris mentionem fieri, quàm Angelorum.

Filius meus) Testimonium hoc primum est ex Psalmo 2. 7. Est autem de Filio Dei, in

quo fit mentio ipsius vt Filij. *Et rursum*) Secundum testimonium ex 1. Chron. 22. 10. Est autem de Filio, & in eo fit honorabilis mentio ipsius, vt Filij.

6 *Rursum autem*) Tertium testimoniũ de Filio, ex Psa. 97. 7. In hoc testimonio fit mentio Filij, vt Dei adorandi, etiam ab ipsis Angelis

7 *Et de Angelis*) Quartum testimonium, ex Psal. 104. 4. Est autem de Angelis, & in eo fit mentio Angelorum, vt Ministrorum Dei velocissimorum, vt qui Spiritus sunt, & tanquam ignis flamma.

8 *Ad Filium*) Quintum testimonium, ex Psal. 45. 7. Est autem de Filio, & in eo fit mentio Filij, vt gloriosi Regis, insidentis Throno suo, & manu tenentis sceptrum Regni sui.

10 *Et tu initio*) Sextum testimoniũ ex Psal. 102. 26. Est autem de Filio: Eius mentio fit, vt Dei æterni Creatoris omnium rerum.

13 *Ad quem autem*) Septimum testimonium, ex Psal. 110. 1. Est autem de Filio, & in eo fit mentio eius, vt Regis gloriosi sedentis ad dexteram Patris: tractatur per communicationẽ. Primũ quærit Apostolus, cuinam Angelorum vnquam sit hoc dictum quod sequitur? Responsio negata post interrogationem intelligenda est, quasi dicat, nulli.

14 *Nonne omnes*) Ratio est negatæ & intellectæ responsionis, ab Angelorum conditione & functione; omnes sunt ministratores Spiritus,

Qui

Qui ministerij) Definitio quædam est ministratorum Spirituum, ex ijs quibus ministrant, nēpe hæredibus salutis: Mittuntur enim ministerij causa propter eos qui hæredes erunt salutis. Vel si lubet, Ratio est, cur dixit ministratores Spiritus, ex fine missionis ipsorum: Mittuntur enim ministerij causa, idque propter hæredes salutis. Quare Angeli ministratores siue ministri dicuntur, respectu Dei cui ministrant, nō hominum, etsi ministrent Deo suo propter homines ipsorumque salutem. Hactenus itaque, adductis septem testimonijs, ostensa est illa propositio, quæ fuit suprā versu 4. Filium excellentius nomen sortitum præ Angelis. In Scripturis enim fit mentio Filij: primū, vt Filij Dei: secundò, vt Dei adorandi: tertio, vt Regis, cum Throno & sceptro: quarto vt Creatoris: quinto vt Regis sedentis ad dexteram Patris. Angelorum autem mentio sit, vt Spirituum ministratorum. Nam quod nomen vocat, versu. 4. ego accipio illud non de nomine tantū Filij Dei, de quo in duobus primis testimonijs, sed etiam de alia quacunq; Christi appellatione & mentione: de qua in reliquis testimonijs

Argumentum Capitis secundi.

Huius Capitis tres sunt partes. Prima est. Conclusio principalis exhortationis, vers. 1. Deinde est secun-

dum hortationis argumentum, tractatum & explicatum, à vers. 2. ad postrema verba vers. 8 Vndè initium sumit tertia pars capitis, posita in varia digressionem ac multiplici occupatione: quarum primæ duæ sunt de Christi gloria, ad versum vsque 10. reliquæ sunt de Christi passione, indè ad finem capitis.

CAPVT. II.

I *Propterea oportet nos eò magis attendere ijs quæ audiuius, nequando perfluamus.*

Propterea oportet) Conclusio exhortationis post digressionem, quæ fuit indè à vers. 2. Ca. I. Non infert simpliciter oportere nos attendere ijs quæ audiuius, sed comparatè ait, eò magis attendere ijs quæ audiuius; quasi dicat, Quò est Filius, per quem locutus est Deus hisce diebus vltimis, persona dignior ac gloriosior, eò magis oportet attendere ijs, quæ ex ipso audiuius. Ergo conclusio hæc exhortationis infertur ex argumento illo, à persona Filij Dei, non nudè tantum exposito, sed in digressionem (vt audiuius) amplificato. Porro attendere ijs quæ audita sunt, nihil est aliud quàm id quod dicitur postea, retinere professionem, hoc est, doctrinam Christi jam perceptam, quod quidem quid aliud est, quàm perseuerare in fide ad finem vsque? *Nequando*) Quò pertineat & spectet illa attentio docet: eò autem spectat, ne quando effluamus, hoc est, ne quo tempore ea quæ audita sunt nobis effluant. Metaphora
est

est à vasis quæ perfluunt, ac non continent infusum liquorem. Sententia igitur est: Attendite, & in hoc incumbite summa diligentia, ut contineatis & retineatis ea quæ audiuistis.

2 Etenim si per Angelos dictus sermo fuit firmus, omnisque transgressio & contumacia iustam mercedis retributionem retulit.

3 Quomodo nos effugiemus si tantam neglexerimus salutem? quæ quum primum enarrari cæperit per ipsum Dominum ab ijs qui ipsum audierant fuit nobis confirmata.

4 Testimonium illis præsentente Deo & signis & prodigijs, varijsque virtutibus & spiritus sancti distributionibus pro sua voluntate.

5 Non enim Angelis subiecit mundum illum futurum de quo loquimur.

6 Testatus est autem quidam alicubi, dicens, Quid est homo, ut memor sis eius, aut filius hominis, ut eum respicias?

7 Fecisti eum paulisper inferiorem Angelis: gloria & honore coronasti eum, & constituisti eum super opera manuum tuarum.

8 Omnia subiecisti sub pedibus eius: Enimvero per hoc quod ei subiecit omnia nihil omisit quod non sit ei subiectum.

2 Etenim si per) Secundum argumentum exhortationis, à certo Dei iudicio quod sequitur neglectum professionis nostræ, vel doctrinæ tã saluificæ. Non effugiemus, inquit, si tantam neglexerimus salutem, id est, salutarem doctri-

nam. Ergo in ea perseverate. Antecedens illustratum est comparatione minorum. Si doctrina per Angelos ministrata, hoc est, si doctrina Legis (nam per Angelos fuit ministrata. Galat. 3. 19.) firma fuit, hoc est, ut sequentia verba exponunt, si nemo Legis per Angelos datę, transgressionem impunè tulit, quantò magis non effugiemus si tantam neglexerimus salutem? *Omniſque transſio*) Hęc est epexegetis verbi proximi: nam ideò sermo Legis, qui datus est per Angelos, firmus fuit, quia omnis transgressio illius sermonis, & contumacia, justam mercedis retributionem retulit: sermo enim firmus est qui non impunè violatur.

3 *Qua quum primùm*) Argumenti secundi, quod proximè præcedentibus verbis conclusum est, amplificatio inserta per parenthesin videtur, ab hoc loco, ad versum vsque quintum. Conclusio argumenti fuit, Nos non effugiemus judicium, si tantam neglexerimus salutem, hoc est, salutis doctrinam. Amplificatio, siue ratio est, à ministerio Apostolorum: quasi dicat, Salutis hæc doctrina, præterquam quod per ipsum Dominum primum cœpit enarrari, etiã ab Apostolis qui cum Domino versati sunt, ipsum viderunt, ipsum audiverunt, & (ut est 1. Ioan. 1. 1.) manibus suis ipsum contrectarūt, ab Apostolis, inquam, tanquam testibus fide dignissimis, nobis est confirmata: Ergo vel hac etiam de causa, & propter hoc ipsum ministerium

rium Apostolorum, non effugiemus iudicium, si tantam neglexerimus salutem. Nota igitur, quò plures sunt testes doctrinæ à Christo primùm traditæ, eò grauius futurum est iudicium nostrum, si eam doctrinam contempserimus. Sic ergo paucis verbis accipe summam vers. 2. & 3. quibus tractatur secundum argumentum propositæ exhortationis. Argumentum est à iudicio Dei hoc modo. Nō effugiemus, si doctrinam salutis, quæ per Filium Dei tradita est, neglexerimus. Ergo non est negligenda aut contemnenda. Antecedentis ratio est à minori. Nō effugerunt qui doctrinam Legis, per Angelos traditam contempserunt. Ergo quantò magis non effigient, qui doctrinam salutis per Dei Filium traditam neglexerint. Hujus conclusionis amplificatio est, præsertim etiam quum per Apostolos Domini doctrina, hæc salutis sit confirmata.

4 *Testimonium illis*) Commendatio est Ministerij Apostolorum, à testimonijs diuinis, quibus ipsorum vocatio extraordinaria confirmata est & exornata. Testimonia diuina sunt, signa, prodigia, variæ virtutes, ac distributiones Spiritus sancti, quibus testimonijs & donis extraordinarijs testari voluit mundo Dominus Apostolos ita illuminatos & gubernatos fuisse, vt in doctrina cœlesti tradenda errare nullo modo potuerint. Commendatio hæc ministerij Apostoloci eò quoque refertur quò ipsum eorum

ministerium referebatur, nempe ad docendum id quod dixit, contemptores doctrinæ salutis non effugituros iudicium.

5 *Non enim*) Hactenus digressiuncula fuit in amplificationem propositi argumenti secundi: Nunc redire videtur ad confirmandam consecutionem illam quæ fuit à minori ad majus Contemptores doctrinæ Legis per Angelos traditæ non effugerunt, ergo quantum magis non effugiemus nos, si doctrinam Filij Dei contempserimus. Ratio sequelæ est à gloria Christi præ Angelis, quæ in eo sita est, quod non Angelis, sed Christo subiecit Deus mundum illum futurum. *De quo*) Hæc verba docent per mundum futurum nihil aliud intelligi, quam tantam illam salutem, de qua dixit suprà, vers. 3. Nam regnum Dei, siue mundus futurus, situs est in iustitia, pace, gaudio per Spiritum sanctum, denique salute æterna. Rom. 14. 17.

6 *Testatus est autem*) Dignitatem & gloriam Christi præ Angelis, confirmat testimonio Davidis. Testimonium hoc est, ex Psalmo 8. 5. In hoc testimonio Davidis citato, primum est propositio dignitatis hominis, siue naturæ humanæ in Christo (nam de eo præcipuè accipienda sunt verba Prophetæ) propositio, inquam, dignitatis cum admiratione quadam. Oritur autem admiratio, ex consideratione, partim vilitatis naturæ humanæ, partim dignitatis illius, in quâ tamē natura nostra in Christo est euectā.

7 *Fecisti eum*) Hoc versu, & principio sequentis versus, est propositæ dignitatis naturæ humanæ explicatio: Primùm verba hæc adducta sunt per occupationem: At Christus homo factus est Angelis inferior, nempe quum factus est obediens Patri, vsque ad mortem, mortem autem crucis? Respondet primùm concessione, paulisper quidem factum Christum, Angelis inferiorem: deinde correctione, paulò post tamen Christum gloria & honore coronatum: Tum illa gloria in quam est euectus declaratur ex rebus creatis, super quas omnes Christus est constitutus Dominus, & Rex, & quæ sub pedibus Christi omnes sunt subiectæ,

8 *Enimvero*) Author colligit ex proximis Dauidis verbis, consecrarium quoddam: nempe quòd nihil planè omissum sit à Patre, quod non sit Christo subiectum. Consecrarium hoc infertur ex nota vniuersi generis qua creaturæ subiectæ Christo circumscriptæ sunt à Propheeta: Nam si omnia subiecit, ergo nihil est non subiectum. Consecrarium hoc continet summam testimonij adducti: nam ex eo hoc discimus, quàm latè pateat Christi dominium, ad omnes nimirum creaturas, nulla planè excepta.

— *At nunc nondum videmus ei omnia esse subiecta.*

9 *Sed Iesum illum cernimus gloria & honore coronatum, qui paulisper fuit inferior Angelis factus, propter mortis perpeffionem: Ut beneficio Dei*

pro omnibus mortem gustaret.

10 Decebat enim ut ipse propter quem sunt hæc omnia, & per quem sunt hæc omnia, multos filios in gloriam adducendo, principē salutis ipsorum per afflictiones consecraret.

11 Nam & qui sanctificat & qui sanctificatur, ex vno sunt omnes: quam ob causam non erubescit ipsos vocare fratres.

12 Dicens, Annunciabo nomen tuum fratribus meis, in medio Ecclesiæ tibi hymnos canam.

13 Et rursum, Ego fretus ero ipso. Et iterum, Ecce ego & pueri quos mihi dedit Deus.

14 Quoniam igitur pueri participes sunt carnis & sanguinis, ipsos, ipse quoq; cōsimiliter participes factus est eorundem, ut per mortem aboleret eum qui mortis imperium habet, hoc est, Diabolum.

15 Et liberos redderet quotquot metu mortis, per omnem vitam obnoxij erant seruituti.

16 Non enim videlicet Angelos assumpsit, sed semen Abrahe assumpsit.

17 Vnde debuit per omnia fratribus similis fieri, ut misericors esset & fidelis Pontifex in ijs quæ apud Deum agenda forent, ad expiandum peccata populi.

18 Nam ex eo quod perpeffus fuit quum tentatus est, potest & ijs qui tentantur succurrere.

At nunc nondum) Reliquo capite toto varia est digressio, & multiplex occupatio, prima est aduerfus confectarium proximum, quod collectum

lectum est ex verbis Davidis: Atqui, dici potuit ab aliquo, nondum videmus illi subiecta esse omnia? Respondet Author, primum concessione, id quidem ita esse. Intelligit autem nondum Christo subiecta esse omnia, respectu membrorum Christi, quorum quidem respectu nondum planè subiecta sunt Christo, mors, peccatum, Diabolus.

9 *Sed Iesum illum*) Responsionis altera pars, per correctionem. At, inquit, ipse Iesus in se consideratus, & vt caput est membrorum suorum gloria, & honore coronatus est, hoc est, dominium obtinuit in omnes res, & in se iam planè vicit mortem, peccatum, Diabolum, si-bique ea subiecit. *Qui paulisper*) Altera videtur occupatio esse, cuius occasio arrepta est ex testimonio Davidis: quasi dicat quis, Atqui, teste Propheta, certè paulisper fuit inferior Angelis factus. Illud quidem concedit, simulque causam subiectionis, & finem exponit, Causa subiectionis illius, qua ad tempus factus est inferior Angelis, fuit mortis perpassio: Nam subiectio, siue (vt sic dicam) inferioritas Christi, in mortis perpassione maximè posita est. *Vt beneficio*) Hic finis est, cur in morte factus sit inferior Angelis, est autem vt nos à morte liberaret: ergo finis sumus nos, nostraque salus. Simul causa cur pro nobis mortuus sit addita est, Dei beneficium, siue Dei gratia: nam hoc ex Dei gratia fuit, & in Dei beneficijs numerandum

est imprimis, quod Christus nostram vicem in morte sua suppleuit, quum nobis alioqui necessariò moriendum fuerit.

10 *Decebat enim*) Ratio cur pro nobis omnibus Christus mortuus sit, per occupationem: Estque hæc occupatio tertia. Annon potuit Deus alia ratione servare humanum genus, quàm morte Christi Filij sui? Respondet à decoro, siue ex eo quod Deum facere decuit. Decebat Deum, vt in gloriam adduceret multos filios, Principem salutis ipsorum per afflictiones consecrare. *Propter quem*) Periphrasis quædam Dei est, quæ (vt videtur) rationem continet, cur Deum decebat sic facere: Est autem à jure & potestate Dei, quæ innuitur ex eo, quod propter ipsum, & per ipsum sunt hæc omnia, hoc est, quod ipse sit, & finis, & fons atque author horum omnium. Hinc sequitur, eum jure quodam suo potuisse de his omnibus statuere pro arbitratu suo.

11 *Nam & qui*) Quarta occupatio. At diceret quis: Quis potuit pati Filius Dei, vel qui potuit consecrari per afflictiones? Respondet, Et qui sanctificat, & qui sanctificantur ex vno sunt omnes, hoc est, ex vna & communi natura, & (vt sic dicam) materia patibili, siue per passionibus obnoxia: Carnem & sanguinem vocat postea hoc capite versu 14. Est igitur hæc ratio per occupationem, cur Deus consecrauerit per afflictiones Principem salutis nostre

Quam

Quam ob causam) Ex testimonio ipsiusm. t. Christi, qui vocat eos qui sanctificatur fratrū nomine, confirmat, & Christum sanctificantem, & nos qui sanctificamur, ex vna & communi natura ac materia esse.

12 *Dicens*; Testimonium Christi confirmat ex Scripturis, primū ex Psalmo 22.13.

13 *Et rursum*) Secunda Scriptura est Psal. 18. 3. vbi Christus loquitur vt homo & frater noster: nam fiducia in Deum hominis est propriè: & creaturæ. *Et iterum*) Tertia Scriptura est Esaia 8.18.

14 *Quoniam igitur*. Ex proximis Esaiæ verbis colligit quod instituit, nempe Christum participem esse carnis & sanguinis, siue Christum nobiscum vnus esse naturæ. Hoc autem syllogismo infert, institutum. Christus dicit: Ecco ego & pueri, h. e. associat se pueris: At qui pueri participes sunt carnis & sanguinis, Ergo ipse Christus quoque similiter particeps factus est eorundem. Sententia propositionis est in testimonio Esaiæ: Assumptio cum conclusione est in prima parte huius versus. *Vt per mortem*) Conclusionem illustrat ex fine suo: finis autem triplex ex his & sequentibus verbis elici potest: Primus finis est, vt moreretur: Sequitur hic finis ex proxima conclusione primū & proximè: Nam si eiusdem naturæ nobiscum factus est, profectò mori potuit: atque ob id ipsum factus est eiusdem naturæ vt morere-

tur. Est igitur hæc principalis conclusio quam instituit hoc loco ostendendam, nempe Christum per afflictiones & mortem consecratum. *Aboleret*) Secundus finis est, abolitio Diaboli, sequitur priorem: Nam ideò mortuus est ut aboleret Diabolum, Primum est Diaboli quædam periphrasis, & circumscriptio: deinde, ne fortè ex circumscriptioe ignoraretur, est ipsius expressa nominatio: Nam nomina rerum sæpè sunt notiora nobis ipsarum descriptionibus.

15 *Et liberos*) Tertius finis, qui sequitur ex secundo: Liberatio nostri: qui autem liberantur, descripti sunt ex servitute cui obnoxij erant per omnem vitam, hoc est, ex servili sua cōditione, quam quidem ostendit, ex illo mortis metu, tanquam causa quadam sua: nam qui metuunt mortem, illi servi sunt, ac servili sunt cōditione, non autem ingenui, neque filij, & metuere iram Domini servile est ac servū arguit.

16 *Non enim videlitet*) Liberationem de qua dixit proximè, & quæ per Christum est, deinceps ostendit ex tribus suis fundamentis, quorum primum est natura humana, vel semen Abrahamæ assumptum à Christo: hoc fundamentum illustrat ex diversis, seu per remotionem naturæ Angelicæ, ut potè quæ inepta sit ad hoc opus liberationis nostræ.

17 *Vnde debuit*) Alterum fundamentum ex superiori collectum, similitudo nimirū Christi & nostri,

nostri, in qualitatibus & perpeſſionibus, eiufdē & cōmunis naturæ. *Ut miſericors,*) Tertium fundamentum ex proximo. Ex qualitatibus & infirmitatibus communibus euasit Chriſtus miſericors & fidelis Pontifex apud Deum. *In ijs quæ*) Pontificatus Chriſti quædam declaratio ſubjecta eſt. Declaratio hæc primū eſt à rebus ſubjectis, in quibus cernitur Chriſti Pontificatus: Cernitur enim in ijs quæ apud Deum agēda ſunt: Deinde declaratio eſt à Pontificatus ſine, qui eſt ad expiandum peccata populi.

18 *Nam ex eo*) Oſtendit ideò Chriſtum factum ſimilem fratribus per omnia, ut eſſet miſericors, hoc eſt, oſtendit tertium fundamentum ſequi ex ſecundo, ideò miſericordem eſſe & fidelem Pontificem, quòd fratribus ſimilis factus ſit per omnia: oſtendit, inquam, hoc ex certa quadam ſpecie communium afflictionum, nempe tentationibus: ex eo, inquit, quòd perpeſſus eſt tentationes Diaboli Chriſtus euasit miſericors erga tentatos ſimiliter: Hinc ſequitur factum eum ſimilem fratribus in omnibus afflictionibus, ut miſericors eſſet erga quocunque modo afflictos: illuſtratio eſt generis à certa quadam ſui ſpecie.

Argumentum Capitis tertij.

Hoc capite primum habemus argumentum exhortationis tertium, ad alteram uſque partem verſus 6. quo

loco habemus argumentum exhortationis quartum, ad
versum vsque 4. hinc sequitur conclusio exhorta-
tionis, ad versum vsque 14. à versu 14. repetitio fit argu-
menti quarti, ad versum 17. à quo versu est transitio ad
argumentum exhortationis quintum, ad finem vsque
capitis,

CAPVT III.

1. *Vnde fratres sancti vocationis cœlestes parti-
cipes, considerate Apostolum & Pontificem profes-
sionis nostræ Christum Iesum.*

2 *Fidelem ei qui ipsum constituit: et & Moses
fidelis fuit in tota domo ipsius.*

3 *Tantò namque ampliore gloria præ Mose
hic dignus est habitus, quantò maiorem habet
honorem is qui construxit domum quàm domus
ipsa.*

4 *Omnis enim domus construitur ab aliquo: qui
verò condidit omnia hæc est Deus.*

5 *Et Moses quidem fidelis fuit in tota domo i-
psius, et famulus, ad testificanda quæ post erant di-
cenda.*

6 *At Christus, et filius, domui suæ præst.*

*Vnde fratres) Nunc Apostolus reuersus ad
institutum, primùm affert argumentum ex-
hortationis tertium: est autem argumentum
hoc conjunctum, partim ex Prophetia seu A-
postolatu, partim ex sacerdotio Christi habe-
mus Iesum Christum Apostolum & Pontifi-
cem professionis nostræ: ergo teneamus pro-
fessionem*

feſſionem, vt concludit poſtea cap. 4. verſ. 14. Argumentum hoc tertium inferre videtur, ex ijs quæ ab initio hujus epiſtolæ dicta ſunt, ac priorem quidem ejus partem ex his quæ dicta ſunt de Chriſti prophetia & miniſterio, poſteriorem ex his quæ dicta ſunt proximè, poſtrema nimirum parte capitis ſecūdi, de Chriſti paſſione ſiue functione ſacerdotali: paſſus enim eſt Chriſtus, vt Sacerdos & Pontifex. Sensus ergo hujus loci eſt: Quum Chriſtum habeatis, & miniſtrum doctrinæ quam profitemini, & Sacerdotem, ſuo ſacrificio ac ſanguine ſancientem ratamque facientem eam ipſam doctrinam (Chriſtus enim ratum facit ſuo ſanguine Nouum Teſtamentum) conſiderate eum diligenter, & tenete profeſſionem veſtram; in verbo enim cōſiderandi comprehenſa eſt concluſio exhortationis. *Vocationis*) Definitio quædam eſt Sanctorum quos dixit: Nam ij ſancti ſunt, qui participes facti ſunt vocationis cœleſtis, hoc eſt, qui vocati ſunt ad cœleſtia. Nam quos vocauit eos iuſtificauit, quos iuſtificauit eos glorificauit. Rom. 8. 30.

2 *Fidelem ei*) Amplificatio eſt argumenti proximi, à fidelitate (vt ſic dicam) Chriſti in officio ſuo, tam Apoſtolico ſiue Prophe- tico, quàm ſacerdotali. *Qui ipſum conſtituit* Periphras eſt Dei Patris, qui filium conſtituit Apoſtolum & Pontificem, hoc eſt, vocauit ad illa munera obeunda. De hac vocati-

one Filij, vide postea Cap. 5. versu 5. Fidelitas Christi respicit vocantem, vel eum qui ipsum vocavit, hoc est, Deum Patrem: vt fidelitas cuiusque in officio eum respicit à quo vocatus est ad officium quodcunque sic ob- eundum: Nam illi reddenda ratio est præsti- ti officij. *Vt & Moses*) Fidelitatem Christi in officio suo illustrat similitudine Mo- sis, ac fidelitatis ipsius: Moses enim typus quidam fuit Christi, & magna fuit ipsius authoritas in Dei populo.

3 *Tantò namque* Occupatio est, ergo eodem loco habes Christum quò Moses fuit, & Mosi duntaxat parem facis? Responder Apostolus, Mose esse digniorem Christum, ac respon- sionem hanc confirmat: Particula enim ista *namque*, præsupponit primùm objectionem, dein- de responsionem, quasi dicat objicienti pari- tatem illam Christi & Mo- sis: Christus præ- stantior est Mose tantò, quantò major est is qui construxit domum, quàm domus ipsa: est itaque hæc ratio prima cur Christus ampliore gloria præ Mose dignus sit habitus, à condi- tione vtriusque, & Christi, & Mo- sis. Christus est constructor domus, & ipse opifex, Mo- ses est domus, vel pars domus constructæ à Chri- sto: Has conditiones comparat in impari: Qui conditione sua impares sunt, profectò necesse est eos pariter impares esse in gloria: imparibus enim debetur impar gloria. Si lu- bet,

bet, redige rationem in hanc formam. Constructor domus & domus ipsa sunt impares honore & gloria, siue maiorem habet honorem constructor domus, quàm domus ipsa: At Christus est qui construxit domum: Moses est domus ipsa, & Christi quasi fabrica: Ergo Christus ampliore gloria præ Mose dignus est habitus. Hujus syllogismi propositio & conclusio, composita sunt in enunciato quod vim habet connexi, assumptio vt manifesta subticetur.

4 *Omnis enim domus*) Priorem assumptionis partem, nempe eam quæ est de Christo, confirmat ab ipso genere. Omnis domus construitur ab aliquo: At Ecclesia est domus; Ergo construitur ab aliquo. Ab alio autem quàm à Deo construi non potest: hoc enim est quod dicit (Porro qui condidit omnia hæc Deus est) Ergo Deus est ejus conditor: At Christus est Deus, vt vidimus primo capite, Ergo Christus est ejus conditor.

5 *Et Moses*) Altera ratio intellectæ responsionis, etiam ab impari conditione Moïse & Christi. Moïse in domo Dei fuit fidelis quidem, sed vt famulus. At Christus vt filius domui suæ præest. Hinc sequitur ampliore gloria præ Mose Christum dignum esse habitum; siue Christum & Moïsem impares esse in gloria. *Domo ipsius*) hoc est, Dei, & quæ ad Deum spectat propriè, non ad Moïsem: famulus enim

non est Dominus familiæ: Moses autem in Ecclesia tantum famulus fuit: In Ecclesia enim nullum est vilius dominium, nisi solius Dei & Christi, sed duntaxat, famulitium. *Ad testificanda*) Vfus famulitij Mosis in domo Dei, Constitutus enim fuit famulus ad testificandum, & id quidem obscure, quæ postea dicenda erant aperte, de Christo ipsiusq; dominio.

6 *At Christus* ut) Apodosis comparationis minorum: Christus domui suæ præest ut filius: filius ex aduerso respondet famulo: filij enim & famuli longè alia atque alia conditio est in familia. *Sua*) hoc quod dicit suæ, αὐτῆς, respondet illi quod dictum est de Mose ipsius, αὐτῆς: Nam Christus ut filius & hæres præest domui, non quidem alienæ, sed suæ.

Cuius domus sumus nos, si fiduciam & spem illam de qua gloriamur, ad finem vsque firmam tenuerimus.

Cuius domus) Vocabuli domus interpretatio quædam est, & ad nos applicatio quasi dicat: domum Filij intelligo nos omnes credentes. Atque hîc incipit argumentum exhortationis quartum, in hanc formam, Si fiduciam & spem illam de qua gloriamur, ad finem vsque tenuerimus, hoc est, si tenuerimus professionem, domus Filij sumus. Ergo teneamus professionem. Argumentum est à beata nostra conditione: beatitas enim nostra in eo posita est, ut simus domus Filij. Postea versu 14. eandem

dem conditionem exprimit verbo μετοχῆς hoc est, participationis Christi, & communio-
nis cū Christo: μετοχοὶ, inquit, γενόμεν τε χρι-
στῷ. Si fiduciam) παρρησία græcè dicitur, hæc voce
significatur prop: i. e. audacia, qua fit vt compa-
reamus coram Tribunali Dei Iudicis Vide 1.
Ioannis 3. 21. Hoc quod sequitur in textu καυ-
χήμα gloriatio, effectum est παρρησίας & spei:
Nam gloriamur sub spe gloriæ Dei. Rom. 5.
vers. 2. Porro his verbis fiduciæ & gloriationis
significatur doctrina illa qua hæc ministran-
tur: & in his tanquam effectis intelliguntur
causæ suæ, fides & spes: παρρησία enim est fidei,
καυχῆμα verò spei.

7 Quapropter sicut dicit Spiritus ille sanctus,
Hodie si Vocem eius audieritis.

8 Ne obdurate corda Vestra, sicut in exacerba-
tione, in dietentationis illius in deserto.

9 Vbitentauerunt me patres Vestri, proba-
uerunt me, & viderunt opera mea quadraginta
annis.

10 Quapropter infensus fui nationi isti: &
dixi, semper errans corde, neque cognouerunt vias
meas.

11 Itaque iuravi in ira mea, si introibunt in
requiem meam.

12 Videte fratres, nequando sit in illo Vestrum
cor malum & infidele deficiendo à Deo viuo.

13 Sed exhortamini alij alios quotidie, quoad
appellatur dies hodiernus, ne quis ex vobis induc-

tur fraude peccati.

Quapropter) Conclusio est exhortationis principalis, amplificata simili comparatione exhortationis illius, qua Spiritus sanctus jam olim per Davidem populum Israeliticum hortatus est. Psal. 95. 7. Protasis præcedit quinque versibus. Apodosis siue redditio sequitur duobus versibus sequentibus. Sententia comparatæ conclusionis hæc est, quasi dicat, quemobrem quemadmodum Spiritus sanctus per Davidem hortatus est aliquando populum Israeliticum, ne induraret cor suum, ita ego admoneo, nequando sit in vilo vestrum cor malum & infidele. *Hodie*) Propositio hortationis Spiritus sancti, ad populum Israeliticum.

8 *Sicut in*) Declaratio propositionis, per comparisonem indurationis ac rebellionis, quæ jam olim fuit populi.

9 *Vbi tentauerunt*) Tentationum ac rebellionum populi in deserto declaratio & enarratio. *Et viderunt*) Exaggeratio facti ipsorum, ex eo quod tot annos Dei opera mirifica in deserto viderint.

10 *Quapropter*) Narrat iram Dei, propter tentationem populi. *Et dixi*) Iræ subiungit comminationem ex ira profectam: in qua primum habemus causam iudicii, errorem populi & ignorantiam: deinde iudicium ipsum: Iudicium est: Non introibunt in requiem meam: confirmatum est, adhibito iure iurando.

12 *Videte*) Apodosis siue redditio cōparationis, quasi dicat: sicut olim dixit Spiritus sanctus &c. ita ego nunc dico vobis, videte fratres nequando, &c. Dehortatur autem ab apostasia, hortatur verò ad perseuerantiam. *Cor malum*) Quid sit cor malum sequens verbum exponit, est enim cor infidele: infidelitas autem cordis defectione à Deo ostenditur: Nam infidelis est, qui deficit à Deo viuo.

14 *Christi enim participes facti sumus, si modò principium illud quo sustentamur, firmum tenuerimus ad finem usque:*

15 Interim dum dicitur, *Hodie si vocem eius audieritis, ne obdurate corda vestra, ut in exacerbatione.*

16 *Nam quidam quum audissent, exacerbauerunt Dominum: non omnes tamen ij qui exierant ex Aegypto per Moysen.*

Christi enim) Repetitur argumentum exhortationis quartum post conclusionem: Nam participatio Christi, vel Christi participes fieri nihil est aliud re ipsa, quàm esse eius domus qui enim domus est Christi, Christus in ipso inhabitat. In quo autem Christus habitat, is coniunctus est cum Christo: quare argumentum est à κοινωνία, siue communione cum Christo. *Principium*) Quid intelligat nomine principij subsistentiæ, ipse sequenti versu edocet: est autem obedientia fidei, in qua habemus subsistentiam quasi nostram. Porro sensus est: Si fir-

nam renuimus professionē nostram Christi facti sumus participes.

15 *Interim dum dicitur*) hoc est, q̄ ali dicat, principū intelligo illud, quod olim dixit Spiritus sanctus per Dauidē, hodie si vocem &c.

16 *Nam quidam*) Declaratio est exacerbationis illius de qua proximē dixit, per occupationem: Objici enim potuit, An omnes exacerbauerunt Dominum? Respondet à quibusdam hoc factum, non ab omnibus qui exierant ex Ægypto.

17 *Quibus autem inferus fuit quadraginta annis?* nōne ijs qui peccauerant, quorum corpora conciderunt in deserto?

18 *Quibus autem iuravit non ingressuros in requiem suam nisi ijs qui non oledierant.*

19 *Et videmus non potuisse ingredi propter incredulitatem.*

Quibus autem) Sternit sibi viam ad argumētum exhortationis quintum: sumptum autem est (vt videbimus) ex eo, quod destituentur illa requie. Si non retineatis professionem, metuendum est ne frustremini illa requie, de qua dictum est à Dauidē: Ergo retinete professionem. Illustratum est antecedens hoc tribus his postremis versibus capitis tertij. Est autem illustratio à simili exemplo infidelium Israelitarū, quod tractatur *διαλογισμῶ* interrogatione & responsione. Sensus hujus versus est) si ornatum rhetoricum rejiciamus) Ira infensus fuit

Deus

Deus tot annis ijs qui peccauerant, ac proinde eorum corpora in deserto ceciderunt.

18 *Quibus autem*) Sensus est, Iuravit non ingressuros in requiem suam eos Israelitarum qui non obedierant. Summa utriusque versus huc redit. Illi Israelitarum qui à Deo defecerunt non ingressi sunt in requiem ipsius. Vnde sequitur, & nos, si defecerimus à fide & professione nostra, non ingressuros esse in requiē. Notandum duas has interrogationes, priorem quæ est versu 17. posteriorem quæ est versu 18. respondere duobus verbis quorum mentio fit in testimonio illo Davidis supra citato, nempe *Iuravi in ira mea.*

19 *Et videmus*) Confirmatio illorum quæ dixit duobus versibus proximè præcedentibus, ab ipsa experientia & euentu rei: quasi dicat, Re ipsa videmus eorum quæ dicta sunt euentum & experientiam: videmus, inquam, nō potuisse ingredi in requiem Israelitas, propter incredulitatem, iuxta illud Dei iusiurandum, quod iuravit in ira sua.

Argumentum Capitis quarti.

Hoc capite habemus argumentum exhortationis quintum, ad postremam partem versus tertij, Inde digressio est, ad versum 11. Versu 11. redit ad principalem conclusionem, cumque repetit argumentum quintum, ipsumque illustrat ac confirmat, ad versum 14. quo loco ad conclusionem principalem redit, ipsamque repetit, simulque argumentum conclusionis tertium, à Christi pontificatu, ad versum vltimum. Ver-

su denique ultimo repetita est eadem conclusio, & exhortatio, eique adjectum argumentum exhortationis sextum.

CAPUT IV.

1 Metuamus igitur nequando derelicta promissione introeundi in requiem eius, videatur aliquis ex vobis fuisse frustratus.

2 Etenim nobis Euangelizatum est, sicut & illis, at non profuit illis auditus sermo, ut qui fide cōtemperatus non fuerit ipsis qui audierant.

3 Introimus enim in requiem nos qui credidimus, sicut dixit, itaque iuravi in ira mea, si ingressi sunt in requiem meam:

Metuamus igitur) Ex simili illo exemplo iudiciorum Dei in Israelitas, quod tractatum est tribus versibus postremis capitis tertij, concludit similiter nos, si non retinuerimus professionem, non ingressuros in requiem Domini. Ex quo sequitur instituta exhortatio. Ergo retinete professionem. Obseruatum est suprà istud esse argumentum exhortationis quintum, à priuatione illius cœlestis quietis, de qua Dauid in Psalmo suo locutus est. *Derelicta*) His verbis infidelitatem circumscribit. Nam infidelitas siue Apostasia & defectio, cernitur in derelictione promissionis Dei de requie æterna. *Fuisse Frustratus*) Nempe promissa illa requie. Qui enim non primum credit in promissionem beneficij, profectò is non con-

[sequi-

sequitur beneficium, primùm ergo credendum promissioni, ut deinde re promissa fruamur.

2 *Etenim nobis*) Probat consecutionem precedentem, quæ fuit à simili exemplo iudicii Dei in Israelitas contumaces, ad similem conditionem futuram eorum qui in regno Christi sunt, si similiter atque illi defecerint ab eo. Est autem probatio à simili beneficii Evangelij communicatione, ex qua colligitur necessario similitudo in iudicijs, in hanc formam: Nobis Euangelizatum est sicut & illis: atqui non profuit illis auditus sermo Evangelij, ut qui increduli fuerint, hoc est, non sunt ingressi in requiem illam, neque consecuti sunt beneficium in verbo promissum: Ergo & nos similiter, si increduli fuerimus, nullum fructum ex audito verbo percipiemus. *At non profuit*) Propositio antecessit in proximis verbis, hæc est assumptio syllogismi. *Ut qui*) Ratio assumptionis ab incredulitate Israelitarum. Auditus sermo tum permisceri fidei dicitur, cum fide apprehenditur. Metaphora est à potione, quæ propriè admisceri solet. Conclusio syllogismi non est expressa. Cæterum hæc est syllogismi forma, si lubet eum brevius conficere: Nobis est Euangelizatum similiter atque illis. Ergo quemadmodum illi non credentes, non sunt ingressi requiem promissam, ita nos quoque deficientes à fide, non introibimus in requiem promissam. *At Author subsumpsit priorem compa-*

rationis partem, vt posteriorem ex ea concluderet, cū vtraque pars conclusionis simul nexa concludenda fuerit: est enim probatio sequelæ propositionis compositæ.

3 *Introimus enim*) Probat quod dixit proximè, nihil profuisse illis auditum sermonem, quod non crediderint, hoc est, non ingressos fuisse in requiem propter incredulitatem: probat, inquam, ex eo quod ij demum qui crediderunt, introeūt in requiem, hoc modo. Nos (inquit) qui credimus, & non alij introimus in requiem: Ergo illi qui non crediderunt, non poterant introire in requiem. Contrariorum enim contraria sunt consequentia. Est argumentum à pari consecutione in contrarijs. *Sicut dixit*) Requiem hanc de qua loquitur exponit & declarat testimonio illo Davidis, superiore capite citato, vers. 11. Significat enim se non aliam requiem proximis verbis intelligere, quàm illam cujus mentio facta est in illo Davidis testimonio, quo dictum est, Itaque iuravi in ira mea, &c. Hoc igitur loco digressio est ad ostendendum Sabbatismum populo Dei proprium.

— *Licet operibus à iactis fundamentis mundi perfectis.*

4 *Ita enim dixit quodam in loco de septimo die, Et requieuit Deus die septimo ab omnibus operibus suis.*

5 *Et hīc rursum, Si introibunt in requiem meā*

6 *Quia*

6 Quia igitur reliquum est ut alij introeant in eam, & quibus prius annunciatum fuit non introierunt propter incredulitatem.

7 Rursum quendam praefinit diem, Hodie apud Davidem dicens, tantò post tempore (prout dictum est) Hodie si vocem eius audieritis, ne obdurate corda vestra.

8 Nam si eos Iesus in requie collocasset, nequaquam de alio posthac die loquutus fuisset.

9 Itaque reliquus est aliquis sabbatismus populo Dei.

10 Nam qui ingressus est in requiem ipsius, requieuit & ipse ab operibus suis, quemadmodum à suis Deus.

Licet operibus) Hoc adjectum est per occupationem, dici enim potuit, Cùm requies illa diei Sabbathini fuerit jam inde à condito mundo, populusque eo die perpetuò requiescere consueverit: cur dictum est à Domino per Davidem, itaque iuravi, &c. hoc est, cur iuravit Dominus, exelusurum se populum à requie, quasi non antea vnquã requieuerit? Huic objectioni occurrit Author, quasi dicat: Iuravit Dominus non ingressurum còtumacem populũ in requiem suam, licet etiam in Sabbatho requieuit. His verbis habemus periphrasin diei sabbathini, ex ipsius causa. Causa autem est à perfectione operũ Dei in initio, quum creauit omnia sex diebus, septimo autẽ die requieuit ab operib. suis, Ergo sensus est: Licet opera

Dei fuerint perfecta ab initio, ac proinde fuit requies Sabbathi: Nam perfectio operum Dei importat requiem Sabbathi.

4 *Ita enim dixit*) Probat hanc requiem Sabbathi ab illa superiori diuersam esse, ex diuersis de hac & illa testimonijs. Nam de hac requie diei Sabbathini, hoc est testimonium quod habetur. Gen. 2.2. De requie autem illa superiori diuersum quoddam est testimonium quod habetur. Psal. 95. 11. Nempe si introibunt, &c. Ex his diuersis testimonijs, innuit diuersam esse requiem diei Sabbathini, ab ea cuius meminit David in Psalmo suo.

6 *Quia igitur*) Ex proximè adducto testimonio colligit tanquam consecrarium quoddam, oportuisse præfiniri nouum quendam diē quasi Sabbathi & quietis, diuersum ab illo die siue tempore, quo oblata est requies veteri illi ac rebeli populo: hunc vocat hodiernum diem. Colligit autem consecrarium hoc in hunc modum, quasi dicat, Ex hoc testimonio Davidis sequitur populum illum veterem & rebellem non ingressum esse in requiem Domini ejus meminit David, nam jurejurando sunt exclusi. Hinc rursus sequitur nouum quendam diem præfiniendum fuisse. Necessitas hujus sequelæ hæc est, Oportuit certè aliquos introire in requiem illam promissam. Vnde sequitur, quum illi rebelles non introierint, oportuisse nouum diem quietis alijs ingressu-

rīs præfiniri. *Hodie ſi Vocem*) Diem hunc, ex verbis Domini apud Dauidem, hodie vel hodiernum diem nominat. Hodierni diei nomine intelligit totum illud tempus quantūcunque, quo offertur gratia in Chriſto Ieſu. Tempus hoc gratiæ metimur primo Chriſti aduentu, tanquam termino à quo, & ſecundo Chriſti aduentu, tanquam termino ad quem *Prout dictum*) Repetit teſtimonium hoc Dauidis, in quo nominatur tempus hoc hodierni diei.

8 *Nam ſic eos*) Per occupationem docet hunc diem præfinitum non intelligendum eſſe de illo tempore quo Ieſus ſive Iehoſchua collocavit populum in requie, vel requieſcere fecit in terra Canaan: Objici enim potuit, Annon eſt hic dies ille dies quo Iehoſchua in requie collocavit populum Dei? Reſpondet, demonſtratque hodiernum hunc diem non intelligendum eſſe de die illo requietis populi in terra Canaan: Nam poſt illam populi requiem, Dominus per Dauidem de alio poſthac die locutus fuit: Ergo non eſt hic intelligendus ille dies, quo collocatus eſt populus, ac requieuit in terra Canaan. Niſi mauis hanc eſſe huius loci analyſin. Priùs docuit, requiem illam de qua locutus eſt Dominus apud Dauidem, aliam atque diuerſam eſſe à requie diei ſabbathini, ſuprà verſ. 4.5. Indè digreſſio fuit, qua ex teſtimonio Dauidis, collegit præfinitum eſſe à Domino quèdam nouum requietis diem.

imò præfiniri eum oportuisse. Nunc vers. 8. re-
 dicit ad institutum, docetque illam requiem
 (de qua apud Davidem) diuersam esse à requie
 populi, in terra Canaan. Objici potuit. Annon
 illa requies, de requie populi in terra Canaan
 accipienda est? Responsio negata intelligenda
 est, cujus hîc ratio est reddita. Argumentum
 sumptum est ab ipso tempore & die de quo
 locutus est Dominus apud Davidem. Locu-
 tus autem est de alio die, quàm illo quo per Ie-
 hoschuam populus collocatus est in requie
 terræ Canaan, & de die illo, qui illam requiem
 multo post tempore insecutus est. Argumen-
 tatio est in hanc formam. Si Iehoschua eos in
 requie collocasset, siue, quod idem est, Si hæc
 quæ est apud Davidem requies, ea esset quæ
 fuit populi in terra Canaan, duce Iehoschua,
 profectò de alio posthac tempore non fuisset
 locutus Dominus. At de alio posthac tempo-
 re ac die locutus est, Ergo hæc requies quæ in-
 uenitur apud Davidem, non intelligenda est
 de illa populi requie in terra Canaan. *In requie*
 Nempè illa cœlesti ac vera, de qua Dominus
 apud Davidem. Hanc κατ' ἐξοχὴν requietis no-
 mine appellat, nam ea demum vera est requies.

9 *Itaque reliquas*) Conclusio qua infertur tum
 ex his quæ dicta sunt. vers. 4. 5. tū ex proximo
 versu, requiem aliquam populo Dei reliquam
 esse, & quidem illis verbis Domini apud Da-
 uidem intelligendam. Postquàm enim primum
 per

per occupationem docuit aliam esse illam requiem ejus meminit David, à requie diei sabbathi, deindè docuit aliam esse à terrena illa requie populi in terra Canaan: hoc versu demùm concludit, reliquum esse populo Dei suum quendam sabbatismum, hoc est, requiem, ejus meminit Dominus apud Davidem, Nota igitur toto hoc loco mentionem fieri triplicis requietis, primò requietis diei sabbati, secundò requietis populi in terra Canaan, tertio requietis populi Dei in cœlis: Cujus quidem postremæ duæ illæ priores vmbrae ac figuræ fuerant. Hanc postremam sic collegit ex remotione duarum præcedentium: Dominus apud Davidem non locutus est de requie diei sabbathi, non locutus est de requie in terra Canaan: Ergo oportet reliquam esse aliquam requiem populo Dei, cujus meminit Dominus apud Davidem.

10 *Nam qui*) Sabbatismus hunc populo Dei reliquum, ostendit ex sabbatismi quadam definitione, hoc modo: Sabbatismus est quo quis requiescit ab operibus suis (illustratur assumptio similitudine requietis & cessationis ipsius Dei) ergo reliquus est populo Dei aliquis sabbatismus, siquidem hæc sit sabbatismi definitio ac ratio nempe cessatio ab operibus. *In requiem ipsius*) Alludit ad verba Domini apud Davidem, quibus dixit; Si ingressuri sunt in requiem meam. Porro requiem Domini intelligit illam pacem & gloriam Dei immensam ac

ineffabilem , cuius Deus suos facit participes. Haftenus igitur digressio fuit inde à postrema parte ver. 3. in qua tantum videtur laborare in exponendo verum sensum illius requietis , cuius fit mentio apud Dauidem. Psal. 95. 11. Itaque exclusis duabus acceptionibus non veris ac genuinis, tertiam acceptionem requietis, cuius ibi mentio facta est, veram ac genuinam tandem conclusit vers. 9. Hanc autem indicauit quum dixit, sabbatismum aliquem populo Dei reliquum : His enim verbis significat coelestem ac spiritualem requiem : Ac si dixisset : itaq; reliquum est, vt nomine requietis (cuius mentio fit apud Dauidem) intelligamus coelestem quandam ac spiritualem requiem, qua tandem fruetur populus Dei.

11 *Studeamus igitur ingredi in illam requiem, nequis in idem incidat contumacia exemplum.*

12 *Viuis est enim sermo Dei & efficax & penetrantior quouis gladio ancipiti, ac pertingit usque ad diuisionem animae simul ac spiritus, compagumq; & medullarum, & dijudicat cogitationes & conceptiones cordis.*

13 *Nec est vlla res creata quae non manifesta sit in conspectu ipsius: imò omnia sunt nuda & patentia oculis eius qui cum nobis est negotium.*

Studeamus igitur) Conclusio est exhortationis : Porro eadem est sententia cum illa, quæ fuit primo versu hujus capitis. Sensus enim est **Teneamus professionem nostram : tenendo enim**

enim professionem, studemus, ingredi in requiem. *Ne quis in*) Cum conclusione repetitur argumentum quintum, illustratum simili exemplo contumaciæ populi veteris: est autem à Dei iudicio, quo frustrabimur ac priuabimur illa æterna requie, ad exemplum illius populi contumacis ac increduli: idem exemplum hoc loco est, idem iudicium propter contumaciam.

12 *Viuus est enim*) Probat pœnam contumaciæ, ex efficacia verbi Dei contempti à contumacibus: Primùm autem est efficaciæ verbi diuini propositio: viuus est (inquit) sermo Dei, hoc est (vt verbum sequens exponit) efficax ad vtrumque, siue seruandum, siue perdendum, licet postèrius hoc per accidens fiat. Tum proposita verbi efficacia declaratur, primùm comparatè, facta cum gladio ancipiti comparatione: Deinde simpliciter, ex effectis suis. Effecta verbi partim sunt in animo hominis, partim in corpore: In animo autem rursus dupliciter operatur verbum, vel enim operatur in crassiore animi parte, quam *ψυχὴ* vocant: vel in puriore, quam spiritum & mentem appellant. Paulus ad Ephes. 4. 23. spiritum mentis vocat. Verbum itaque Dei dicit efficax esse ad diuidendum, non modò crassiorem animi partem, in qua sunt affectus, sed etiam puriorem illā mentem siue spiritum. Effectum verbi diuini in corpore duplex est, primùm in exteriori

corpore, quod intelligit compagum, nomine: Deinde in interiori corpore, quod intelligit medullarum nomine. His verbis igitur significat Author, nihil esse in homine, nihil in animo hominis, nihil in corpore hominis, siue crassū, siue purum, siue externum, siue internum, ad quod non pertingat verbum Dei, & quod non diuidat. *Et dijudicat*) Hæc verba adijcit, ad exponendam, proximam allegoriam: Nam quod dixit de diuisione animæ, spiritus, compagum, medullarum, illud nunc propriè effert, dum dicit verbum Dei dijudicare cogitationes, ac cōceptiones cordis.

13 *Nec est ulla*) Sermonem transfert à verbo Dei, ad ipsum verbi Authorem Christum, & à Christo ipsiusque perspicacia ac prouidentia, & Christi quasi oculis, quos nihil quātumuis abditū & absconditum potest effugere, argumentatur quodam modo ad verbi ipsius efficaciam. Nam si oculus ejus omnia penetrat ac peruidet, profectò verbum ipsius efficax esse necesse est.

14 *Habentes igitur Pontificem magnum qui penetrauit cælos, Iesum Filium Dei, teneamus hæc professionem.*

15 *Non enim habemus Pontificem qui non possit affici sensu infirmitatum nostrarum: Sed tentatum in omnibus similiter, absque peccato.*

Habentes igitur Repetita exhortationis conclusio, vnà cum argumento tertio, à Christi ponti-

pontificatu, non solum Pontificem vocat, sed magnum addit Epitheti hujus occasio arrepta videtur ex loco proximo, in quo prædicta est Christi sapientia ac summa perspicacitas in omnibus rebus peruidēdis. Hinc enim non tantum Pontificem, sed magnū Pontificem prædicat. *Qui penetravit*) Magnū Pontificē ex eo declarat, quod cœlos penetrarit, h. e. cœleste illud sacrarium, cuius typus erat illud terrenum sacrariū, in quod solitus est ingredi Pōtifex terrenus. *Iesum Filium*) Pontificem ex nomine suo designat, & ex persona Filij Dei commendat.

15 *Non enim*) Amplificatio cōclusionis proximæ, à Pontificis Christi qualitate siue conditione, nēpē *συμπάθεια* quod afficiatur sensu infirmitatum nostrarum: hoc autem innuit quū dicit, tentatum eum in omnibus similiter absq; peccato. In antecedente enim causa consequēs effectū intelligendū est. Illustrata autem est hęc Christi *συμπάθεια*, per remotionē cōtrarię *ἀπαθείας* quasi dicat, non est *ἀπάθης*, sed *συμπάθης*.

16 *Accedamus igitur cum fiducia ad Thronū gratiæ, ut consequamur misericordiam, & gratiam inueniamus ad oportunitatem auxilium.*

Accedamus igitur) Post amplificationem repetita est conclusio principalis, alia quidem verbis à superiori, sed re ipsa eadem. Nomen fiduciæ usurpatum est supra cap. 3. vers. 6. ubi conclusit & dixit, Si fiduciam & spem illam de qua gloriamur, ad finem vsq; firmam tenue-

rimus. Eodem sensu concludit nunc, accedendum esse cum fiducia ad thronum gratiæ: Nam tenere firmam fiduciam, & accedere cum fiducia ad thronum gratiæ, idem sunt reipsa. *Ut consequamur*) Soudet accessum hunc ad thronum gratiæ, ab usu, & fructu suo: ita enim fiet ut misericordiam & gratiam consequamur, à throno enim gratiæ proficisci gratiam oportet, & ad eum peruenire, qui ad thronum gratiæ accedit. Estque hoc argumentum exhortationis sextum à Dei gratia & misericordia.

Argumentum Capitis quinti.

Hoc capite primum est digressio ab instituta exhortatione in confirmationem Pontificatus Christi in genere, ad versum usque 11. quo loco proponit de Melchisedeco dicendum. Idque in eum finem, ut conspiciatur Christum esse pontificem secundum ordinem Melchisedec. Quare, ut superiore capitis parte probauit Christum Pontificem esse in genere: Itaversu 11. aggreditur ad demonstrandum Christum Pontificem esse secundum ordinem Melchisedec, hoc est, certum quendam ordinem Pontificatus Christi, versu 12. à proposita illa de Melchisedeco doctrina digreditur in reprehensionem segnitiei & ruditatis Hebræorum, ad quos scribit ad finem usque capitis.

C A P V T. V.

1 *Nam omnis Pontifex ex hominibus assumitur, & pro hominibus constituitur in ijs quæ apud Deum*

Deum agenda sunt, ut offerat donaria & victimas pro peccatis:

2 *Qui quantum satis est possit miserari vicem ignorantium & aberrantium: quod & ipse circumdatus sit infirmitate:*

3 *Et propter hanc debeat, sicut pro populo, ita & pro seipso offerre victimam pro peccatis.*

4 *Neque sibi ipsi quisquam sumit hunc honorem, sed qui vocatur à Deo, sicut & Aaron.*

5 *Ita & Christus, non sibi hunc honorem tribuit ut fieret Pontifex, sed is qui dixerat ei, Filius meus es tu, ego hodie genui te.*

6 *Sicut & alibi dicit. Tu es Sacerdos in aeternum, secundum ordinem Melchisedec.*

7 *Qui in diebus carnis suae, quum deprecationes & supplicationes apud eum qui poterat ipsum servare à morte, cum clamore valido & lacrymis obtulisset, & ex auditus esset ex metu.*

8 *Quamvis filius esset, tamen ex ijs quae passus est didicit obedientiam.*

9 *Et consecratus, factus est Author salutis aeternae omnibus qui ipsi auscultant:*

10 *Cognominatus à Deo Pontifex secundum ordinem Melchisedec.*

Nam omnis) Digreditur in declarationem Pontificatus Christi. Primum autem probat eum Pontificem esse in genere, instituta comparatione cum veteribus illis Pontificibus. Particula *Nam*, referri debet ad versum 14. capitis superioris: Docet enim Christum verè

Pontificem esse: quod fuit argumentum exhortationis tertium, repetitum vers. 14. superioris capitis. Et sensus est quasi dicat: Quod dixi cum Pontificem esse, id apparet verum ex comparatione Christi cum Legali Pontifice. Introducitur autem hæc ratio per occupationem. Quæri enim potuit, An merito Christum Pontificem dixerit illo versu citato? Nunc itaque probat per comparationem factam cum Legali Pontifice, Christum Pontificem esse. Est autem comparatio in tribus, quæ primùm proposita sunt in Legali Pontifice, primis quatuor versibus. Deinde accommodantur ad Christum, ad versum vsque 11. Hoc itaque versu est prima proprietas Pontificis in genere. Pontifex omnis ex hominibus assumitur, & pro hominibus constituitur in ijs, quæ apud Deum sunt agenda. *Ut offerat*) Finis est Pontificis assumpti & constituti, nempe oblatio donariorum & victimarum pro peccatis, hoc est, omnis oblatio in genere rerum quarumcunque, siue vitæ expertium, ut erant donaria, siue videntium, ut erant victimæ.

2 *Qui quantum satis*) Secunda proprietas Pontificis in genere, in qua fit comparatio: Est autem *συμπάθεια* qua afficitur sensu miseræ ignorantium & aberrantium: *Quod & ipse*) Sympathiæ ratio petita à simili infirmitate ipsius Pontificis, qua tanquam veste circumdatus est & circumseptus, hoc est, omni ex parte obnoxius

noxius est ijsdem naturæ incommodis ac vitijs
(*Et ipse*) Particula (*Et*) nota vel similitudinem,
vel paritatem, quasi dicat, quod pariter ipse.

3 *Et propter*) Infirmi-
tatem Pontificis parem
arguit, ex eo quod pariter pro peccatis populi
& sui ipsius, debeat victimam offerre.

4 *Neque sibi ipsi*) Tertia proprietas Ponti-
ficis, in qua fit comparatio cum Christo Ponti-
fice: Est autem vocatio Dei, quod non sumat
sibi ipsi hunc honorem, sed ad eum vocatus est
à Deo. Illustratum est speciali exemplo Aaro-
nis qui à Deo vocatus est.

5 *Ita & Christus*) Hastenùs fuit compara-
tionis protasis, siue propositio, continens tres
proprietas, in quibus fit comparatio: Sequi-
tur nûc apodosis redditio siue accommodatio
similitudinis. Accommodatur enim & ap-
plicantur Christo superiores proprietates Pon-
tificis, sed καὶ ὅς ἐστιν ὁ υἱός. Primùm enim applica-
tur tertia & vltima Pontificis proprietas. Chri-
stus vocatus est à Deo Patre. *Sed is qui*) Pe-
riphrasis est Dei Patris, quasi dicat: Sed Deus
Pater tribuit ei hunc honorem. Confirmat au-
tem attributum à Patre hunc honorem, duo-
bus testimonijs, priore ex Psalmo 2. 7. poste-
riore ex Psal. 110. 4.

7 *Qui in diebus*) Applicat ad Christum se-
cundam Pontificis proprietatem, nempe ser-
sum infirmitatum nostrarû, & συμπαθήσαι: hanc
enim videtur innuere, dum dicit; Filium in die-

bus carnis suæ ex ijs quæ passus est didicisse obedientiam. Nam ex causâ intelligi potest effectum: passio autem Christi causâ est, sensus verò infirmitatum nostrarum effectum est. *In diebus carnis*) Hoc est, in tempore infirmitatis suæ. Nam Christus crucifixus fuit ex infirmitate. 2. Cor. 3. 14. Carnis ergo nomine metonymicos infirmitatem intelligit. *Quum deprecationes*) Hic videtur inserta quædam definitio dierum carnis, siue temporis infirmitatis Christi. Sumpta est autem partim ex deprecationibus & supplicationibus, cum clamore valido, & lachrymis Patri suo oblatis, partim ex effecto deprecationum & supplicationum, nempe deprecationum acceptatione. *Qui poterat*) Periphrasis est Dei Patris, quæ etiam designatur fundamentum super quo extructæ sunt quasi preces Christi, & fides per quam precatus est: nempe Dei Patris omnipotentia, quæ potuit ipsum à morte servare. Hac Dei potentia nitebatur fides Abrahami, quo tempore sub spe contra spem credidit. Rom. 4. 21. *Cum clamore*) Modus est ac gestus precantis, quo significantur preces intensissimæ, & quàm maximè seriæ ac vehementes. Sic dicitur Christus precatus esse quum in horto esset, cum sudore, qui erat quasi grumi sanguinis in terram descendentes. Luc. 22. 44. *Et exauditus*) Hoc est effectum deprecationum Christi, quo significatur Christum exauditus

exauditum à Patre, & liberatum ab illo metu quem habuit ex horroribus qui magis magisq; impendebant. Neque enim tantum perturbatus fuit dum esset in horto, præsentis sensu divinæ iræ in nostra peccata, sed etiam gravissimo metu iræ futuræ. De hac liberatione Christi leges non nihil apud Lucam 22. 42. 43. vbi (postquam dixit Christus, Pater si vis, transfer poculum hoc à me) habemus visum esse ipsi Angelum è cœlo corroborantem eum

8 *Quamvis Filius*) Hæctenus definitio fuit dierum carnis in parenthesi quadam, qua interpellata est justa sententia. Nam hæc coniungenda sunt cum ijs, quæ dicta sunt principio versus præcedentis, in hunc modum: Qui in diebus carnis suæ quamvis Filius esset &c. Porro his verbis est passionis Christi amplificatio, à persona Filij Dei. *Didicit*) Hoc est effectum passionis. Sensus est: Re ipsa expertus est quid sit obedire Deo & irato Patri propter peccata nostra: nimirum expertus est non satis fieri offenso Deo, nisi, vt Paulus loquitur (Philip. 2. 8.) obedientia quæ est ad mortem usque, & eam quidem ignominiosissimam & maximè execrabilem, vtpotè crucis mortem. Didicit quidem hoc Filius, sed non inuitus, verum summa voluntate: secus obedientia Filij non fuisset pro peccatis nostris satisfactio. Quare Galat. 1. 4. dicitur Filius dedisse semetipsum pro peccatis nostris.

9 *Et consecratus*) Passionem illam Christi ac obedientiam commendat ex effectu suo: Hinc enim factus est Christus Author salutis æternæ, non tantum (vt dicit Apostolus ad Philip. 2. 9.) obedientiam ipsius secuta est exaltatio in summam sublimitatem, sed etiam salus nostra æterna. Porro consecratio hæc (interprete ipso Apostolo supra 2. 10.) per afflictiones, adeoque per mortem ipsam fuit. Nam Christus per crucem & mortem consecratus fuit ad munus illud sacerdotale, & ad hoc vt Princeps & Author euaderet salutis nostræ. *omnibus qui*) Notanda est vniversi generis restrictio. Christus quidem factus est Seruator omnibus, sed cum hac restrictione, credentibus. Atque hæc ipsa fidei restrictio intelligenda est in generalibus illis sententijs quæ passim occurrunt in Euangelio: vt cum dicitur, omnibus promitti vitam æternam, intellige credentibus.

10 *Cognominatus à Deo*) Probat salutis Authorem factum Christum, à cognomine illo Pontificis diuinitus ipsi attributo. Confirmatio igitur est à Dei ipsius testimonio. *Secundum ordinem*) Restrigit Pōtificatum Christi ad certam speciem, siue certum ordinem: nempe non quidem Aaronis, sed Melchisedeci: quo significat cognominatum Christum Pontificem, non temporarium, sed æternum.

11 *De quo nobis multa sunt dicenda, eaque difficilia*

facilia explicatu : quandoquidem segnes facti estis auribus.

De quo nobis) Hactenus comparatione Christi Pontificis cum Pontifice Legali docuit Pontificem esse Christum. Comparatio fuit in tribus proprietatibus quæ in Pontifice omni requiruntur. Ex his duas tantum in apodosi comparationis Christo applicauit : Primam enim proprietatem, nempe quod ex hominibus assumitur omnis Pontifex, non applicatam Christo reliquit, ut quæ satis de ipso intelligi possit. Nam de hoc non ambigitur, Christum ex hominibus assumptum, & pro hominibus constitutum esse. Nunc, ut supra ostendit Pontificem esse Christum, docet Pontificem esse secundum ordinem Melchisedeci, hoc est, ostendit Pontificatus ipsius speciem. Primum proponit de Melchisedeco dicenda multa, & ea quidem difficilia : Eò pertinent nimirum hæc quæ dicuntur de Melchisedeco omnia, ut melius conspiciatur Christum Pontificem esse secundum ordinem Melchisedeci. *Quandoquidem segnes*) Ratio est cur proponit de Melchisedeco dicendum. Est autem ab Hebræorum ad quos scribit segnitie & ruditate. Atque hinc, etsi proposuerit de Melchisedecodendum, tamen transitum sibi facit ad reprehensionem Hebræorum, quam prosequitur ab hoc loco ad caput usque septimum. Quare necesse est dicamus Aposto-

lum ab instituto suo digredi, abductum quidem culpa, nempe ignavia & ruditate ipsorum Hebræorum.

12 *Vos enim quos oportuit pro temporis ratione doctores esse, rursum opus est doceri quæ sint elementa inity eloquiorum Dei: factique estis ij quibus lacte sit opus, & non solido cibo.*

13 *Enimuero cui cum lacteres est, is rudis est sermonis iustitiæ: (infans enim est)*

14 *Sed adultorum est solidus cibus, eorum videlicet qui propter habitum, sensus habent exercitatos ad discretionem boni ac mali.*

Vos enim) Proposita est segnities eorum in proxima ratione. His autem verbis est propositionis illius argumentum, à genere doctrinæ quo ipsis est opus, nempe elementari, & catechetica siue puerili. *Quos oportuit*) Exaggerat necessitatem hanc doctrinæ elementaris, qua ipsis opus est, ex eo quod pro temporis ratione oportuit esse, hoc est, ex ea ipsorum conditione, quam tempus tam diuturnum postulabat, nempe ut doctores essent, non autem discipuli erudiendi in ipsis primis elementis Religionis Christianæ. *Factique estis*) Illustrat rationem propositionis, quam exaggeravit definitione & interpretatione quadam: Nisi mauis rationem hinc reddi cur sit ijs opus elementari doctrina, ab ipsorum conditione, nempe infantia. Nam his verbis est infantis periphrasis. Infans enim est cui lacte est opus, &

non

non solido cibo:

13 *Enimverò cui*) Probat infantiam eorum & ruditatem definitione quadam infantis: Infans est, cui res est cum lacte. Vobis opus est lacte. Ergo vos estis infantes. *Is rudis*) Dicendum fuisse videtur, Is infans est. Sed infantiae effectum posuit, nempe ruditatem, pro ipsa infantia, ac si dixisset, Infans est, ac proinde rudis. Sed hanc ruditatem applicavit non ad eos qui re vera infantes sunt, sed ad Hebræos qui in religione quodam modo infantes erant, dixitque *rudis est sermonis iustitia.*

14 *Sed aduultorum*) Illustratio proximæ propositionis & rationis à contraria definitione adulti, quasi dicat, Adulti sunt contrà quibus res est cum solido cibo. *Eorum videlicet*) Definitionis proximæ quasi definitio quædam est, ac si dicat, dum dico adultos esse quibus opus est solido cibo, nihil aliud volo, quam adultos esse eos qui propter habitum sensus habent exercitatos. Adulti igitur sunt, primū qui habent habitum crebra exercitatione comparatum, deinde qui beneficio habitus habēt sensus (hoc est, facultates animi) expeditos ad iudicandum de bono & malo, habitus enim expeditam facultatem in agendo significat.

Argumentum Capitis sexti.

Hoc toto capite digressio est ab eo, de quo dicendum instituit verſ. 11. Cap. 5. nempe de Melchisedeco. Inchoata

autem digressio fuit, capitis 5. vers. 12. In hac digressionem quæ est hoc capite, argumenti magna est varietas. Primū exhortatio est tribus primis versibus, ad hoc ut feruntur ad perfectionem, confirmata graui denunciatione in Apostatas, ad versum vsque nonum. Tum correctio & mitigatio quædam est illius denunciationis, inde ad vers. 11. Hinc sequitur specialis quædam exhortatio ad perseverandum in charitate & bonis operibus, ad alteram vsque partem vers. 12. Vbi per occasionem redit ad principalem, exhortationem quæ est ad perseverantiam in fide, eiusque argumentum adducit septimum, in quo amplificando persistit, ad versum vsque 18 eiusque partem alteram, ubi ex nono & octauo argumento principalem concludit denuò exhortationem. Versu denique 19. discedit à principali exhortatione, paulatimque transit ad id quod dicendum de Melchisedeco proposuit. cap. 5. vers. 11.

CAPVT. VI.

1 Quapropter omisso qui in Christo rudes inchoat sermone, ad perfectionem feramur: non iacentes rursus fundamentum respicientia ab operibus mortuis & fidei in Deum.

2 Baptismatum doctrinæ, ac manuum impositionis & resurrectionis mortuorū, & iudicij eterni.

3 Atque id faciemus, si quidem permiserit Deus.

4 Impossibile est enim eos qui semel fuerint illustrati, gustauerintque donum cæleste, & participes facti fuerint Spiritus sancti,

5 Gustauerintque bonum Dei verbum, ac virtutes futuri seculi;

6 Si prolabantur, denuò renouari ad resipiscen-
tiam, ut qui rursum crucifigant sibi metipsis filium
Dei, & ad ignominiam exponant.

7 Nam terra quæ imbrem sæpius in se venien-
tem combiberit, & progenuerit herbam accommo-
dam ijs per quos excolitur, recipit benedictionem à
Deo.

8 At quæ profert spinas & tribulos, reprobæ
est, & maledictione proxima: cuius exitus tendit
ad exustionem.

Quapropter omisso) Pergit in digressionem
coepta in fine superioris capitis. Atque ut
superius reprehendit ipsorum ruditatem & in-
fantiam: Ita hîc hortatur ad hoc ut ferantur
ad perfectionem, hoc est, ad perfectam de
Christo doctrinam. Propositio exhortatio-
nis est his verbis, in prima parte hujus versus:
Cujus sensus est. Omissis rudimentis Religio-
nis Christianæ; feramini ad doctrinam perfe-
ctiorem. Non iacientes) Declaratio est illius do-
ctrinæ, quam dixit rudes in Christo inchoare,
h. e. doctrinæ elementaris: est autem ex parti-
bus illius doctrinæ. Sunt autem partes doctri-
næ elementaris & fundamentalis, 1. Doctrina
resipiscentiæ ab operibus mortuis. 2. Doctrina
fidei in Deum. 3. Doctrina baptismatum. 4. Do-
ctrina impositionis manuum. 5. Doctrina resur-
rectionis mortuorum. 6. Doctrina iudicii æter-
ni. Hæ enim atq; aliæ ejusmodi sunt partes do-
ctrinæ elemētaris ac catecheticae. Ex his colli-

gere licet, tēpore Apostolorū fuisse catechistas
 ac κατηχημένους, denique catecheticā doctrinā.

3 *Atque id faciemus*) Hoc est, feremur ad perfectionem, non jacentes rursū fundamentū &c. si Deo ita fuerit visum, sine cujus voluntate ac nutu nihil possumus. Ergo hoc versu propositam exhortationem quodāmodò corrigit, ac restringit diuina permissione.

4 *Nam fieri.*) Argumētum est exhortationis à grauissimo Dei iudicio in eos, qui postquā instructi sunt sermone illo qui in Christo rudes inchoat, non feruntur ad perfectionem, sed prolabuntur: h. e. (vt vno verbo dicam) in Apostatas: Est autem iudiciū aduersus istos denunciatum, resipiscentiæ (vt sic dicam) impossibilitas. Conditionem istorū, quę antecedit ἀποστασίαν his partibus explicat. *Qui semel fuerint*) Prima pars conditionis est mentis illuminatio. *Gustauerintque*) Secunda pars est cordis quidam gustus ac sensus, sed superficialius duntaxat. *Et participes*) Tertia pars est participatio ipsius Spiritus sancti, qui est author & effector præcedentium partium ac beneficiorum Dei. *Gustauerintque*) Quarta pars est participatio causæ instrumentalis præcedentium beneficiorum. Est autem Dei verbum, per quod Spiritus sanctus operatur, & mentis illuminationem, & cordis sensum. *Ac virtutes*) Quinta pars: degustatio quædam virtutum, & (vt sic dicam) potentiarum, quas in futuro seculo plenē

nè percipiemus. Significat autem inchoationem futuræ beatitudinis per gustum quendam virtutum futuri sæculi. Nam & Apostatæ degustant illam vitam beatam ante apostasiam, verùm (vt sic dicam) superficialiter. Gustus enim hîc atque sensus non est in profundo, aut in imo cordis, sed tantùm (vt sic dicam) in summa cute ac superficie. Nam verbum Dei siue verbi semen quod committitur cordibus Apostatarum, & hypocritarum, comparatur semini quod cadit inter seminandum in petrosa loca, quæ non habent multam terram, verùm terræ quandam superficiem, cui subest petra. Semen quod cadit in loca petrosa, exoritur quidem statim, ac emergit supra terram, quia non agit radices deorsum: Sole autem exorto, subitanea illa herba exarescit: ita semen verbi quod cadit in cor Apostatæ, quasi petrosum, & superficialiariam duntaxat terram habens, exoritur, ac statim quidem exoritur, verùm illa quasi seges & herba statim exarescet, quia non egit radices penitus in profundo cordis, & ager cordis non est bonus & honestus.

6 *Si prolabantur*) Hæc est altera pars descriptionis Apostatarum, ab eorum lapsu ac defectione, vnde & Apostatæ nominantur: Nam hoc loco posita est pro Apostatis ipsorum descriptio: primùm à conditione eorum ante lapsum, quæ quatuor vel quinque partibus explicata fuit. Deinde à lapsu ipso. *Vt denuò*) Hoc est

judicium in Apostatas denunciatum, finalis (vt vocant) impœnitentia: Nam Deus peccatum in Spiritum sanctum, cujusmodi est Apostatarum, specialiter plectit finali hac impœnitentia. *Vt qui rursum*) Ratio finalis impœnitentiæ, vel impossibilitatis resipiscentiæ, ab ipsorum facto: rursum (inquit) crucifigunt sibi metipsis Filium Dei: Tum hoc quid sibi velit, verbis sequentibus exponitur: ad ignominiam eum exponunt. Eodem sensu Heb. 10. 29. dicit eos conculcare Filium Dei, & sanguinem fœderis (per quem fuerant sanctificati) profanum ducere: quo quidem facto non minùs ignominia exponitur Christus, quàm expositus est ignominia quum à Iudæis est crucifixus.

7 *Nam terra*) Iudicium hoc denunciatum illustrat similitudine terræ, quæ cum sæpiùs imbrem in se venientem combiberit, attamen nihil profert præter spinas & tribulos: quemadmodum, inquit, hujusmodi terra reprobata est & maledictioni affinis; Ita Apostatæ qui jam sæpiùs imbrem verbi diuini in se venientem combiberunt, & tamen nullum fructum bonum proferunt, sed prolabuntur, reprobi sunt & maledictioni affines, h. e. desperata est eorum conuersio & salus. Iudicium in terram reprobam illustratur dissimili benedictione terræ bonæ, quæ progenerat herbam accommodam ijs à quibus excolitur. Protasis dissimilitudinis est vers. 7. Apodosis de terra reprobata
est ver-

est versu sequenti.

8 *At quæ profert*) Nempe postquam imbrem sæpius in se venientem combiberit. *Cuius exitus*) Declaratio maledictionis, cuius proximè meminit. Nam in eo sita est maledictio terræ sterilis & infructuosæ, vt tandem comburatur.

9 *Sed persuasimus nobis de vobis, dilecti, istis meliora, & cum salute coniuncta, etiamsi ita loquamur.*

10 *Non enim iniustus est Deus, vt obliuiscatur operis vestri & laboriosæ charitatis quam exhibuistis ipsius nomini, vt qui ministraveritis sanctis & ministretis.*

Sed persuasimus) Secunda pars capitis. Correctio & mitigatio quædam proximi iudicij aduersus Apostatas denunciati, per occupationis quandam speciem. Hebræi enim ad quos scribit hæc quæ dixit in Apostatas in se dicta accipere potuerunt. Ideò Apostolus tempestiuè occurrit, dicique; etiamsi ita loquamur, nempè de Apostatis, tamen persuasimus nobis de vobis meliora &c. Nota semper occurrendum esse piorum offensioni, quoties aliquid quod grauius est denunciatur in impios. *Et cum salute*) Quæ proximè dixit meliora, ea definit quodammodo, vocatque cum salute coniuncta, vel ad salutem pertinentia, nam ea demùm verè bona sunt quæ salutem afferunt.

10 *Non enim iniustus*) Argumentum est persuasionis illius (quam dixit) Apostoli, ab operibus eorum bonis. Ac si sic argumentaretur: Opera vestra bona sunt: Ergo persuasimus nobis de vobis meliora. Nam opera bona confirmant, & nobis ipsis, & alijs qui opera bona nostra intuentur, Dei gratiam erga nos, ac salutem nostram. Philip. 1. 6. Persuasum habens hoc ipsum fore, ut qui cœpit in vobis opus bonū, perficiat usque ad diem Iesu Christi. *Et laboriose*) Definitio quædam est operis eorū cuius meminit: definit autē illud ex charitate, tanquā fonte & principio suo; & Dei nomine siue gloria, tanquā fine suo. Nam illud demū est opus verè bonum, quod profectū à charitate cordis interna, dirigitur in gloriā nominis Dei. *Ut qui ministraveritis*) Nunc adducit in medium speciale illud opus eorum ex charitate profectum, & exhibitum Dei nomini. Est autem quod ministraverint sanctis; atque etiamnum ijs ministrant. Nam quum bonum opus dicatur fieri erga omnes, tum maximè id meretur boni operis nomen, quod fit erga sanctos, hoc est, domesticos fidei. Dum tempus habemus, simus benefici erga omnes, maximè verò erga domesticos fidei. Galat. 6. 10. Ministerium hoc eorum non tantū præteritum dicit, sed etiam præsens. Perseuerantiam itaque innuit in bene agendo. Ergo tum maximè persuademus nobis bene fore bonis, quum videmus eos in bono perse-

perseuerare, non tantum bene coepisse. *Non enim iniustus*) Ratio est cur sequatur ex operibus eorum bonis, bona eorum conditio imposterum futura, quam ipse sibi persuasam esse dixit: Est autem sumpta à iusta Dei natura, Deus iustus est. Ergo quum vos sitis bene operari, persuadeo mihi Deum daturum vobis istis meliora, & cum salute conjuncta. Iustitia hæc Dei distributiua est, vt vocant, de qua lege Rom. 2. 6. & deinceps & 2. Thes. I. 6. 7. Nota principium ac fundamentum primum omnis boni quod ad nos vsque peruenit, esse in ipsius Dei natura iusta, veraci, potenti, sapienti, misericordi &c. Quoties ergo analysis siue resolutio alicujus boni fit in suas causas, non prius conquiescendum est, quam veniatur ad primam illam & summam causam, Dei ipsius naturam: Et fides, ac persuasio nostra (vt videre est hoc ipso loco) vt sit firma & stabilis, necesse est nitatur Dei naturæ tanquàm primo suo fundamento. Quamobrem ad hoc vt sit fides in nobis solida ac firma, ante omnia debemus scrutari beneficio Spiritus ipsius Dei profunditates, vt deprehendamus aliquousque naturam illam infinitam, & incomprehensibilem. Obijci potest: videtur hoc loco meritum operum posse colligi: Nam, inquit, Deus esset iniustus si non compensaret bona opera; quare sequitur Deum obligatum esse ad compensandum bona opera, nisi malit iustitiæ suæ re-

nunciare: vbi autem obligatio siue debitum, ibi meritum est, quamobrem bona opera nostra merentur. Respondeo paucis: Dei iustitia quidem postulat vt bona opera Spiritus Sancti (nam de his loquitur) compententur: sed hoc fit non ratione ipsorum operum, etiã sanctissimorum, cùm in ijs perpetuò sit aliqua imperfectio, sed ratione meriti Christi fide apprehensi à persona ea quæ benè operata est. Quoties ergo legimus in Scriptura de mercede siue compensatione, vel bonorum operum personæ, vel personæ ipsius quæ benè operatur, toties in mentem nobis venire debet Christus, ipsiusque meritum, ad quod mercedis siue compensationis nomen propriè est relatum. Nam eæ omnes improprie locutiones sunt, in quibus merces vitæ æternæ, vel omninò gratia Dei refertur, vel ad opera personæ, vel ad personam ipsam operantem. In his enim omnibus Metonymia aliqua est, qua ex effectis causa significatur.

11 *Cupimus autem vt vnusquisque vestrũ idem ostendat studium ad plenam spei persuasionem ad finem vsque.*

12 *Vt ne sitis segnes:*

Cupimus autem) Tertia pars capitis: arrepta occasione ex proximo loco, adhortatur ad perseuerantiam in bonis operibus, siue studium bonorum operum: simulque dehortatur à segnitie, quæ contraria est studio bonorum operum.

perum. Non tantum omnes promiscue adhortatur ad illud studium, sed sigillatim singulos. Durationem hujus studij dicit esse oportere ad finem usque. Non enim coronatur nisi qui perseverauerit ad finem. Effectum hujus studij tradit *πληροφορίαν* spei: Certitudo enim spei nostræ, qua speramus assecuturos nos vitam æternam, confirmatur nobis hoc ipso, quod sentimus in nobis studium bonorum operum. Vnde 2. Pet. i. 10. Studete vocationem & electionem vestram firmam efficere, hæc enim si feceritis nunquam impingetis. Nō prætereundum est silentio quod studium dicat, nempe bonorum operum, non nudè bona opera, quo verbo innuit non valere opus, alioqui in se bonum, nisi ex serio aliquo studio, & animi proposito existat. Velle enim prius esse debet, quàm perficere, & Deus dat suis prius velle quàm perficere. Deus enim is est qui efficit in vobis, & ut velitis, & ut efficiatis Philipp. 2. vers. 13.

12 *Ut ne sitis*) Hic dehortatur à segnitie, quæ studio bonorum operum contraria est.

— *sed imitatores eorum qui per fidem ac patientiam obtinent promissam hereditatem.*

13 *Deus enim pollicitus Abrahamæ, quum non posset per quenquam maiorem iurare, iuravit per seipsum:*

14 *Dicens, Certè benedicens benedicam tibi, & multiplicans multiplicabo te.*

15 *Atque ita quum patienter expectasset, affectus est promissum.*

16 *Nam homines quidem per eum iurant qui sit maior, atque ysdem omnis controuersia finis est iusiurandum ad confirmationem adhibendum.*

17 *Qua in re Deus volens ex abundanti hereditibus promissionis ostendere immutabilitatem consilij sui, fideiussit iureiurando.*

18 *Vt per duas res immutabiles in quibus fieri non potest vt mentitus sit Deus, validam cōsolationem habeamus nos, qui cursum eū corripuimus vt spem propositam obtineamus.*

Sed imitatores eorum.) Hæc quarta pars est capitis: in qua videtur redire ad principalem conclusionem siue exhortationem, qua hortatur ad perseverantiam in fide. Nam dum patientiam cum fide coniungit perseverantiam in fide subinducat, siue fidem quæ manet duratque sub omni tentatione & afflictione. Nam græcum verbum est *μακροθυμία*, quod idem est quod *ὕπομονη*. Argumentum quo hortatur ad fidem & patientiam, sumptum est ab exemplo veterum, & priorum patrum. Est autem hoc argumentum principalis exhortationis septimum. *Obtinent.)* Commendatio est exempli siue facti Patrum, hoc est, fidei & patientiæ eorum, à fructu illo fidei & patientiæ suæ, quem tandem perceperunt. Commendatio hæc ideò addita est, vt exemplum Patrum Hebræos magis

magis moueat. Promissam hæreditatem vocat, quia prius est verbo promissa quàm re ipsa data: idque idèd vt prius ipsi glorificarent Deum credendo in verbum promissionis ipsius, quàm rem promissam acciperent, mitterenturque in ejus possessionem.

13. *Deus enim pollicitus*) Transitio est ad speciale exemplum Abrahæ, & fidei ac patientiæ ipsius, quo quidem exemplo Abrahæ speciali illustrat quod in genere dictum est de fide ac patientia veterum ac piorum Patrum. Hoc itaque versu proponit Deum pollicitum fuisse Abrahæ, adhibito jurejurando, atque eo quidem facto, non per alium, sed per seipsum. *Quò non posset*) Ratio cur Deus per seipsum jurauerit ἀπο τῆς ἀδυνατῆς; ab impossibili, quia non potuit per quenquam majorem jurare. Quoties enim Iurisiurandi necessitas est, per majorem jurandum est, si modò sit major aliquis, non autem per parem vel inferiorem. At Deo, quum non sit major, necesse est jurare per seipsum. Causa autem cur per majorem jurandum est, si modò major aliquis sit, hæc est: quia oportet major sit ejus authoritas, quem testem & vindicem appellamus dum juramus, quàm est nostra ipsorum qui juramus, hoc est, oportet ejus fides ac veracitas indubitata sit, & is sit oportet quo nititur omnis veritas.

14. *Dicens certè* Postquàm proposuit Deum, cùm pollicitus est Abrahæ, jurasse per sei-

plum, promissionem illam Dei jurejurando confirmatam in medium affert: Verba hæc petita sunt ex Geneſ. cap. 22. verſ. 17. verba quidem (fateor) non habent expreſſ. in aliquod Dei juſiurandum: verum ex veru præcedente in quo dictum eſt, Deum per ſeipſum juſſe, conſtat fuiſſe ipſius aliquod juſiurandum. A-poſtolus fortaiſſe hoc Dei juſiurandum iſto loco expreſſit per particulam *⁊* *plu* hoc eſt, juxta phraſin Hebraicam, cum ultimiſimè benedicam. His autem verbis promiſſio ſeminis illius benediſti, h. e. capitis Chriſti, Abrahamo eſt facta.

15 *Atque ita cum*) Hic habemus ſpeciale illud exemplum fidei & patientiæ Abrahamæ: Ac ſi dixiſſet, Abraham ex ſanctis Patribus vnus, patienter credidit & expectauit promiſſionis Dei complementum. *Aſſecutus eſt*) Hæc eſt commendatio ſpei & patientiæ Abrahami, ex euentu ſiue effectu ſuo, nempe promiſſionis complemento, cujuſmodi commendatio fuit ſuprà verſ. 12.

16 *Nam homines*) Redit ad Dei illam promiſſionem jurejurando confirmatam, eamque à ſimili illuſtrat: ſimilitudo autem ſumpta eſt ab agenda ratione illa, quæ hominibus vſitata eſt in finiendis controuerſijs ſuis. Similitudinis protaſis eſt hoc verſu; ac ſi dixiſſet: Homines quidem jurant ad confirmandam promiſſionem à ſe factam. *Per eum iurant*)
Ampli-

Amplificatio est protaseos, à modo quo jurant homines; Iurant per eum qui ipsis maior est, nempe & essentia siue natura sua, & autoritate siue dignitate: Nam jurare non oportet homines, nisi per maiorem, non autoritate modò & dignitate, sed & natura & essentia. Vnde jurare per hominem non licet, ne eum quidem qui in autoritate est, & supra nos eminet, vel hac ratione, quòd natura & essentia non sit superior, licet autoritate & dignitate emineat. Non etiam satis est vt is per quem jurat homo, & natura siue essentia sua, & dignitate siue autoritate maior sit, nisi etiam is per naturam mentiri non possit, hoc est, immutabilis sit natura, cuiusmodi est solus Deus. Quamobrem ne per Angelum quidem licet homini jurare, quanquam is, & natura, & dignitate, homine sit superior. Christum hominem excipio, qui caput est omnis imperij ac potestatis. Colossen. cap. 2. vers. 10. *Atque ysdem omnis* Hic finis est cur homines dum promittunt iusiurandum simul adhibent; nempe vt omnis controuersia finis sit, jam adhibito ad promissionem, siue omninò verbum, iureiurando. Nota igitur, Non iurandum nisi in iudicio, & coram iudice aliquo, idque eo fine vt decidantur controuersia. Nota etiam ex his verbis, legitimam esse iudicij illam formam, qua iureiurando finiuntur controuersia.

17 *Qua in re*) Similitudinis apodosis; ac si dixisset, Sic & Deus fidejussit iureiurando, hoc est, iuravit ut confirmaret factam à se promissionem: *Volens ex abundanti*) His verbis habes consilium Dei, siue finem quem respexit in iurando, hunc nempe ut ostenderet immutabilitatem consilij sui, ac per consequens immutabilitatem promissionis, quæ ex æterno illo consilio profecta est. In antecedente enim consequens intelligendum est. Nā hoc notandum est, nihil Deum promisisse, vel omninò locutum esse, quod non prius in æterno illo consilio suo deliberatum & conclusum fuit Rom. 8. 28. dicit vocari nos ex proposito ipsius. Ergo verbum illud quo nos vocat in tempore, ante tempora secularia conclusum fuit in eterno illo Dei consilio. Est & his verbis modus, quo fidejussit Deus iureiurando. Modus autem est ex abundanti. Abundantiæ opponitur necessitas, nimirum quæ simplex est, & quæ Deum respicit. Nam si Deum respicias, quum ipsius nuda promissio firma sit ac immutabilis, nulla necessitas est cur ad promissionem addatur iusiurandum. Necessitas autem est *κατὰ τὸ* & respectu nostri, quibus nuda promissio non sufficit, quia sumus per naturam incredulitate & infirmitate. Eadem est ratio Sacramentorum quæ est iurisiurandi. Nam & ijs non indiget Dei verbum, per se quidem firmum & immutabile, verum ex Dei
miseri-

miseriordia , propter infirmitatem nostram, ex abundanti verbo Dei sunt addita. Verbi autem ipsius & promissionum Dei simplex est necessitas. *Hæredibus*) Hi sunt in quorum gratiam , & promittit Deus , & jurat: nempe hæredes vitæ æternæ. Nota igitur, promissiones Dei, licet quoad prædicationem earum ad omnes etiam reprobos sese extendant , tamen quoad efficaciam non pertinere nisi ad electos Dei. (*Fideiussit iureiurando*) Verbum græcum est *ἐπιτίθειν*, quod significat interponere iusiurandum , siue iurisiurandi interpositione uti dum promissio fit: Nam iusiurandum est quasi Mediator inter Deum promittentem , & homines credentes , quod ideò interuenit, ut homines Deo promittenti magis credant.

18 *Vt per duas*) Superius finis fuit cur fideiusserat Deus iureiurando , hoc est , iusiurandum promissioni suæ adhibuerit. Nunc hoc versu finis est cui & promiserit & iurauerit, nempe ut validam consolationem habeamus per duas res immutabiles , nempe promissionem Dei primùm , quæ suapte natura immutabilis est; Deinde per iusiurandum Dei, quod similiter immutabile est. Tria sunt hæc immutabilia: Consilium Dei versu præcedenti; promissio Dei , & iusiurandum Dei hoc versu. His tribus nititur fides & consolatio nostra, licet hoc versu meminerit tantùm duarum rerum , nempe promissionis & iurisiurandi *In*

quibus fieri) Ratio est cur posititis illis duabus rebus immutabilibus, necesse est ut validam habeamus consolationem. Sensus horum verborum est, quod postquam Deus promisit simul & iuravit, fieri non potest ut mentiat^{ur}, hoc est, non præstet quod promisit simul & iuravit: Is enim dicitur mentiri, qui quod promisit se facturum, quod etiam iuravit, id non præstat. *Validam consolationem*) Sub valida consolatione quæ effectum est, intelligenda venit hoc loco πληροφορία fidei, hoc est, certa fidei persuasio, quæ causa est consolationis validæ. Nomine enim consolationis intelligo pacem illam quæ est erga Deum, & quæ superat omnem intellectum, & quam Apostolus Rom. 5. 1. ex fide tanquam causa sua deducit: Iustificati igitur ex fide pacem habemus erga Deum. Consolationem igitur istam validam necesse est antegrediatur fides firma. Hic vnicus locus sufficit ad conuincendam aduersariorum illam doctrinam, qua tradunt oportere nos dubitare de salute nostra ac vita æterna. Nam dubitationis doctrinam tradere, quid quæso aliud est quàm docere, tam promissionem Dei, quàm ipsius iusiurandum mutabile esse, adeoque etiam ipsum Dei consilium æternum, ex quo ista sunt, mutabile esse. Quòd si hæc tria mutabilia sint, Annon oportet ipsum Deum esse mutabilem? quæ summa est in Deum blasphemia: Quòd si ob-

jiciant,

jiciant, firmam istam fidem & consolationem validam non accipiendam de singulis fidelibus, sed indefinitè de Ecclesia Dei; Respondeo exemplum hoc Abrahami, hoc est, certi cuiusdam & singularis hominis, cujus paulò antè facta est mentio, & cui Deus promisit simul & iuravit, in eundem hunc finem, vt validam haberet consolationem: exemplum, inquam, hoc Abrahami satis supèrque arguere; quòd, & promittat, & iuret Deus, in gratiam vniuscuiusque fidelis, vt is nominatim firmam habeat fidem & validam consolationem. *Nos qui cursum*) Periphrasis quædam est & descriptio eorum, ad quos pertinet valida ista consolatio, de qua locutus est proximè, & ad quos etiam pertinent duæ illæ res immutabiles, quibus valida ista consolatio ninitur. Sunt nimirum ij qui cursum eò corripuerunt, vt spem propositam obtineant, hoc est, qui ingressi sunt hoc stadium Christiani cursoris, & in currendo durant ac perseuerant. Atque hîc reuertitur Apostolus ad principalem exhortationem, qua ad perseuerantiam in fide & professione adhortatur. Hujus autem exhortationis argumentum est hoc loco octauum. Ex his nota: Non nisi ad eos qui student perseuerare in fide & professione pertinere consolationem validam.

19 *Quam velut anima anchoram habemus tutam ac firmam, & ingredientem vsque in ea qua*

Sunt intra velum.

20 *Quò præcursor pro nobis ingressus est Iesus, secundum ordinem Melchisedec, Pontifex factus in æternum.*

Quam velut) Digreditur ab instituta exhortatione in definitionem quandam spei, cuius proximè meminit. Genus in definitione metaphoricum est; id quod indicat particula ista (velut) Est enim spes, in qua fidem intelligo (Nam fides & spes in Scripturis indifferenter solent accipi) Est, inquam fides, siue spes, quasi anchora animæ nostræ tanquam navis. Est enim ea natura sua instabilis & fluctuans, ac circumfertur quovis vento vel leuissimo. Eph. 4. 14. *Tutam ac firmam*) Differentiæ fidei ac spei sequuntur: Prima est, quòd anchora sit tutata, nempe ab omni iniuria & tentationum insultu. Secunda est quòd Anchora sit firma, hoc est, firmiter fundata, & fixa, hæc prioris causa est. *Et ingredientem*) Hæc tertia est quasi differentia in definitione spei, à loco illo in quem ingreditur, nempe cœlis ipsis, imò supremo & intimo cœlo, siue loco qui est longè supra omnes cœlos. Ephes. 4. 10. Cujus quidem loci sacrarium illud siue sanctum sanctorum veteris Tabernaculi, typus quidam fuit Sacrarium enim siue sanctum sanctorum, velo distinctum erat à sancto quod vocant, siue Tabernaculo exteriori.

20 *Quò præcursor*) Ratio quædam est cur fides

des siue spes nostra ingrediatur vsque in sacra-
rium: sumpta est ab Iesu Christo, ejusque tan-
quam præcursoris in cœlos ingressu, eoque
pro nobis, nempe vt pararet nobis in cœlis
locum. Ioan. 1. 42. *secundum ordinem*) Definitio
quædam Christi adjecta est ab ejus Pontificatu,
& certi cujusdam generis Pontificatu. Ergo in
hac definitione Christi, Pontifex est quasi ge-
nus. Ordo Melchisedec, & æternitas Pontifica-
tus ipsius, quasi differentiæ, quibus distinguitur
Pontificatus Christi à Pontificatu Aaronis. At-
que hîc quidem redit ad doctrinam illâ de Mel-
chisedeco Pontifice propositam suprâ cap. 5.
vers. 11. quo loco de Melchisedeco multa dicen-
da proposuit. Ab eo enim loco, in hunc vsque
locum perpetua fuit digressio ab eo de quo ibi
dicendum instituit.

Argumentum Capitis septimi.

Primum hoc capite agitur de Melchisedeco, Christi
Pontificis typo. Ac primum quidem ejus est descriptio,
ad vers. 4. Deinde præstantia ejus probatur ad vers. 11.
Secundo hoc capite probat mutatum esse sacerdotium
legale, pariter & Ministerium legale, ad vers. 20. Po-
stremo de Iesu agit, cujus typus erat Melchisedec, eiuf-
que præstantiam præ Leuiticis sacerdotibus, probat ad
finem vsque capitis.

CAPVT VII.

1 Nam hic Melchisedec Rex erat Salem. Pon-
tifex Dei altissimi, qui occurrit Abrahamæ reuertenti
à cade regum & benedixit ei.

2 Cui & decimas ex omnibus impartitus est Abraham: qui primum quidem ex interpretatione dicitur rex iustitiæ: deinde Verè etiam rex Salem: quod est Rex pacis.

3 Sine Patre, sine Matre, sine genere: nec initium dierum, neque vitæ finem habens: sed assimilatus Filio Dei, manet Sacerdos in perpetuum.

4 Spectate Verò quantus hic fuerit, cui etiam decimas spoliolum dederit Abraham Patriarcha.

5 Et ij quidem qui sunt ex filijs Leui Sacerdotio fungentes, præceptum habent decimarum accipiendarum à populo secundum Legem, hoc est à fratribus suis, licet egressis ex lumbis Abrahæ.

6 Is Verò cuius genus ad illos non refertur, decimas accepit ab Abraham, & habenti promissiones benedixit.

7 Porro sine ulla controuersia id quod minus est ab eo quod maius est benedicitur.

8 Atque hic quidem homines qui moriuntur, decimas accipiunt: illic autem is de quo testatum est quod uiuat.

9 Et (ut ita loquar) in Abraham decimatus est etiam ipse Leui, qui decimas solet accipere.

10 Nam is adhuc in lumbis patris erat, quum occurreret Abrahæ Melchisedec.

Nam hic Melchisedec) Redit ad id quod de Melchisedeco dicendum proposuit cap. 5. vers. 11. Nam indè à versu 12. illius capitis, digressus

digressus est ad hunc usque locum, Hicigitur propositam ibi de Melchisedeco doctrinam persequi instituit. Primum autem hoc capite est Melchisedeci descriptio: describitur autem ut typus erat Christi, ac proinde omnes descriptionis partes de Melchisedeco typicè accipiendæ sunt: de Christo autem verè ac propriè intelligendæ. *Rex erat Salem*) Descriptionis pars prima ab officio Regio, quo Christum illum Regem adumbravit. *Pontifex*) Secunda descriptionis pars ab officio Sacerdotali, quo etiam Christum illum Pontificem figuravit. *Altissimi*) Hoc Dei epithetum & adjunctum commendat officium. Nam quo Deus excellentior, eò dignior ejus Pontifex est. *Qui occurrit*) Tertia descriptionis pars, à certa quadam functione officij & muneris Regij: Occurrit Abraham reuertenti à cæde regum, proferens panem & vinum, non offerens sacrificium, ut volunt aduersarij. Atque hoc factum Regis fuit, non Pontificis. Vide de hoc Genes. 14. vers. 18. *Et benedixit ei*) Quarta descriptionis pars, à functione officij sacerdotalis. Nam Pontificis est & Sacerdotis benedicere. Si loquamur propriè solus Deus & Christus benedicit: homines autem olim benedixerunt ut Christi quidam typi. Nunc autem post aduentum Christi ipsius, qui corpus est, homines benedicunt, non ut typi, sed ut serui & ministri

ejus, ipsius nomine.

2 *Cui & decimas*) Quinta descriptionis pars, à persolutis ei ab Abrahamo spoliiorum decimis, quo facto Abraham eum Dei Pontificem, & Christi venturi typum agnouit. *Ex omnibus*) Nempè spoliis: nihil enim spoliiorum illorum fuit quod non est decimatum; ad hoc ut esset integræ & perfectæ illa decimarum oblatio. Ex hoc loco videri potest decimarum persolutionem aliquo modo naturalem esse: Nam tum nulla decimis lata fuit Lex ceremonialis. Decimæ enim propriè & primùm ad Deum ipsum pertinebant. Oblationes autem quæcunque debentur Deo, ut sacrificiorum & aliarum rerum, principium suum habent aliquo modo à natura ipsa, & hominum conscientia. *Qui primùm quidem*) Sexta descriptionis pars, à notatione & definitione nominum quæ habuit Melchisedec: vocatus enim primùm est Melchisedec, hoc est, Rex Iustitiæ, deinde Melchi Salem, hoc est, Rex pacis. Vtroque hoc nomine figuravit Christum, qui propriè appellatur & Rex Iustitiæ, nempè illius æternæ & per fidem imputatæ: & Rex pacis, quæ fidei fructus est, & iustitiæ per fidem imputatæ: Iustificati enim per fidem pacem habemus erga Deum. Rom. 5.1.

3 *Sine Patre*) Septima descriptionis pars, ex eo quod expers fuerat omnis cognationis, & consanguinitatis naturalis & terrenæ, ad morem

em aliorum hominum, Hoc argumentum explicatur tribus membris. Primum est quod sine Patre fuerat: Secundum quod sine matre: Tertiū quod omnino sine genere & γενεαλογία extiterit. Genes. 14. vnde hæc deprompta sunt, nō habentur ista totidem verbis, sed quia illic nulla sit mentio Patris, Matris, & omninō generis Melchisedeci, idē silentium illud Moſis, vel potiūs Spiritus sancti eo in loco, sic interpretatur Apostolus hoc loco, ac si expresse fuisset scriptum, Melchisedecum, neque Patrem, neque Matrem, neq; genus habuisse. Nam certum est, Moſem ideo non meminisse, vel Patris, vel Matris, vel omninō generis Melchisedeci; quia is erat Christi venturi typus, & Deus voluit ignorari Melchisedeci & Patrem, & Matrem, & omninō genus, vt ab hominibus pro typo Christi haberetur. Quamobrem nimis temerē mihi videntur facere qui inuito quasi Deo, Patrem, Matrem, & omninō genus Melchisedeci volunt cognoscere. Vtut est, hæc propriē in Christum competunt, qui ἀπ' αὐτῶν fuit quā homo, conceptus nimirum per Spiritū sanctum: ἀμὴ τῶν fuit quā Deus, vtpote Dei Filius ab æterno genitus: Licet etiam sine qui dicant, quā homo eum ἀμὴ τῶν fuisse, quia mater ejus Virgo erat, ideoque propriē non dicenda mater: Denique sine genere, cognatione, & consanguinitate ista naturali fuit quā Deus, & Dei Filius. Videtur Paulus 2. Cor. 5.

16. profiteri se Christum sine his, Patre, Matre omninoque genere, in posterum cogniturum, cum dicit: Quod si etiam nouimus Christum secundum carnem, nunc tamen non amplius nouimus. Nam in Christo illa vetera, etiam in quibus est cognatio ista humana, jam præterierunt, & noua facta sunt omnia. *Nec initium dierum*) Ultima descriptionis pars, ab eius æternitate, quam ex eo colligit Apostolus, quod in illo Geneseos loco nulla mentio fiat, vel ortus, vel mortis Melchisedeci. De Melchisedeco quidem hoc dictum est typicè, de Christo autem verè & propriè accipiendum. Nam is verè æternus est, quum Deus sit ab æterno in æternum, & Pontifex etiam in æternum, non tantum quia Deus est, sed etiam quia homo. Fortasse non malè accipienda sunt, quæ hoc loco dicuntur de Christo, non tam habita ratione naturarum ejus, quam officij, hoc est, Pontificatus ejus. Vt enim Pontifex est, neque genus habet, neque principium, neque finem. Ideo hîc dictum est, eum manere Sacerdotem in perpetuum. *Sed assimilatus*) Causam innuit æternitatis siue perpetuitatis hujus Melchisedeci, ex eo quod typus fuerit Christi, ac proinde assimilatus fuerit ei.

14 *Spektate verò*) Occasione descriptionis proximæ, de excellentia Melchisedeci, agit Apostolus. Propositio excellentiæ est cum præfatiuncula quadam, qua attentionem conciliat.

ēiliat. Spectate, inquit, Propositionis sententia est, ac si dixisset, Melchisedec iste magnus fuit & excellens. *Cui etiam decimas*) Argumenta excellentiæ ipsius omnia ex proxima descriptione sunt desumpta. Quorum primum hoc est, à decimis spoliis Melchisedeco persolutis, etiam ab ipso Abrahamo Patriarcha. Epitheton hoc Patriarchæ amplificat honorem hunc ab Abrahamo delatum Melchisedeco.

5 *Et ij quidem*) Hæc quoque altera est amplificatio facti illius Abrahami; à dissimili cōparatione decimarum quas accepit Melchisedec, & decimarum quas accipiunt sacerdotes Leuitici. Leuitici sacerdotes accipiūt decimas suas à populo, h. e. à fratribus suis, idque ex Legis Dei præscripto. At verò Melchisedec decimas accepit ab ipso Abrahamo. Protasis est hoc versu: apodosis sequenti. *Qui sunt*) Periphrasis est sacerdotum Leuiticorum. *Præceptum habent*) Ratio est cur accipiant decimas, à Dei mandato. *Hoc est à*) Definitio quædam populi à fraterna illa conjunctione quam habent Leuitæ cum populo: quasi dicat, Leuitæ accipiunt decimas ab ijs qui sunt ex communi secum stirpe. *Licet egressis ex lumbis*) Amplificatio quædam est facti hujus populi, siue fratrum, ac si dicat: Licet egressi sint ex lumbis Abrahamæ, quemadmodum & ipsi Leuitæ, tamen persolunt ex præscripto Legis.

Dei Leuiticis sacerdotibus decimas, tanquam ipsis majoribus: Major enim cui persoluantur decimæ, quàm is qui persoluit eas. Nota Deum & ipsius verbum dispares efficere eos qui aliqui sunt pares. Quis te discernit, inquit Paulus? quid autem habes quod non acceperis? 1. Corinth. 4. 7. *Cuius genus*) hoc est, qui non est ex stirpe Leuitica. *Et habenti*) Secundum est excellentiæ Melchisedeci argumentum, à functione illa officij sacerdotalis, in benedicendo, de qua supra in descriptione. Factum autem hoc Melchisedeci in benedicendo exaggerat à conditione Abrahami. Is enim erat Abraham ad quem promissiones Dei pertinebant.

7 *Porrò sine*) Ex eo quòd Melchisedec benedixerit Abraham, concludit Melchisedecum Abrahamo excellentiorem, in hanc formam. Id quod minus est ab eo quod majus est benedicitur. At à Melchisedeco benedictus est Abraham. Ergo Melchisedec Abrahamo major est.

8 *Atque hic quidem*) Tertium argumentum excellentiæ Melchisedeci sacerdotis, ab ipsius æternitate. Illustratum autem est ex dissimili comparatione sacerdotum Leuiticorum, qui moriuntur omnes. Sacerdotum Leuiticorum hoc loco periphrasis quædam est, & descriptio, ex decimis quas accipiunt, vt & Melchisedeci ab acceptis decimis circumscriptio est.

est. *De quo testatum*) Probat eum in æternum vivere, ex testimonio Scripturæ, quæ nullum verbum habet de ejus morte. Genes. 14. Cùm igitur Scriptura silentio prætereat ejus mortē, idque dedita opera, ad hoc vt esset typus Christi, sequitur igitur eū vivere & manere in æternū, Nota discriminē inter Pontificē Leuitici ordinis, & Pontificem hujus ordinis in quo erat Melchisedec. Leuitici ordinis Pontifices, qui totidem erant typi venturi Christi, varij erant, alijque alijs tēpore succedebant. At verò hujus ordinis in quo erat Melchisedec, vnicus tantum numero fuit Pontifex. Vnicum autem oportuit esse, quia æternus fuit, nec initium dierum, nec vitæ finem habens.

9 *Et Vita*) Argumentum excellentiæ Melchisedeci quartum, ex eo quod non tantum ab Abrahamo decimas acceperit Melchisedec, sed etiam in Abrahamo ab ipso Leui, qui pater erat Leuiticorum omnium sacerdotum. Ex quo sequitur, Melchisedecum excellentem quendam fuisse virū, & sacerdotibus Leuiticis omnibus excellentiorem.

10 *Nam is adhuc*) Probat in Abrahamo decimatum esse Leui, ex eo quod Leuitum nondum genitus fuerit in lumbis Abrahamæ, quum Melchisedec decimas ab Abrahamo accepit, quo tempore Melchisedec Abrahamo redeunti à cæde Regum occurrit. Nota ex hoc, factum parentis pariter esse factum seminis

quod est in ipsius lumbis, tum cum ipse facit aliquid. Hoc modo factum Abrahami pariter fuit factum Levi nondum geniti, & Leviticorum omnium sacerdotum, qui cum Patre suo Levi pariter in lumbis erant Abrahamæ cum decimas dedit Melchisedeco, Hoc modo etiam primum illud Adami peccatum, fuit pariter nostrum omnium, qui tum in ejus lumbis fuimus quum ipse peccavit. Idem Apostolus Rom. 5. 12. in Adamo dicit nos omnes peccasse: peccatum autem Adami in nos derivatum est, & ratione naturæ corruptionis, & ratione reatus actualis ipsius peccati, & defectionis.

11 Porro si consummatio per Leviticum Sacerdotium erat (nam sub hoc sancita Lex est populo) quid amplius erat opus alium exoriri Sacerdotem secundum ordinem Melchisedec, nec secundum ordinem Aaronis dici?

12 Mutato enim Sacerdotio, necesse est ut Legis quoque mutatio fiat.

13 Nam is de quo hæc dicuntur, ad aliam tribum pertinet, de qua nullus attendit altari.

14 Palam est enim è tribu Iudæ exortum esse Dominum nostrum: cui tribui nihil de Sacerdotio loquutus est Moses.

15 Idque etiam magis patet ex eo quod ad instar Melchisedec exoritur Sacerdos alius:

16 Qui non ex Lege, cuius mandatum sit carnale, factus, est sacerdos, sed ex vi indissolubilis vite.

17 Testifica-

17 *Testificatur enim ad hunc modum, Tu es Sacerdos in æternum, secundum ordinem Melchisedec.*

18 *Nam mandatum præcedens abrogatur propter ipsius imbecillitatem & inutilitatem.*

19 *Nihil enim sanctificavit Lex: sed superintroducta spes melior, per quam appropinquamus Deo.*

Porrò si) Occupatio est: obijci enim potuit ab Hebræis siue Iudæis, ad ea quæ dicta sunt proximè de Melchisedeco, ejusque excellentia ac præstantia. Esto, sit Melchisedec, sit novus sacerdos, qui non est secundum ordinem Levi: sit quoque hæc quam dicis novi sacerdotis præstantia: Attamen per Leviticum sacerdotium fuit perfectio & sanctificatio. Respondet negativè: Non fuit per Leviticum sacerdotium perfectio siue sanctificatio. Obiectio simul & responsio negata ista suppressa est. Negatæ autem responsionis ratio in contextu est expressa. Si perfectio siue sanctificatio per Leviticum sacerdotium erat, quid amplius erat opus alium exoriri sacerdotem, secundum ordinem Melchisedech? &c. At alius exortus est sacerdos, qui est secundum ordinem Melchisedec (Christum intelligit, cujus typus erat Melchisedec, Ergo consummatio siue sanctificatio non erat per Leviticum sacerdotium. De negata hac conclusione lege cap. 10. vers. 1. Nota finem religionis siue cultus Dei à Deo præscripti esse, ut homo sit perfectus & con-

summatus. Hunc finem Scripturæ sacræ esse tradit Apostolus 2. Timoth. 3. 17. vt perfectus sit homo Dei, inquit, ad omne opus bonum perfectè instructus. Perfectionem istam pono in ijs benedictionibus Dei in Christo, quæ ad alteram vitam spectant, in vocatione efficaci, in justificatione, in sanctificatione. *Nam sub hac sancita*) Amplificatio est quædam ejus, quod dixit de consummatione quæ est per Leviticum sacerdotium, per occupationis quandam speciem inserta. Est autem amplificatio à Legge, siue ministerio Legali, quod sancitum est populo sub hoc sacerdotio Levitico. Ex quo videtur sequi consummationem esse oportere per Leviticum sacerdotium. Quid enim est quod sanctificat, si non ministerium hoc Legale? Notandum est hoc loco, neque sacerdotium illud Leviticum, neque Legem sub hoc sacerdotio sancitam populo (ceremonialem intelligo) ijs quidquam profuisse ad perfectionem siue sanctificationem, qui seorsim vmbra à corpore acceperunt. Nam hoc loco Apostolus typos illos Legales seorsim sumit à rebus ipsis quas figurabant, eosque etiam rebus figuratis opponit. Sic autem constituti, nullam vim habent ad hominem perficiendum siue sanctificandum. Typos autem sic accepit Apostolus ex hypothese & sensu Iudæorum, qui typos seorsim à rebus figuratis sumpserunt, & in vmbribus quasi religionem Deique cultum posuerunt.

12 *Mutato igitur*) Altera occupatio est. Est hoc (inquit Iudæus aliquis) mutatus sit sacerdos, & translatus è tribu vna in tribum alteram: at verò non inde sequitur legis quoque, hoc est, ministerij Legalis mutationem fieri. Annon enim (dixerit) sub nouo Sacerdote, qui sit ex altera tribu, potest manere vetus illud legis ministerium, & jam olim præscripta illa colendi Deum ratio? Respondet Apostolus, translato sacerdotio necessariò mutari quoque Legem, siue ministerium Legale totum.

13 *Nam is de quo*) Sequelam siue connexionem proximam confirmat: idque hoc argumento. Primùm à natura & conditione illius tribus ad quam translatum est sacerdotium. Is, inquit, de quo hæc dicuntur, hoc est, is qui factus est nouus sacerdos, per ea verba Dei Patris, quæ habentur Psal. 110. vers. 4. (Iurauit Iehouach. Tu es Sacerdos &c.) is, inquam, ad eam tribum pertinet, de qua nullus vnquam attendit altari, h. e. de qua nullus vnquam obiit aliquam partem ministerij Legalis, quod positum est in sacrificijs, alijsque id genus ceremonijs. Sequitur ergo, translato sacerdotio necessariò totius ministerij legalis mutationem fieri.

14 *Palame est*) Probatur antecedens enthymematis proximi. Nouus hic sacerdos, vt manifestò constat, exortus est è tribu Iuda. At tribus Iudæ respectu nihil de sacerdotio locutus est Moyses, hoc est (vt dixit suprà) de Tribu

Iuda nullus attendit altari, neque à Mose cuiquam ex hac tribu impositum est hoc munus sacerdotij. Ergo nouus hic sacerdos ad eam tribum pertinet de qua nullus attendit altari. Nota hîc Mosem in Lege sua nihil præcripsisse de hoc sacerdotio quod est secundum ordinem Melchisedeci. Tradidit multa (fateor) de ordine sacerdotij Aaronici: at huius ordinis non meminit, neque eius leges præscripsit. De hoc autem ordine habes Psalmo 110. Tradit Moses (fateor) historiam Melchisedeci. Genes. 14. 18. 19. 20. Quo loco cum ex effectis sacerdotem fuisse ostendit, verum de hoc sacerdotij ordine nullas leges præscripsit, id quod fecit de ordine sacerdotij Aaronici.

15 *Idque etiam magis*) Secundum argumentum quo probat sequelam illam; Quod mutato sacerdotio necesse sit legis quoq; mutationem fieri. Hoc argumentum sumptum est à natura & conditione ordinis illius ex quo est hic nouus sacerdos, nempe Christus. Hic sacerdos est ex ordine Melchisedeci exortus, non ex lege factus sacerdos, sed ex vi indissolubilis vitæ. Ergo mutato sacerdotio necesse est ut Legis quoq; mutatio fiat: quid enim huic sacerdoti, qui non est ex lege factus, cum ministerio illo legali? Nota rursus nullam esse legem Moisaicam de hoc sacerdote, qui est secundum ordinem Melchisedec. *Cuius mandatum*) Legis quædam descriptio est, qua arguit ex lege non factum

factum fuisse eum Sacerdotem : Legis enim mandatum est carnale , h. e. de rebus caducis & evanidis, quæ carnis nomine in Scripturis significantur. *Sed ex vi*) Legi opponit vim indissolubilis vitæ, tanquam veram causam qua factus est hîc sacerdos: Per vim autem indissolubilis vitæ, intelligit efficaciam illam verbi, & iurisiurandi Dei, quæ est ad vitam quæ nunquam dissolvitur, hoc est, ad durationem sempiternam. Ex hac enim vi durat Pontificatus Christi in æternum.

17 *Testificatur enim ad hunc*) Probat veram hanc causam sacerdotij Christi, siue Christum factum esse sacerdotem ex vi indissolubilis vitæ, à testimonio ipsius Dei in Scripturis, in quibus Pater sic Filium suum alloquitur : Tu es Sacerdos in æternum secundum ordinem Melchisedec. Atque hæc verba Patris ad Filium, habent vim indissolubilis vitæ. Ergo factus est sacerdos ex vi indissolubilis vitæ. Vide Psal. 110.

18 *Nam mandatum*) Hactenus primum fuit argumentum, quo probata est Legis siue Ministerij legalis mutatio : Sumptum fuit à translatione sacerdotij : In eo immoratus est ad hunc usque versum. Hîc igitur habemus secundum eiusdem rei argumentum, sumptum à ministerij Legalis inefficacitate, siue impotentia & inutilitate. Ministerium illud Legale nullis viribus præditum est, & inutile est, nem-

pè ad sanctificationem. Ergo abrogatur.

19 *Nihil enim*) Ratio cur nullis sit viribus præditum & inutile mandatum, ab effectu sanctificationis siue perfectionis. Nihil sanctificauit Lex. Ergo nullis viribus prædita, & inutilis est. Quòd si enim vis & utilitas Legis fuisset aliqua profectò fuisset ea ad sanctificationem. *sed adscita*) E diuerso veram sanctificationis causam subiicit, quam vocat introductionē spei melioris. Hoc nomine spei melioris intelligit Euangelium Christi, quod Legi successit & in eius locum introductum est. Ab effectu autem suo sic vocat Euangelium: nam Euangelium spem gignit meliorem. *Per quam*) Descriptio quædam huius spei ab effectu suo, per eam enim appropinquamus Deo, diruta quasi iam maceria Legis, & ceremoniarum, quæ nostrum ad Deum aditum quasi intercluserunt, obfueruntque quò minus ad eum appropinquaremus. Eph. 2. 16. Col. 2. 14.

20 *Et quatenus non absque iureiurando superinducta est.*

21 *Nam illi quidem, citra iusiurandum sacerdotes facti sunt: hic verò cum iureiurando per eum qui dixit ei, iurauit Dominus, & non pœnitebit eum Tu es Sacerdos in æternum secundum ordinem Melchisedec.*

22 *Tanto potioris fœderis sponsor factus est Iesus.*

23 *Et illi quidem plures facti sunt sacerdotes, quod*

quod mors prohiberet eos permanere:

24 *At iste propterea quod in aeternum manet, perpetuum habet Sacerdotium.*

25 *Vnde & servare prorsus potest eos qui per ipsum accedunt ad Deum, semper vivens, ut interpellet pro eis.*

26 *Talis enim nos decebat Pontifex sanctus, innocens, impollutus, segregatus à peccatoribus, & sublimior cælis factus.*

27 *Cui non sit quotidie necesse, quemadmodum illis pontificibus, prius pro peccatis proprijs victimas offerre, deinde pro peccatis populi: hoc enim fecit semel quum semetipsum obtulit.*

28 *Lex enim homines constituit Pontifices infirmos: ac sermo iurisiurandi post Legem concepti, Filium constituit qui in aeternum est sanctificatus.*

Et quatenus non) Haftenus hoc capite, de Melchisedeco Christi typo, & eius descriptione primùm, deinde præstantia, de sacerdotio legali quod abolitum sit: de Lege ipsa, totoque legali ministerio, quòd sit abrogata. Nunc agitur de Christo ipso, cuius typus erat Melchisedec: eiusque præstantia & excellentia per comparisonem cum Leviticis sacerdotibus ostenditur. Propositio igitur ostendenda est ista, Iesus Christus præstantior Sacerdos est, quàm fuerunt sacerdotes Levitici. Argumentum primum sumptum est à præstantia foederis illius, cuius est sponsor Iesus, in hanc formam. Iesus

factus est potioris fœderis sponsor. Ergo præstantior est sacerdotibus Leuiticis. Enthymematis hujus antecedens habetur vers. 22. Consequens autem subticetur hoc loco, & intelligendum relinquitur: Enthymematis autem antecedens sic probat. Factus est Iesus Sacerdos non absque iurejurando. Ergo factus est sponsor potioris fœderis. Enthymematis hujus antecedens habetur versu 20. Consequens autem versu 22. Sequela sic patet. Qui factus est Sacerdos, non simplici nudoque verbo, sed adhibito iurejurando, necesse est is respectu potioris præstantiorisque fœderis factus sit Sacerdos. Nam ubi Sacerdos, ibi fœdus cujus fœderis sponsor est Sacerdos. Sponsor fœderis vocatur Iesus, quia spondendo pro nobis, & satisfaciendo sanguine suo pro peccatis nostris, effecit ut nos in gratiam rediremus cum Deo Patre, procurauitque nobis nouum fœdus, quod gratiæ vocant. Duo enim sponsori Christo facienda erant. Primum oportuit eum in se transferre debitum nostrum, pro eoque iustitiæ Patris satisfacere. Deinde oportuit eum procurare atque promereri nobis nouam gratiam, hoc est, fœdus nouum, quo futurum erat ut denuò Dei amici & quasi confœderati euaderemus. vtrumq; hoc præstitit Christus sponsor per sacrificium & crucem suam.

21 *Nam illi*) Ostendit quod dixit proximè, ex dissimili comparatione Christi Sacerdotis & sa-

& sacerdotum Leviticorum: illi quidem citra iusiurandum sacerdotes facti sunt, hic verò cū iurejurando. Protasis vera esse conspicitur ex libris Moſis, vbi agitur de ordinatione Aaronis, & aliorum sacerdotum Leviticorum, in quibus nihil legitur de iurejurando in ijs ordinandis adhibito: Quare nullum fuit. *Per eum qui)* Apodofin probat adducto in medium Scripturæ testimonio illo quod habetur Pſal. 110. 4.

23 *Et illi)* Secundum argumentum præſtantiæ ſacerdotis Chriſti, à perpetuitate ſacerdotii Chriſti, quæ comparatè tractatur hoc modo. Levitici facti ſunt ſacerdotes plures, hoc eſt, non perpetui, ſed alij alijs ſuccedentes. At iſte perpetuum habet Sacerdotium. Ergo hic illis præſtantiſſimus. *Quod mors)* Ratio eſt cur Levitici Sacerdotes plures ſint facti, à morte qua impedita eſt perpetuitas in ſacerdotio. Loquitur Apoſtolus de ſummis ſacerdotibus, ſive Pontificibus, non autem de vulgo ſacerdotum Leviticorum. In genere autem ſummarum ſacerdotum vnus tantum erat vno tempore, non plures, ex præſcripto Legis diuinæ: Quamobrem pluralitas hoc loco ſucceſſiua intelligenda eſt.

24 *At iſte propterea)* Ratio eſt cur perpetuum ſit ſacerdotium Chriſti, ab ipſius æternitate, ſive duratione æterna: Manet in æternum. Ergo perpetuum habet ſacerdotium, non ſuc-

cessium, quale habuerunt summi sacerdotes Leuitici, qui morti fuerunt obnoxij. Nota igitur, Christum nullum habere in terris successorem in sacerdotio suo; neque debere hoc nomen usurpari in Ecclesia Christiana post Christum, qui sacerdotali muneri, quod positum erat in victimis & sacrificijs offerendis, finem imposuit. Sumus quidem nos omnes quicumque in nomine Christi baptizati sumus, certo quodam modo sacerdotes, vt & Reges, & Prophetæ: vnde Petrus regale sacerdotium nos vocat. 1. Epist. 2. 9. verum post Christum nullum est istiusmodi in Ecclesia speciale aliquod munus & officium.

25 *Vnde & seruare*) Tertium est argumentum præstantiæ Christi, quod consequens est & effectum æternæ illius ipsius vitæ & durationis, cuius meminit proximè: Sacerdos Christus prorsus, & (vt sic dicam) finaliter potest eos seruare qui per ipsum accedunt ad Deum, nempe per fidem. At Leuitici sacerdotes id non potuerunt. Ergo hic ijs præstantior est. *Semper viuens*) Ratio est cur prorsus seruet, *Quia semper viuit. Vt interpellet*) Ratio est sequentiæ, quia viuendo interpellat & intercedit apud Deum pro fidelibus. Sequitur ergo, quod si semper viuat, prorsus & perfectè seruet credentes: Non enim in cœlis otiosus & inefficax est, verum munus Pontificis exerceet, interpellando siue intercedendo odore illo sacrificij

ciij ipsius perpetuo. Vnde 1. Ioan. 2. 1. postquam eum aduocatum nostrum vocauit, continuo addidit, ipsum propitiationem esse pro peccatis nostris, hoc est, sacrificium propitiatorium. Sequitur ergo eum intercedere etiam in coelis, virtute perpetua sacrificij illius propitiatorij, quod semel est oblatum in terris.

26 *Talis enim*) Argumentum quartum praestantiae Christi, à qualitate ipsius, quam explicat varijs, ijsque eximijs particularibus qualitatibus & conditionibus inductis, quibus omnibus differt à Leviticis Pontificibus. Pontifex est pius, innocens, impollutus &c. Ex his quae inductae sunt qualitatibus, quaedam ad personam pertinent, nimirum quae hoc versu continentur, quaedam verò ad officium, nimirum quae habentur versu sequenti. Primum hoc loco propositio quaedam est in genere qualitatis quae requirebatur in Pontifice nostro. *Talis*, inquit, nos decebat Pontifex, hoc est, haec qualitas & conditio in Pontifice nostro requirebatur. Deinde sequitur explicatio generalis propositionis siue qualitatis illius quae in genere proposita est. *Pius*) Prima qualitas, quae respicit Deum. *Innocens*) Secunda quae respicit proximum. *Impollutus*) Tertia quae respicit ipsius personam. Nam quo ad personam sine macula, & labe est. *Segregatus*) Quarta quae eadem videtur esse cum superioribus, nisi quod comparatè proposita sit, facta ni-

mirum cum peccatoribus comparatione. Nam cum segregatum dicit à peccatoribus, sensus est ac si dixisset, non talem eum esse quales sunt peccatores, hoc est, impollutum & immundum. *Sublimior cælis*) Quinta est qualitas, quæ & ipsa quoque respicit personam, est enim personæ dignitas, excellentia, & sublimitas, quæ comparatione cælorum ipsorum explicatur.

27 *Cui non sit*) Sexta conditio siue qualitas, non est ei imposita necessitas offerendi quotidie: hæc qualitas ad officium & munus sacerdotij pertinet. *Quemadmodum illis*) hoc est, quemadmodum necesse fuit Pōtificibus, quos ex lege oportuit quotidie offerre sacrificia. In hac conditione siue qualitate expressè cōparatus est cum Leuiticis sacerdotibus, idq; indissimili in superioribus non nisi intellectu. *Prius pro peccatis*) Septima est conditio: non necesse habet ut prius offerat victimas pro peccatis suis, deinde pro peccatis populi. Et in hac quoque cōparatur cum Leuiticis Pontificibus expressè. Nam Leuiticos Pontifices oportuit prius pro peccatis suis, deinde pro peccatis populi, victimas offerre. In summa itaque argumentatio est. Pontifex noster pius est, innocens &c. At tales non fuerunt pontifices Leuitici: Ergo hic noster illis præstātor est Pontifex. *Id enim*) Ratio cur non necesse sit ut quotidie offerat Christus: Semel id fecit, h. e. semel obtulit: Ergo non

go non est necesse quotidie id faciat. *Cum semet-
ipsum*) Ratio est vt videtur sequelæ , Quia se-
mel id fecit cū semetipsū obtulit : vnde sequi-
tur non necesse esse vt quotidie id faciat, quum
semetipsum quotidie offerre non possit. Chri-
stus enim sæpius mori non potest. Rom. 6. 10.
Nam quod mortuus est peccato , mortuus est
semel. quod autem viuit, viuit Deo.

28 *Lex enim*) Hæc ratio est cur non sit ne-
cesse Christum pro peccatis proprijs prius vi-
ctimas offerre , deinde pro peccatis populi.
Sumpta est à natura & conditione ipsius. Fi-
lius est in æternum sanctificatus , hoc est , non
est infirmus aut peccator. Vnde non necesse
habuit , vt prius pro peccatis proprijs offerret
victimas: illustratur hæc Christi conditio, à dis-
simili Pontificum Leuiticorum conditione,
qui infirmi & peccatores erant. Notandum
quod non dicat simpliciter Pontifices Leuiti-
cos infirmos fuisse, verum dicat legem consti-
tuisse homines Pontifices infirmos : neque di-
cat simpliciter Christum fuisse in æternum
sanctificatum , sed dicat , Legem iurisiurandi
constituisse filium qui in æternum est sanctifi-
catus: qua quidem re innuit , non tantum dissi-
miles esse Pontifices illos Leuiticos & Chri-
stum, in natura & conditione sua , sed etiam in
ratione vocationis : Nam Leuitici Pontifices
vocati sunt per legem, Christus autem vocatus
est per sermonem iurisiurandi, quæ vocationis

ratio dignior & præstantior est.

Argumentum Capitis octavi.

Hoc capite comprehēsa sunt præsentis instituti, hoc est, præstantiæ Christi Pontificis, duo argumenta. Primum à versu 1. ad versum 6. Secundum à versu 6. ad finem vsque.

CAPVT. VIII.

1 *Ceterum eorum quæ dicimus hæc summa est, Talem nos habere Pontificem qui consedit ad dextram throni maiestatis illius in cælis.*

2 *Sanctuarij minister, ac veri illius tabernaculi quod fixit Dominus & non homo.*

3 *Omnis enim Pontifex ad offerenda dona & victimas constituitur: vnde necesse fuit hunc quoque habere quod offerret.*

4 *Nam si esset in terra, ne Sacerdos quidem esset, manentibus illis sacerdotibus qui secundum legem offerunt dona.*

5 *Vt qui exemplari & vmbra deseruiunt rerum cælestium, sicut diuinitus dictum est Moysi quum esset absoluturus tabernaculum, Vide enim, inquit, vt facias omnia ad exemplar quod ostensum est tibi in monte.*

Ceterum eorum) Principio hujus capitis est argumentū præstantiæ Christi Pontificis quintum, sumptum etiam ab ipsius qualitate. Argumento præmissa est præfatiuncula, qua ipsū cōmendatur nobis tanquā κεφαλὴν quoddam, hoc est, argumentum princeps ac primarium.

rium. *Talem nos habere*) Generalis quædam propositio est qualitatis Pontificis Christi, ut capite superiori, vers. 26. *Qui consedit*) Explicatio est qualitatis Christi in genere propositæ, per inductionem siue enumerationem partium aliquot ipsius. Prima est, quod sedet ad dexteram Dei. Non dicit dexteram Dei, verum dexteram Throni maiestatis illius. His omnibus verbis amplificat sessionem illam Christi. Vide Heb. 1. 3. Sessio quidem hæc Pontificis est, sed regalis, nam sacerdotium Christi regale est, ut eorum qui in Christo sunt. 1. Pet. 2. 9.

2. *Sanctuarij minister*) Secunda Christi Pontificis qualitas siue conditio, Minister est Sanctuarij, hoc est, cœli altissimi, cuius typus erat sanctum sanctorum, quod ministrum habebat Pontificem Leviticum, Hebr. 9. 12. Per proprium sanguinem ingressus est semel in sacrarium: ut enim Pontifex typicus minister fuit sacrarij, siue sanctuarij terreni: ita Pontifex Christus minister est sanctuarij cœlestis. *Ac veri illius*) Tertia qualitas Christi: Minister est non quidem typici & umbratilis, sed veri Tabernaculi. Nam verum hoc loco umbratili & typico opponitur. Tabernaculi nomine intelligit corporis sui Tabernaculum, cuius minister fuit Christus in eo Patri offerendo pro peccatis nostris. Ministerium hoc Tabernaculi, hoc est, corporis sui, sequitur ministerium Sanctuarij, & cum eo coniunctum est necessariò:

Nam non potest Christus minister esse sanctuarij celestis, nisi minister pariter sit corporis sui tanquam sacrificij. Non enim erat vetus ac typicus Pontifex minister sanctuarij terrestri, nisi qua ratione fuerat simul minister sacrificij. Ergo non potest Christus minister esse celestis sanctuarij, nisi idem sit minister alicuius sacrificij, hoc est, corporis sui: *Quod fixit Dominus*) Descriptio quædam est veri Tabernaculi. Est enim Tabernaculum fixum, non ab homine, hoc est, non operatione hominis, sed à Domino, hoc est, arcana & secreta Spiritus sancti operatione. Nam Christus conceptus est ex Spiritu sancto. Eodem sensu dicitur Tabernaculum non manufactum, id est, Tabernaculum non huius structuræ. cap. 9. v. 11.

3 *Omnis enim Pontifex*) Explicatio quædam est qualitatis proximæ de ministerio Tabernaculi corporis Christi. Docet autem necesse fuisse ut ipse haberet quod offerret. Argumentum est à genere ipso, & ab officio & munere Pontificis in genere. Omnis Pontifex ad offerenda dona & victimas constituitur, Ergo necesse fuit hunc quoque habere aliquid quod offerret. Habere autem non potuit aliquid, nisi corpus suum. Ergo necessariò fuit minister Tabernaculi corporis sui ipsius. Quòd autem necesse fuit ut haberet Tabernaculum corporis sui quod offerret, ex eo apparet, quod
cùm

cum Pontifex sit, non typicus, quales erant illi veteres Levitici, sed verus, oporteat eum habere sacrificia quæ offerret, non typica, h. e. victimas, verum corpus suum ipsum, quod illis omnibus typicis est adumbratum.

4 *Nam si esset*) Explicat quod dixit de sessione illius ad dexteram Dei, docetque necessarium eum confidere in cœlis ad dexteram Dei, hoc argumento. Si esset in terra ne sacerdos quidem esset, hoc est, si ei permanendum esset ac viuendum in terris his, non posset esse sacerdos, quod absurdum est. Ergo non absredixi, eum confedisse ad dexteram Dei. *Manentibus*) Probat connexionem proximè præcedentem, nempe quod si esset in terra, non posset sacerdos esse. Si esset in terra, manerent adhuc sacerdotes Levitici, manentibus autem sacerdotibus Leviticis ne sacerdos quidem esset Christus. Ergo si esset in terra ne sacerdos quidem esset.

5 *Vt qui exemplari*) Probat assumptionem proximi syllogismi: nempe, quod si manerent sacerdotes Levitici, ne sacerdos quidem esset Christus, ex eo quod Levitici sacerdotes exemplaria quædam sunt & vmbre, rerum cœlestium, facti nimirum ad imaginem & similitudinem rerum cœlestium. Argumentatio est: Levitici sacerdotes sunt exemplaria & vmbre rerum cœlestium. Ergo manentibus ijs non esset sacerdos Christus. Sequela nititur pro-

positioni quæ intelligitur : nempe non vnâ eodémque in loco consistere res cœlestes cum vmbra sua. Deseruere exemplari & vmbra nihil aliud esse videtur, quàm exemplar & vmbra esse. Exemplar hoc loco est subindicatio quædã in græco est *ὑπόδειγμα*, non *τυπὸς*. *Sicut diuinitus*) Ratio est, cur Leuitici sacerdotes exemplaria sint & vmbra rerum cœlestium, ab oraculo siue testimonio Dei quod habetur Exod. 25. 40. Est autem de Tabernaculo eiusque structura. Hoc autem oraculo mandat Deus Mosi, vt faciat omnia ad typum & exemplar, quod ostensum est ei in monte. Ergo voluit Deus Tabernaculum efformari ad typum qui in monte ostensus est : ac proinde hypodigma esse & vmbra rei cœlestis, ac spiritualis, hoc est, typi illius qui ostensus est in monte. Hoc mandatum speciale de Tabernaculo Apostolus in genere intelligi vult de ijs omnibus qui sub lege erant, & ad genus ipsum accommodari. Vnde hoc Dei oraculum siue mandatum de Tabernaculo accommodat ad Leuiticos sacerdotes hoc loco, ex eoque probat eos exemplaria & vmbra esse rerum cœlestium. Atque hæc de argumento quinto præstantiæ Christi. Altera autem comparationis dissimilis pars, de Leuiticis sacerdotibus, suppressa est : quæ sic suppleri potest. At non erant tales Leuitici, nempe qualis hic Pontifex noster. Ergo hic iis præstantior est.

6 At nunc noster ille Pontifex eo excellen-
tius ministerium sortitus est, quo præstantioris est
fæderis intercessor quod præstantioribus promissis
sancitum est,

7 Nam si prius illud tale fuisset ut nihil in eo
posset requiri, haudquaquam fuisset secundo qua-
situs locus.

8 Nam incusans eos, inquit, Ecce, dies venient,
dicit Dominus, quam pangam cum domo Israel &
cum domo Iuda fædus novum.

6 Non secundum fædus quod feci cum pa-
tribus ipsorum, quo die prebendi manum ipsorum
ut educerem eos ex Ægypto: nam ipsi non persti-
terunt in illo meo fædere, & ego despecti eos, dicit
Dominus.

10 Quamobrem hoc est fædus quod paciscar
domui Israel post dies illos, dicit Dominus: Indans
Leges meas mentium eorum, & cordi eorum inscri-
bam: & ero ipsis Deus, & ipsi erunt mihi populus.

11 Neque docebunt singuli proximum suum,
& singuli fratrem suum, dicentes, Cognosce Do-
minum, nam omnes cognoscent me, ab eo qui pusil-
lus fuerit inter eos, ad eum usque qui magnus fue-
rit inter eos.

12 Ero enim propitijs iniquitatibus eorum &
peccatis eorum: & iniquitatum ipsorum non recor-
dabor amplius.

13 Dum novum dicit antiquavit prius: porro
quod antiquatur ac senescit propè est ut evanescat.

At nunc noster) Argumentum præstantiæ sa-

cerdotis Christi sextum, idem re cum primo,
 quod fuit capite superiori. vers. 20. & deinceps.
 Sumptum est à præstantia fœderis in hanc for-
 mam. Præstantioris est fœderis intercessor:
 Ergo ministerium eius excellentius est, siue
 præstantior est Sacerdos. Primo loco est con-
 sequens, secundo antecedens. *Quod præstantiori-*
bus) Ratio præstantiæ fœderis à promissioni-
 bus, quibus ipsum constat, h. e. ab ipsa fœderis
 materia. De his promissionibus præstantioribus
 videbimus postea, in allato (quod sequitur) Je-
 remiæ testimonio. Hic observa mentionē fieri
 duorū fœderum: veteris & noui. Veteris fœ-
 deris nomine, non fœdus legale tantum, quod
 conditionē habuit operum legalium, neq; gra-
 tuitum tantum, quod cum fœdere legali obscu-
 rè propositum fuit, verum nomine veteris fœ-
 deris intelligo vtrumq; & legale, & gratuitum;
 Legale cuius expressa mentio facta est: Gratui-
 tū cuius non nisi obscure meminit vetus Scri-
 ptura. Quod autem veteris fœderis nomine v-
 trūq; & legale, & gratuitum, accipiendum sit,
 vel ex eo apparet, quod hoc loco veteri fœderi
 tribuat intercessores, h. e. Leuiticos sacerdotes,
 qui totidem Christi fuerunt typi. Intercessor
 autem propriè est gratuiti fœderis. Est quidem
 etiam fœderis legalis: quia in repetendo fœde-
 re legali inimicitia erant inter Deum & popu-
 lum: vbi autem inimicitia ibi intercessione o-
 pus est. Atque ideò Galat. 3. 19. dicitur lex
 data

data esse per manum *μεσίτης*, Mediatoris, nempe Moſis. Hoc autem loco, quod dicitur ſancitū eſſe nouum fœdus præſtantioribus promiſſis, habetur ratio potiffimum veteris fœderis, quæ legale eſt. Nam præſtantes ſunt promiſſiones fœderis gratuiti, quàm ſunt Legales.

7 *Nam ſi prius*) Occupatio. At vetus fœdus tale fuit, vt nihil in eo poſſet requiri. Reſpondet, ſi tale fuiſſet vt nihil in eo poſſet requiri, haud quaquam fuiſſet ſecundo quaſitus locus. Similis occupatio fuit cap. 7. verſ. 11.

8 *Nam inculſans*) Aſſumptionis intellectus ratio eſt à teſtimonio Prophetæ, vel Dei poſitiuſ. Ierem. 31. 31. & deinceps: quo quidem probat ſecundo fœderi quaſitum eſſe locum. Teſtimonium hoc Prophetæ continet promiſſionem noui fœderis conjunctam cum accuſatione populi ob violatum fœdus illud vetus, ideò ait, inculſans eos. *Ecce dies*) Propoſitio eſt noui fœderis pangendi: ſiue præfatio eſt, in qua proponit Dominus, ſe nouum fœdus cum populo ſuo iſturum.

9 *Non ſecundum*) Illuſtrat quod dixit de nouo fœdere pangendo, à diuerſitate ſiue diſſimilitudine veteris fœderis, cuius hîc deſcriptio quædam habetur, petita ab ijs quibuſcum iſtū eſt, à patribus nempe; deindè à tempore quo iſtum eſt, nempe quo die prehendi &c. Loquitur itaque de fœdere eo quod iſtum eſt cum populo, ex monte Sina per Moſen, inter

Deum & populum, Mediatorem. Fuit quidem illud fœdus legale, sed non sine obscura aliqua significatione fœderis gratuiti. *Nam ipsi non*) Ratio dissimilitudinis siue diuersitatis proximæ, à facto, partim populi, partim Dei, Factum populi est violatio veteris fœderis: factum Dei est reiectio Dei, qua populum suum despexit.

10 *Quamobrem hoc est*) Hactenus præfatio fuit, qua præparatus est populus ad accipiendum & audiendum promissionem novi fœderis. Priusquàm autem verba ipsa promissionis subiiciat, rursus præfatiunculâ quadam populum suum præparat, & attentionem captat. *Indam leges meas*) Sequitur ipsum nouum fœdus quod promittit. Est autem his verbis prima in nouo fœdere promissio. Promissio autem est Regenerationis, quæ reipsa nihil aliud est quàm legis Dei inscriptio, in mente primum, deinde in corde. Inscríbitor autem Lex Dei in mente, quum mens renouatur ad imaginem Dei, quæ est in sapientia & cognitione. Vide Coloss. 3. 10. Inscríbitor autem Lex Dei cordi, quum ipsum renouatur ad imaginem Dei, secundum iustitiam & sanctimoniam veram. Eph. 4. 24. Non est quòd hîc colligant Aduersarij diferimen & differentiam Legis & Euangelij. Quasi verò lex inscribatur tabulis, vel lapideis, vel chartaceis: Euangelium verò tabulis cordis carnis: quum hîc sermo sit de ipsa Lege, siue Decalogo, quem prædicat Prophe-

ta inscribendum demum cordi, quum prius inscriptus fuerit tabulis lapideis. Vide similem locum. 2. Corinth. 3. 1. & deinceps. *Et ero ipse Deus*) Secunda promissio est in nouo fœdere pangendo: promittit (vt sic dicam) confœderationem, qua fiet, vt ipse sit Deus eorum, ij verò sint populus eius: hæc enim confœderatio est inter Deum & hominem virtute fœderis, alter alterius est quasi possessio quædam: Deus est hominis possessio quædam, & homo rursus Dei: verum hoc discrimine: homo possidet Deum, vt aliquid se superius & excellentius, Deus autem hominem, vt aliquid inferius & ipsi subseruiens, hoc enim populi nomen significat. Talis itaque est confœderatio inter Deum & populum suum, qualis est inter Principem & subditos, Dominum & seruos.

II *Neque docebunt*) Tertia promissio: Erunt omnes Θεοδιδασκτοὶ, docti à Deo, vide Ioan. 6. 45. Sic tractatur. Primum negat docendos homines aliorum hominum opera: deindè reddit eius rationem, ab extraordinaria scientia & cognitione Dei, qua omnes sunt imbuendi sine discrimine, pusilli æquè atque magni, hoc est, omnes erunt Θεοδιδασκτοὶ, ac proindè non opus erit doctoribus hominibus. Quod quidem non est accipiendum absolutè & simplicitè, quasi in Ecclesia Christi nulli futuri sint homines qui sunt docturi & adducturi alios ad cognitionem Dei in Christo. Nam Christus

postquam ascendit in cœlos, dedit alios quidē Apostolos, alios verò Prophetas, alios autem Evangelistas, alios autem Pastores & Doctores. Eph. 4. 11. verum accipiendū est cōparatē, facta nimirū cū veteri illa Ecclesia cōparatione quæ magna ex parte habebat homines Doctores, quia ante Christi exhibitionem, & in cœlos ascensionem, minor erat in hominibus Spiritus sancti efficacia: Nondum erat Spiritus sanctus, quia Iesus nōdum erat glorificatus. Ioan. 7. 29. De complemento hujus promissionis, lege. 1. Thes. 4. 9. Ipsi namq; diuinitus docti estis vt diligatis alij alios. & 1. Ioan. 2. 20. At vos vñctionem habetis à Sancto illo profectā, & notis omnia. & v. 27 Sed vñctio quam vos accepistis à Deo, manet in vobis, nec necesse habetis vt quisquam doceat vos &c.

12 *Ero enim propitius*) Quarta promissio, nempe remissionis peccatorum.

13 *Dum nouum dicit*) Hoc consecrarium est quod infert Author ex verbis Prophetæ, nempe ijs quæ habentur versu 8. (*Et cum domo Iuda fœdus nouum.*) Ex eo enim quod Propheta fœdus nouum dixerit fœdus hoc posterius, infert fœdus illud prius eadem opera antiquatum fuisse, ac consensuisse. Ex quo rursus infert & alterum consecrarium. Quod si antiquatum fuit ac consensuit, sequitur tum propè fuisse vt euanesceret. quod enim antiquatur ac senescit vergit ad interitum.

Argu-

Argumentum Capitis noni.

Hoc capite habemus primum argumentum præstantiæ Christi Pontificis septimum. à pluribus Christi prærogariis sumptum, ad versum vsque 13. Quo loco digressio est ad versum vsque 24. Vbi redit ad argumentum institutum, & illas Christi prærogatiuas, quas ad finem capitis persequitur.

C A P V T I X.

1 Habuit igitur prius scædus etiam constitutos religionis ritus, & sanctuarium mundanum.

2 Tabernaculum enim constructum fuit: prius quidem in quo erant candelabrum, & mensæ: & propositi panes, quod Sancta vocant.

3 Post medium autem velum erat Tabernaculum quod vocant Sancta sanctorum:

4 Aureum habens thuribulum, & Arcam fæderis undique circumtectam auro: in qua Urna aurea habens manna, & Virga Aaron quæ genuerunt, & Tabula fæderis:

5 Supra hanc autem Cherubin gloriosi obumbrantes propitiatorium: de quibus non est nunc dicendum singulatim.

6 His verò ita ordinatis, in prius quidem Tabernaculum quouis tempore ingrediuntur Sacerdotes ritus obeuntes.

7 In secundum autem, semel quotannis solus Pontifex, non sine sanguine, quem offert pro seipso & pro populi erratis.

8 Hoc declarante spiritu sancto, nondum pate-

factam fuisse viam ad Sacrarium, priore Tabernaculo adhuc consistente.

9 Quod erat exemplar pro tempore illo praesenti, quo dona sacrificiaque offeruntur, quae non possunt conscientia sanctificare cultorem.

10 In cibis duntaxat & potionibus, & diversis ablutionibus ac ritibus carnalibus, usque ad tempus correctionis imposita.

11 Adueniens autem Christus Pontifex futurorum bonorum, per maius & perfectius Tabernaculum, non manu factum, id est, non huius structurae.

12 Neque per sanguinem hircorum & vitulorum sed per proprium sanguinem ingressus est semel in sacrarium, aeternam redemptionem nactus.

Habuit igitur) Transit hoc loco ad Argumentum praestantiae Christi septimum. Agit itaque de foedere illo priore ac vetere: ac primum ipsum describit ex adiunctis duobus: priori, constitutis religionis ritibus, hoc est, constitutionibus de ritibus & ceremoniis: posteriori, loco ubi illi ritus peragi solebant, nempe in Sanctuario: quod mundanum ideò vocat, ut distinguat à coelesti illo in quod ingressus est Christus: mundanum est terrestre & caducum.

2 Tabernaculum) Καὶ τὸ ὕψιστον duo illa foederis siue Tabernaculi adiuncta explicat. Primum itaque de Tabernaculo agit *Σκηνὴν* quam praecedenti versu *ἀγίων* vocauit. Tabernaculi est obscura quaedam distributio in prius & posterius.

sterius. Prius describitur hoc versu, primum ex instrumentis sacris, deinde ex rebus sacris, tertio ex nomine suo. *Lucerna*) Primum instrumentum Lucerna, *λυχνία* siue *λυχνέχος* fuit qui ad latus Sancti Meridionale collocatus est. *Mensa*) Secundum instrumentum Mensa, quæ ad latus Sancti Septentrionale collocata erat. *Et propositi panes*) Hæc res sacra est quæ mensæ erat imposita, videlicet, panes proposititij, qui quidem panes dispositi fuerunt seni, duobus ordinibus. *Leuit. 14.6.* *Quod sancta*) Hoc nomen est prioris Tabernaculi partis.

3 *Post medium*) Periphrasis quædam posterioris Tabernaculi, Dixisset enim, Posterius verò Tebernaculum erat quod vocant, &c. verum pro eo dixit post medium velum erat Tabernaculum quod vocant, &c. ponens pro Tabernaculo posteriori Tabernaculum situm post medium velum. Medium dicit velum respectu primi, quo sanctum distinguebatur ab atrio populi. Vide *Exod. 26.33.36.* Describitur Tabernaculum posterius, primum à nomine suo, vocant enim illud Sancta sanctorum.

4 *Aureum habens*) Secunda pars descriptionis, ab instrumentis sacris duobus, quorum primum erat thuribulum, altare suffitus, quod extra velum coram arca positum fuisse videtur. *Exod. 30.6.* & deinceps. Nam illic expresse dicitur thymaterium ponendum esse ante velum: deinde præcipitur ut quotidie suffitus

adoleatur, id quod fieri non potuisset si intra velum fuisset collocatum, quippe intra quod semel tantum in anno ingredilicebat. *Et arcam*) Hoc secundum est instrumentum sacrum quod rursus describitur, primum ex ornatu suo, tectorio aureo : deinde ex rebus sacris, quæ in arca erant, vna aurea habente manna, virga Aaronis quæ germinavit, & tabulis fœderis, è quibus tabulæ fœderis, propriè loquendo, in arca seu intra arcam reconditæ fuerunt: Virga autem Aaronis, itemque manna in vna reconditum coram arca, reposita fuerunt, ut liquet ex 1. Reg. 8. 9. Exod. 1. 6. 34. 35. Numeri 17. 25.

5 *Supra hanc autem*) Descripta jam est arca ab ijs quæ dicta sunt fuisse in ipsa arca nempe vna &c. Nunc describitur ab ijs quæ dicuntur fuisse supra arcam, nempe Cherubinis qui operculo arcae in duabus oris è regione insistentes, alis ad se inuicem conuersis operculum obumbrabant, inter quas alas gloria Iehouæ, id est, Iehouah gloriosus residebat, & consulentibus responsa dabat. Vide Exod. 25. 18. & deinceps 2. Reg. 6. 27. *Gloriosi*) Descriptio est Cherubinatorum. primum ab adjuncta gloria, deinde ab officio: propitiatorium erat operculum arcae. *De quibus.*) Reiecit ab hoc loco & tempore accuratiorem singulorum istorum explicationem. *His autem ita*) Hactenus de Sanctuario mundano seu Tabernaculo,

inaculo, h. e. de loco, in quo ritus peragi solebant. Nunc de ipsis ritibus, h. e. de altero prioris fœderis adjuncto agitur. His verbis transiitio quædam est, quasi dicat, atque hæc hæc hactenus quæ ad Tabernaculum pertinent à nobis ita ordinata sunt & disposita. Nunc dicendum est secundo loco de ritibus, qui peragi solebāt in Tabernaculo.

6 *In prius quidem*) Primo loco agit de ritibus, qui peragebantur in Tabernaculo priori siue sancto: ubi hæc tria habes. Primum sunt personæ quæ ingrediebantur prius Tabernaculum & ritus obibant: Personæ erant Sacerdotes in genere, tam princeps sacerdotum, quam sacerdotum vulgus. Deindè mentio fit temporis quo ingrediebantur, & obibant ritus sacerdotes. Tempus est in genere quodcunque & quotidianum. Tertiò habes de ritibus. Ritus erant in genere quicunque, h. e. oblationes omnis generis & preces. Atque idè utitur generali verbo rituum, eo significans ritus cujuscunque generis.

7 *In secundum autem*) Hic agit de ritibus qui peragebantur in secundo Tabernaculo, siue Sancto sanctorum, ubi primum habes de persona, quæ ritus peragebat, nempe Pontifice solo: deindè habes de tempore quo ingrediebatur in Sanctum sanctorum, & peragebat ritus: tempus est vnum tantum, & vnus dies anni cujusque: tertiò habes de ipso ritu qui per-

ragebatur semel quotannis, à Pontifice solo: Ritus erat specialis, nempe oblatio sanguinis, subaudi vituli & hirci, in peluim excepti. Vide Leuit. 16. 2. & deinceps. Quartò habes ritus siue oblationis finem ac vsum: erat autem oblatio sanguinis, primùm pro ipso Pontifice: pro se enim offerebat sanguinem vituli: deinde pro peccatis populi, pro quibus erat oblatio sanguinis hirci.

8 *Hoc declarante*) Sequitur expositio ritus huius specialis, quem obibat solus Pontifex, semel duntaxat quotannis, idque non solum pro populi peccatis, sed etiam pro suis. Expositionem hanc confirmat à Spiritus sancti testimonio. Nam idem ille Spiritus qui ritus instituit, idem, inquam, rituum à se institutorum, & circumstantiarum omnium quæ cum ritibus coniunctæ sunt, interpretes est & expositor. Expositio autem & declaratio proximi ritus, & circumstantiarum eius est, quòd priore Tabernaculo adhuc consistente; in quo ritus proximus aliisque peragebantur, nondum patefcta fuerit via ad Sacrarium. Id quod indicabatur, partim ex persona solius Pontificis, cui, aliis omnibus exclusis, soli permissum fuerat ut ingrederetur Sanctum sanctorum, in eoque obiret hunc oblationis ritum: partim ex tempore, quod vnicum erat tantum in vno anno: partim ex ipsa oblatione, quæ fuit sanguinis tantum typici: partim denique ex oblationis
fine,

sine, qui erat, ut oblatio fieret, non tantum pro populi peccatis, verum etiam pro peccatis Pontificis ipsius. Hæc omnia indicabant nondum patefactam fuisse viam ad Sacrarium, nempe verum, quod cælum est.

9 *Quod erat*) Occupatio: dici potuit: Quis igitur erat usus prioris illius Tabernaculi? Respondet Tabernaculum illud prius fuisse *παράβολον*, similitudinem, hoc est, exemplar seu typum, videlicet alterius Tabernaculi, quod nimirum est ipsum Christi corpus. Atque hoc primum est quo extenuat Tabernaculum illud vetus: alterum est à tēpore cui inserviebat. Tempus erat illud præsens, non quod futurum erat in aduentu Christi. Tertium quo extenuat illud vetus Tabernaculum, est à donis & sacrificiis quæ in eo offerebantur, pro tempore illo præsenti: eiusmodi autem erant ea, quæ non poterant conscientia sanctificare cultorem, h. e. abolere malam conscientiam, quæ est peccatorum commissorum.

10 *In cibis*) Probat illa dona sacrificiâque, quæ in Tabernaculo offerebantur, non potuisse sanctificare conscientia cultorē, à natura ipsa, & genere earum rerum, quæ donabantur & sacrificabantur: Erant autem carnales res & externæ, utpotè cibi, potiones, diuersæ ablutiones, ac omninò ritus huiusmodi. *Vsq̃ue ad tempus*) Altera ratio est, cur non poterant sanctificare conscientia cultor-

rem: quia ut erant carnalia tantum, ita erant temporaria tantum, imposita (subaudi) oneris instar, usque ad tempus correctionis, hoc est, tempus aduentus Christi, in quo hæc omnia erant corrigenda, hoc est, abolenda, ingrediente nimirum in locum typorum & umbrarum ipso corpore, quod est Christus.

II *Adueniens autem*) Hic reuertitur ad institutam comparationem noui Pontificis cum veteri illo. Propositio fuit v. 7. de veteri Pontifice, hæc assumptio est de nouo. In hanc formam redigitur argumentatio. Vetus Pontifex semel quotannis solus, idque non sine sanguine, quæ offerebat etiam pro suis peccatis, in sacrarium terrestre ingrediebatur. At Christus Pōtifex, nimirum futurorum bonorum, in aduentu suo, per maius Tabernaculum, & per sanguinem proprium, ingressus est semel in sacrarium cæleste, eoque facto nactus est nobis Redēptionem æternā. Sequitur ergo Christum præstantiorē esse Pontificem illo veteri. Argumentum est excellentiæ siue præstantiæ Christi septimū. Sumptum est à multis prærogatiuis, quibus Christus veterem illum Pōtificem exuperat. *Pontifex futurorum*) Non simpliciter Pontificem nominat, sed addit bona illa, siue benedictiones spirituales, quarum est Pontifex, h. e. quas Pontificatu suo nobis acquirit. Hoc adiectum est ad maiorem Pontificatus Christi commendationem: futura bona vocat, quia
tum

um futura erant , cū erat vetus Pontifex, quasi dicat, bonorum quæ non erant præsentia tum quum erat vetus Pontifex, sed tantum futura : Cœperunt autem esse postquam iam aduenit Christus Pontifex. *Per maius*) Prima prerogatiua Christi Pontificis. Ingressus est per maius & perfectius Tabernaculum , quàm fuit illud vetus per quod ingressus est Pontifex vetus. *Non manufactum*) Hæc verba rationem continent , cur maius & perfectius vocatum sit hoc Tabernaculum. Est autem ab ejus structura , siue à modo ac ratione , qua factum & exstructum est. Non est factum manu , subaudi hominum , h. e. vlla hominum opera , sed factum est manu & operatione ipsius Dei , per Spiritum suum sanctum: intelligit autem Christi corpus siue humanam naturam.

12 *Neque per sanguinem*) Hæc secunda prerogatiua est Christi Pontificis , qua excellit veterem. Cernitur autem hæc prerogatiua in sacrificio quod Christus obtulit. *Semel*) Tertia est prerogatiua. Vetus Pontifex semel quotannis ingressus est Sanctum sanctorum. At Christus semel tantum omnino ingressus est cælum. *In sacrarium*) Quarta prerogatiua à loco in quem ingressus est Christus , sacrario cœlesti, quod κατ' ἐξοχὴν hoc loco (vt etiam supra versu 8.) simpliciter sacrarium vocatum est. *Æternam*) Hæc quinta est prerogatiua Vetus Pontifex sua oblatione non potuit san-

Etificare conscientia cultorem. At Christus suo sacrificio æternam redemptionem est nactus.

13 Nam si sanguis taurorum & hircorum, & cinis iuuentæ aspergens inquinatos, sanctificat ad carnis puritatem?

14 Quanto magis sanguis Christi, qui per spiritum æternum seipsum obtulit inculpatum Deo, purgabit conscientiam vestram à mortuis operibus, ad serviendum Deo vivo.

15 Itaque ob id noui Fæderis Mediator est, ut morte intercedente ad redemptionem earum prauaricationum quæ fuerant sub priore Testamento, qui vocati erant, promissam æternam hereditatem acciperent.

16 Nam Vbi Testamentum est, mors intercedat necesse est testatoris.

17 Testamentum enim in mortuis ratum est: quãdoquidem nondum valet quum viuit testator.

18 Vnde ne prius quidem illud absque sanguine dedicatum fuit.

19 Quum enim Moses omnia mandata secundum Legem recitasset toti populo, sumpto sanguine vitulorum & hircorum, cum aqua & lana cocinea & hyssopo, simul & ipsum librum & totum populum aspersit.

20 Dicens Hic est sanguis Testamenti quod mandauit vobis Deus.

21 Insuper autem & Tabernaculum, & omnia vasa sacrorum sanguine similiter aspersit.

22 Et

22 *Et omnia ferè secundùm Legem sanguine purificantur : & absque sanguinis effusione non fit remissio.*

23 *Itaque necesse fuit exemplaria quidem eorum quæ sunt in cælis, hisce rebus purificari, ipsa verò cælestia potioribus quàm hæ sunt victimis.*

Nam si sanguis.) Digressio est à præsentī instituto, in quo probat proximam Christi Pontificis prærogatiuam. Argumentum sumptum est à minori comparatione efficaciz sanguinis taurorum, & hircorum &c. ad sanctificandum exterius carnem, & efficaciz sanguinis Christi, ad purgandam interiùs conscientiam. Argumenti forma est. Si sanguis taurorum & hircorum &c. sanctificat ad carnis puritatem, quantò magis sanguis Christi &c. purgabit conscientiam &c. At primum, Ergo secundum. *Sanguis taurorum*) Vide Leuit. 16. *Cinis Iuuenæ*) Vide Numer. 19. vers. 4. & deinceps: ubi leges cinerem Iuuenæ combustæ, aqua mistum fuisse, eaque aqua inquinatos fuisse aspersos. *Ad carnem*) Hic seorsim capit umbras à rebus ipsis adumbratis.

14 *Quantò magis*) Apodosis comparationis. *Qui per Spiritum*) Hic duo argumenta inferuntur, quibus probat efficaciam sanguinis Christi ad purgandas conscientias. Primum argumentum est à principali offerente illum sanguinem, nempe Spiritu æterno, hoc

est, æterna Christi Deitate, quæ in offerendo Christum primas habuit partes. Christus quidem Sacerdos fuit, seseque obtulit, fateor, ut Deus & homo, verum Deitatis primæ erant partes. *Inculpatum Deo*) Hoc alterum argumentum est, à sanctitate humanæ naturæ, quæ à Deitate oblata est Deo. Oblatus quidem est totus Christus Deus & homo. verum humanæ naturæ propriè & præcipuè oblatio est facta. Quemadmodum natura quæ obtulit diuina fuit præcipuè ac propriè. *Purgabit*) Purgare conscientiam, hoc loco est abolere peccata quæ malam efficiunt conscientiam. *A mortuis*) Hic est quasi terminus à quo procedit purgatio, opera nimirum mortua, hoc est, peccata: quæ ideo mortua dicuntur, quod mortem peccantis gignant. Nam finis & stipendia peccati mors. Rom. 6. 21. 23. *Ad seruendum*) Hic terminus est ad quem procedit purgatio, nempe opera viua & bona quæ posita sunt in eo ut seruiatur Deo viuo. Deus ideo viuus dicitur, non tantum quia ipse viuit, verum etiam quia eos qui ipsi seruiunt viuificat, quemadmodum peccata morte afficiunt seruos suos.

25 *Itaque ob id*) Malim retinere propriam significationem particulæ *ob* ut legatur, Et, vel, atque ob id. Habetur enim hoc versu alterum argumentum, quo probat Christum Pontificem nactum nobis æternam redemptionem.

Sum;

Sumptum est à fine cur sit Christus Mediator noui fœderis siue Testamenti. Finis est, vt accipiamus promissam illam æternam hæreditatem, h.e. vt nos in æternum redimat. Media per quæ hæreditas ista à Mediatore fœderis ad nos peruenit, hæc sunt. Primùm intercedit mors Mediatoris siue sponsoris. Deinde sequitur vocatio efficax: hanc excipit redemptio præuaricationum, h.e. remissio peccatorum. Remissionem peccatorum denique sequitur hæreditas, siue gl'orificatio. *Quæ fuerant*) Remissionem peculiariter tribuit peccatis quæ commissa erant sub veteri Testamento, ea re significans, non fuisse eam veteris Testamenti efficaciam ad ea abolenda: verùm toto veteris Testamenti tempore Deum ea præterijisse & tolerasse, aduentu autem Christi & noui Testamenti, quod ad remissionem peccatorum efficax est, iam ea planè remisisse & aboleuisse. Vide Rom. 3. 25. 26. *Promissionem*) h.e. hæreditatem promissam. Sic promissionis nomen accipit Apostolus Rom. 4. 13.

16 *Nam Vbi Testamentum*) Probat non nisi morte intercedente, Christum Mediatorem esse noui fœderis seu Testamenti. Argumentum est à natura Testamenti, quæ necessariò postulat Testatoris mortem intercedentem, siue argumentum est à necessario Testamento adiuncto, quod est intercedens mors Testatoris. Sequitur ergo ad hoc vt sit Christus Me-

diator noui Testamenti, siue quod idem est, nouum testamentum sit Christi Testamentum, necesse esse vt Christi mors intercedat.

17 *Testamentum enim*) Probat mortem intercedentem necessarium esse Testamenti adiunctum, ab effectu quodam mortis, quod in eo cernitur, vt ratum faciat Testamentum, in hanc formam. Mors testatoris est quæ ratum facit testamentum. Ergo vbi testamentum, ibi mors intercedat necesse est: alioqui enim sine morte testatoris ratum esse testamentum non potest. *Quandoquidem*) Probat hoc mortis Testatoris effectum, à contrario vitæ testatoris effectu. Testator dum viuit non valet neq; ratum est eius Testamentum. Ergo mortuo demùm testatore valet, & ratum est eius Testamentum.

18 *Vnde ne prius*) Hoc alterum argumentum est, quo probat, non nisi intercedente morte Christum esse Mediatorem noui fœderis, siue Testamenti Sumptum est à similitudine veteris Testamenti, quod & ipsum Deo non est dedicatum absque sanguine. Quamobrem nouum etiã Testamentum necessariò postulat sanguinem Mediatoris.

19 *Cùm enim*) Probat ex effectis aliquot Mosis depromptis ex libro Exod. 24. vetus Testamentum absque sanguine dedicatũ, & Deo consecratum, non fuisse. Primum Mosis effectum fuit, quo sumpto sanguine vitulorum & hircos-

hircorum &c. simul & librum, & totum populum asperfit. Hoc effectum Moſis circumſcribitur ſuo tempore, nempe poſtquam Moſes omnia mandata &c. Mandata ſecundum legem intelligit, mandata illa quæ in lege Dei erant comprehenſa. *Cum aqua*) Harum rerum non quidem fit expreſſa mentio Exo. 24. unde hæc recitantur, verum iſtas tanquam ordinariè adhibitas tum quoque fuiſſe, colligitur ex alijs locis, ubi iſta diſertè præcipiuntur. *Librum*) nempe fœderis. *Totum populum*) Id eſt, duodecim ſtatuas, quas illic erexerat ad repræſentandum duodecim Tribus Iſraelis. Quemadmodum per altare repræſentabatur Deus fœdus cum illis contrahens.

20 *Dicens hic eſt*) Hoc eſt verbum cum ſigno conjunctum, quo ſignum ſive ritus externus explicatus eſt à Moſe. In Sacramēto enim duo ſunt, ſignum viſibile & verbum audibile. *Hic eſt ſanguis*) Senſus eſt, hic ſanguis quem habeo in crateribus, eſt ſanguis Teſtamenti. Explicat enim Moſes uſum illius ſanguinis quæ habebat in crateribus, populum quoque aſpergebat.

21 *Inſuper autem*) Pergit in effectis Moſis. Vt librum & populum totum, ſic Tabernaculum & omnia vaſa ſacri miniſterij ſanguine aſperſit.

22 *Et omnia*) Inductionis compendium eſt. *ſecundum legem*) id eſt, legalia, ſive ad legem pertinentia, h. e. ad vetus teſtamentum, quod hic Lex appellatur. *Et abſque*) Vt proximè do-

cuit ipsum vetus Testamentum non fuisse consecratum Deo sine sanguine; ita hinc docet vetus Testamentum impletum non fuisse absque sanguinis effusione. Implebatur autem vetus Testamentum, cum peccata populi remissa fuerunt, quorum in ipso fœdere remissio erat promissa. Ergo ut fœdus ipsum non erat ictum sine sanguine, ita neque impletum erat sine sanguine. Sic res se habet in nouo fœdere, in quo, & propter sanguinem Christi paciscitur nobiscum Deus nouum fœdus, & propter eundem illum sanguinem fœdus illud ictum implet & exequitur in nobis justificandis & seruandis.

23 *Itaque necesse*) Concludit necessitatem mortis Mediatoris noui fœderis, quam probandam suscepit vers. 16. Conclusio illustrata est per dissimilitudinem vmbrarum, & figurarum, ac si dixisset: Quamobrem ut necesse fuit vmbras rerum cœlestium purificari & dedicari rebus istiusmodi carnalibus, ut sanguine vitulorum & hircorum: ita necesse fuit res ipsas cœlestes in nouo fœdere purificari sanguine Mediatoris Christi. Victimam appellat quâ tamen vna fuerit Christi victima, fortassis propter vnus illius victimæ multiplicem vsum, in purgandis multis rebus cœlestibus & spiritualibus.

24 *Non enim in manufactum sacrarium ingressus est Christus, quod sit exēplar vero sacratio*
respon-

respondens, sed in ipsum cœlum, ut appareat nunc in conspectu Dei pro nobis.

25 *Neque ut sæpè offerat semetipsum, sicut Pontifex ingreditur in sacrarium quotannis cum sanguine alieno.*

26 (*Alioquin oportuisset eum sæpè passum fuisse à condito mundo*) *sed nunc semel in consummatione seculorum, ad abolendum peccatum, per immolationem sui ipsius patefactus est.*

27 *Et sicut illud statutum est hominibus ut semel moriantur, postea deò iudicium.*

28 *Ita & Christus semel oblatus ut multorum peccata tolleret, altera vice absque peccato conspicietur ijs qui ipsum expectant ad salutem.*

Non enim in) Hactenus digressio fuit. Nunc reuertitur ad institutam comparisonem Pontificis Christi, & veteris Pontificis: & ad prærogativas illas Christi Pontificis, de quibus versibus 11. & 12. Occasio arrepta est ex proximis verbis, quibus dixit Christum potiorrem esse victimam omnibus victimis illis Legalibus. Hinc de præstantia Christi Pontificis agit. Primò autem repetit prærogativam illam quæ fuit suprà ver. 12. eaque eum præfert veteri Pontifici. Vetus Pontifex ingressus est sacrarium manufactum, quod exemplar duntaxat fuit vero sacrario respondens. At Christus novus Pontifex, non ingressus est in manufactum sacrarium &c. sed in ipsum cœlum &c. *ut appareat*) Ingressus Christi in cœlum à fine suo

commendatur, qui est ut apud Deum interpellat pro nobis. Rom. 8. 38. 1. Ioan. 2. 1.

25 *Neque ut saepe*) Hoc versu habes repetitam secundam & tertiam prærogativam: de quibus supra versu 12. quibus ipsis superat veterem illum Pontificem. Vetus Pontifex ingressus est in Sacrarium cum sanguine alieno. At Christus semetipsum obtulit. Vetus Pontifex saepe obtulit, nempe quotannis. At Christus, non saepe, sed semel tantum obtulit.

26 *Alioqui oportuisset*) Probat Christo non saepe fuisse offerendum semetipsum, ab absurdo, eoque duplici. Primum est quia si oportuisset eum saepe se offerre, oportuisset eum non modò saepe passum esse, sed etiam saepe passum esse à condito mundo: In hanc formam. Si oportuisset Christum saepe offerre semetipsum, oportuisset eum saepe passum & mortuum fuisse à condito mundo: At hoc est absurdum. Ergo &c. Sequela propositionis sic ostenditur. Primum quia offerri Christum, est pati eum ac mori. Deinde quia si unica Christi oblatio semel facta suo tempore non sufficiat ad abolitionem omnium peccatorum inde à condito mundo, præteritorum, præsentium, & futurorum, sed oportuisset eum saepe offerri, profectò initium mortis ipsius petendum fuisset à condito mundo, quo nimirum tempore cœpit peccatum. Nam si saepe fieri debeat oblatio pro peccato, certè necesse est incipiat oblatio

latio, quo tempore primum peccatum cœpit & commissum est. *Sed nunc*) Correctio quædam est, qua pronunciat Christum, non sæpe, sed semel passum esse, non à condito mûdo passum, sed in consummatione seculorum, h. e postquam venit plenum illud tempus, à Patre scilicet constitutum. Gal. 4. 4. *Ad abolendum*) Hic finis cur Christus semel sit passus tantum, idque in consummatione seculorum. Est autem ad abolendum peccatum, in genere omnium temporum, præteriti, præiens, futuri.

27 *Et sicut*) Vt videtur occurrit scandalo passionis Christi, ex eo quod oblationem istâ semel factam ingens Christi gloria consecuta sit, ostendens secunda vice abiq; peccato conspiciendum esse. i. cum gloria, vtpote gloriosum mundi Iudicem. Illustratur hæc sententia similitudine sumpta ab hominibus, quorum mortē non iteratam, sed semel factam, idq; ex Dei instituto, sequitur iudicium. Generale illud iudicium videtur intelligere in quo Iesus Christus futurus est Iudex. Sic & Christus, post oblationem ipsius factam, conspicietur gloriosus ille Iudex, ad salutē ipsorum qui illum expectant ad iudicium illud venturum. *Multorum peccata*) Innuit efficaciam vnicae oblationis Christi semel factæ. Nam vnica illa oblatio efficax est ad tollenda, non vnius tantum, sed multorum peccata. *Absque peccato*) Nempè quod ipsi, cum oblatus est in cruce, imputatum est. Nam

qui non nouit peccatum, pro nobis peccatum factus est, vt nos efficeremur Iustitia Dei in eo.
2. Cor. 5. 21. Peccato imputato dicitur Christus mortuus fuisse semel.

Argumentum Capitis decimi.

Hoc capite primùm alijs duobus argumentis ostendit Christum non sæpius offerendum, sed vnicam eius oblationem sufficere, ad vers. 19. Deinde redit ad institutionem exhortationem, ad perseuerantiam in fide: eiusque argumenta duo adducit, nonum & decimum, ad vers. vsque 26. Tertio vndecimū est exhortationis argumentum, in quo immoratur ad vers. 32. Postremo dehortatur ab Apostasia, argumēto sumpto ab afflictionibus, quas iam antè perpessi sunt pro fide, ad finem capitis. Vbi obiter etiam inseruntur argumenta exhortationis principalis duo, duodecimum & decimum-tertium.

C A P V T. X.

1 *Lex enim vmbra obtinens futurorum bonorum, non expressam formam rerum, ijs hostijs quas singulis annis easdem continenter offerunt, nunquā potest accedentes sanctificare.*

2 *Alioqui desissent offerri, propterea quòd sacrificantes, semel purgati, nullorum peccatorum ampliùs essent sibi conscij.*

3 *At in istis fit repetita mentio peccatorum quotannis.*

4 *Non enim potest sanguis taurorum & hircorum auferre peccata.*

5 *Quapro-*

5 Quapropter ingrediens mundum, dicit Sacrificium & oblationem noluisti, corpus autem aptasti mihi.

6 Holocautomata & hostiam pro peccato non approbasti.

7 Tunc dixi, Ecce adsum (in capite libri scriptum est de me) ut faciam, Deus, voluntatem tuam.

8 Quum superius dixisset, Sacrificium & oblationem, & holocautomata, & hostiam pro peccato noluisti, neque approbasti (quæ iuxta Legem offeruntur)

9 Tunc dixit Ecce adsum ut faciam, Deus, voluntatem tuam. Tollit prius ut posterus statuatur.

10 Qua voluntate sanctificati sumus, per oblationem corporis Iesu Christi semel factam.

11 Omnis igitur Sacerdos adstat quotidie operans, & easdem sæpius offerens hostias, quæ nunquam possint auferre peccata.

12 Hic Verò una pro peccatis oblata victima, in perpetuum consedit ad dextram Dei.

13 Id quod superest expectans, donec inimici ipsius scabellum pedum eius fiant.

14 Unica enim oblatione consecrauit in perpetuum eos qui sanctificantur.

15 Testificatur autem hoc nobis, & ipse Spiritus sanctus: nam posteaquam prædixit,

16 Hoc est fœdus quod paciscar cum eis post dies illos, dicit Dominus, Indam leges meas cordi-

bus eorum, & eorum mentibus eas inscribam.

17 *Et peccatorum atque iniquitatum ipsorum non recordabor amplius.*

18 *Porro ubi est horum remissio, non est amplius oblatio pro peccato.*

Lex enim umbram) Sequitur argumentum secundum, quo ostendit Christum non sæpè offerendum fuisse, sed unicam ejus oblationem sufficere: in hanc formam. Per oblationem corporis Iesu Christi semel factam sanctificamur. Ergo non opus est sæpè semetipsum offerat. Argumentum est ab effecto unicæ illius oblationis, nempe perfectione & sanctificatione nostri. Integer syllogismus hic est. Si unica Christi oblatio semel facta sanctificet, non opus est ut ipse sæpiùs se offerat. At primum, Ergo secundum. Syllogismi hujus propositio non est in textu expressa: assumptio habetur postea, vers. 10. Conclusio intelligenda relinquitur. Illustratio assumptionis à dissimili effecto sacrificiorum legalium præcedit ab initio capitis, ad vers. 10. Dissimilitudo hæc est, Sacrificia legalia sæpiùs oblata non sanctificant. At oblatio Christi semel facta sanctificat. Propterea dissimilitudinis de legalibus sacrificijs ostenditur pluribus argumentis. Primum habetur versu primo, à natura eorum quæ lege continentur. Sunt tantùm umbra & rudis quædam delineatio futurorum bonorum, non autem expressa imago viuis suis coloribus depicta,

pieta: Argumenti forma est. Lex tantum umbram obtinet, &c. Lex ergo & legalia sacrificia, quæ singulis annis continenter offeruntur à Pontifice, nunquam possunt accedentes sanctificare.

2 *Alioqui nonne*) Secundum argumentum. Si sacrificia legalia per se sanctificassent, annō desissent offerri? Atqui non desierunt offerri: Ergo non sanctificârunt. *Propterea quod*) Probat connexionem, facta semel bona cōscientia nō amplius opus est oblatione. At si sanctificassent legalia sacrificia fecissent bonā conscientia. Ergo si sanctificassent desissent offerri. Argumētum sumptum est à natura sanctificationis, quæ nihil aliud est, quàm conscientia purgatio, abolitio malæ conscientia, quæ est ipsa peccatorum conscientia, & effectio bonæ conscientia. *Qui sacrificassent*) Cultores vocat cap. 9. v. 9. vbi dicit sacrificia illa non posse sanctificare conscientia cultorem.

3 *Atqui in*) Argumentū tertium à cōiuncta siue adiuncta cū anniuersariis illis sacrificiis legalibus, omnium superiorū peccatorū mentione repetita. Quoties enim oblatio facta est, toties mentio facta est superiorum peccatorum. Sequitur ergo non habuisse sacrificia illa vim sanctificandi & abolendi peccata: si enim iam expiata erant peccata illa quorsum repetebantur, h. e. si per priora sacrificia expiata & abolita erant, quorsum cum poste-

rioribus sacrificiis repetita eorum mentio fiebat? De his vide Leuit. 16.

4 *Non enim potest*) Argumentum quartum ab impotentia sanguinis taurorum & hircorum. Oblationes illæ legales erant sanguinis tantum bestiarum. Atqui sanguis bestiarum non potest auferre peccata. Ergo oblationes illæ non possunt sanctificare. Sanctificare & auferre peccata, idem sunt hoc loco. Obserua toto hoc loco, figuras siue typos seorsim considerare à rebus ipsis figuratis.

5 *Quapropter*) Ex proxima demonstratione, qua ostensum est legalia sacrificia non sanctificare, infert sublata esse ea, ut voluntas Dei de Christi sacrificio statueretur & poneretur: In hanc sententiam primum affert verba Psalmistæ de Christo loquentis. Psalm. 40. ad versum vsque 8. Deinde ea verba interpretatur, ad versum 10. *Ingrediens mundum*) id est, Dei Filius, quo tempore homo factus est. *Dicit*) Introducitur à Psalmista Dei Filius pronuntians sublata esse à Patre suo sacrificia legalia. Nā hic est sensus huius loci, ad versum vsque septimum: ut Apostolus ipse interpretatur vers. 9. quum dicit *Tollit prius*. In hanc sententiam sunt omnia quæ dicuntur duobus his versibus, excepto hoc quod inseritur de corpore ipsi aptato, quibus verbis receditur à vocibus iis, quæ habentur illo Psalmo: Nam illic habetur, (*Aures perforasti mihi*) pro quo hic

hîc legitur *Corpus aptasti mihi.*) Sed sensus est planè idem. Nam utrobique intelligitur Filium Dei formatum esse ad summum obsequium & obedientiam Patris sui. Hoc enim significatur phrasi illa, quæ habetur in Psalmo de aurium perforatione, quæ signum erat seruitutis perpetuæ. Hoc quoque ipsum significatur aptatione ista corporis, h. e. naturæ humanæ aptatæ Deitati Filij Dei, quo factum est, ut formam serui acceperit, ad hoc ut sese submitteret Patri, & obediens fieret ad mortem, mortem autem crucis. Quæ alij afferunt ad locorum duorum conciliationem, ego hîc prætereo.

7 *Tunc dixi*) His verbis habes finem, cur sublata sint sacrificia legalia: nempè ut locus esset voluntati Dei de Filio suo Christo, ipsiusque sacrificio. Hîc enim profitetur Filius promptitudinem suam ad sese offerendum & moriendum, ex Patris sui voluntate. *In capite*) h. e. in volumine veteris Testamenti, vel librorum Moïsi, quorum volumē dictum est κεφαλή metaphoricè à specie, eò quòd cōuolutum & complicatum libri cōpus (ut libri quidem fuerunt veteres) quasi opus capitatum est. Porro his verbis contineri videtur argumentum obedientiæ Christi quam hoc loco ipse prædicat. Argumentum est, quia sic de eo in veteri Testamento scriptum est. Sequitur ergo necessariò ipsi faciendum esse quod vult Deus Pater, ut constet Scripturæ sacræ sua veritas, &

Deus iustificetur in sermonibus suis. Rom. 3. 4.

8 *Quum superius*) Sermonem hunc Christi qui habetur Psal. 40. Apostolus exponit de abolitione sacrificiorum legalium, & constitutione obedientiæ & sacrificij Christi. Nam priora Christi verba significant (interprete Apostolo) sublata esse sacrificia legalia: posteriora verò, quibus dicit, Ecce adsum &c. significat Christi sacrificium statutum.

10 *Qua voluntate*) Hactenus fuit illustratio assumptionis syllogismi, qui huius loci est, à dissimilitudine legalium sacrificiorum. Nunc autem habetur ipsa assumptio, siue dissimilitudinis apodosis. Nam dissimilitudinis membra hæc sunt. Legalia sacrificia sæpiùs oblata non sanctificant, Christi verò oblatio semel facta sanctificat. Notandum quod sanctificationis hoc effectum tribuat primùm voluntati Dei, tanquam causæ, deindè oblationi corporis Christi, quia oblatio corporis Christi fuit ex Dei voluntate. Iure igitur effectum oblationis Christi adscribitur Dei Patris voluntati, ut ipsi cum Filio suo sit gloria sanctificationis nostræ.

11 *Omnis igitur Sacerdos*) Hic repetit integram dissimilitudinem: Protasis dissimilitudinis de hostijs legalibus habetur hoc versu 11. Apodosis verò tribus sequentibus. *Quæ nunquam*) Hoc idem est cumeo quod dixit vers. 1. Nunquam possunt sanctificare seu perficere.

cere. Nam perfectionis quæ effectum est oblationis Christi, pars quædam est peccati abolitio, siue remissio. In hac itaque parte totum intelligitur.

12 *Hic verò*) Apodosis dissimilitudinis quæ syllogismi assumptio est. *Sedet ad dexteram*) Iusta dissimilitudo postulabat ut diceretur, Christus vnica pro peccatis victima oblata, in perpetuum durante, sanctificat nos: verum pro sanctificatione posuit sessionem Christi ad dexteram Patris, quæ sanctificationis nostri consequens est, & necessariò eam antegredientem præsupponit. Nam tum demùm cœpit Christus sedere ad dexteram Dei, & gloriam suam adeptus est, quum victima sua semel oblata, suos sanctificasset ac perfecisset. Vnde postea versu 14. sessionis huius ad dexteram Dei rationem reddit ex eo quod vnica sui oblatione suos sanctificarit.

13 *Id quod superest*) Hæc verba innuunt nondum esse perfectam & completam Christi, etiam sedentis ad dexteram Patris, gloriam. Nam Christus ad dexteram Patris sedens, expectat donec inimici ipsius scabellum pedum eius fiant. Confer hunc locum cum eo qui est 1. Corinth. 15. 24. 25. 26. *Consecrauit in*) Sensus est: Perfecit atque absoluit eos, qui sanctificantur: quo significat perfectionem hanc positam in sanctificatione.

15 *Testificatur autem*) Sequitur argumentum

tertium, quo ostendit Christi oblationem illam semel factam sufficere. Argumentum est ab effectu illius oblationis, peccatorum remissione & oblatione, quæ pars quædam est perfectionis, qua pro argumento usus est proximè. Nam perfectionis nomen (vt mihi videtur) comprehendit in se omnia simul beneficia, quæ Christus morte sua nobis promeritus est, in quibus censetur peccatorum remissio. Syllogismus est. Vbi est peccatorum remissio, non est ampliùs oblatio pro peccato. Atqui ex vnica Christi oblatione est peccatorum remissio. Ergo non est ampliùs oblatio Christi, siue sufficit vnica illa oblatio. Assumptionem confirmat testimonio Spiritus sancti loquentis Ierem. 31. 33. Primùm præfatur Spiritum sanctum hoc nobis testificari. Deinde testimonium Spiritus in medium adducit, in quo testimonio promissio facta est remissionis peccatorum omnium. Peccatorum ista remissio promissa intelligenda est futura in sanguine Christi, qui noui fœderis Mediator est. Vide quæ de hoc testimonio diximus suprà. cap. 8. vers. 8. & deinceps

18 Porro Vbi) Syllogismi propositio.

19 Quum igitur, fratres, habeamus libertatem ingrediendi Sacrarium per sanguinem Iesu,

20 Ea via quam dedicauit nobis recentem & viuam per velum, hoc est, per carnem suam:

21 Quumque habeamus Sacerdotem magnū, præfectum domui Dei.

22 Ac-

22 *Accedamus cum vero corde, & certa persuasione fidei, puris cordibus à conscientia mala.*

23 *Et abluto corpore aqua pura, teneamus confessionem spei non vacillantem:) fidelis enim est qui promissit.)*

24 *Et observemus alij alios, ut nos acuamus ad charitatem & bona opera.*

25 *Non deserentes aggregationem nostri mutuam, sicuti mos est quibusdam, sed adhortantes alij alios, idque eo magis quod videtis illum diem appropinquare.*

Quum igitur, fratres,) Haëtenus de Pontificatu Christi, inde à principio capitis ad hunc usque locum. Nunc redit ad institutam exhortationem, qua ad perseverantiam in fide adhortatur. Hic itaque habemus exhortationis argumentum novum, quod sumptum est à libertate ingrediendi sacrarium coeleste: in hanc formam. *Quam habemus libertatem ingrediendi sacrarium, accedamus cum vero corde &c.* At habemus libertatem ingrediendi sacrarium. Ergo accedamus. *Per sanguinem)* Libertatem hanc ingrediendi sacrarium explicat, ex causa efficiente meritoria, siue pretio quo redempta est; nempe Christi sanguine.

20 *Ea via)* Libertatem ingrediendi explicat deinde à via per quam ingredimur Sacrum coeleste. Viam hanc describit, primum ex eo quod dedicata sit à Christo & consecrata. Deinde ex eo quod recens sit. Tertiò ex eo quod

viua sit. Quartò viam ipsam expressè nominat, vocatque velum, h.e. vt ipse exponit carnem Christi, quàm velum vocat per allusionem ad velum quod prætendebatur Arcæ Dei, quæ collocabatur in Sancto sanctorum. Sic enim naturæ humanæ velum prætenditur Deitati Christi, cuius typuserat arca fœderis.

21 *Quumque habeamus*) Hoc exhortationis argumentum est decimum, à præfecto domus Dei, siue sacrarij in quod ingrediendum est. Is autem est idem ille Pontifex magnus, de quo hæctenus. Cùm igitur & aditus pateat ad sacrarium cœleste, & Pontifex noster sit præfectus domui Dei, siue sacrario, quid vetat quo minùs ingrediamur & accedamus? De Christi præfectura in domo Dei, vide suprà 6. 3. At Christus vt Filius domui suæ præest.

22 *Accedamus*) Hæc altera est pars propositionis consequentiæ, quæ incepta est à vers. 19. Continet autem plures in se partes, siue membra plura, quorum primum habetur hoc versu. Est autem opus fidei, quod cernitur in accedendo ad sacrarium, siue in ingrediendo Sacrarium cœleste. In accedendo tria requirit. Primum cor verum, h. e. sinceritatem cordis, quod Paulus cor purum vocat. 1. Timoth. 1. 5. Secundum est πληροφορία fidei, quam eodẽ sensu illo loco Paulus fidem ἀνυποκριτόν appellat. Tertium est purificatio cordium à conscientia mala, quam Paulus illo loco bonam conscientiam

nam nuncupat. His igitur tribus modis oportet affectum esse ejus animum, qui accedit ad sacrarium illud cœleste.

23 *Et abluto corpore*) Secundum membrum est posterioris partis propositionis consequentiæ, de qua diximus. Est autem perseverantia in opere spei. Opus spei est confessio non vacillans, h. e. constans confessio quæ spei tribuitur, quia spes vitæ æternæ facit ut confiteamur Christum coram mundo. Gloriamur sub spe gloriæ Dei. Rom. 5. 2. In tenenda confessione spei requirit corpus ablutum aqua pura, h. e. sanctificationem hominis, quam adumbrat per legales & externas ablutiones sordium corporis. Aquam puram intelligit Spiritum Dei sanctum, cujus typus quidem erat aqua illa legalis, & cujus symbolum est aqua Sacramenti Baptissimi. *Fidelis enim*) Rationem perseverantiæ in confessione spei inserit, à natura, hoc est, veritate siue fidelitate Dei promittentis. Deus qui promisit natura sua verax est & immutabilis. Ergo perseveremus in confessione spei gloriæ illius quam promissit Deus.

24 *Et observemus*) Hoc tertium est membrum propositionis, est autem charitatis opus positum in observatione nostri mutua. *Vt nos acuamus*) Observationem quam dixit, in eo ponit, ut alij alios vicissim acuamus ad charitatem, & charitatis opus.

25 *Non deferentes*) Quartum est propositionis membrum, ad quod quarto loco adhortatur. Cōtinet exercitium pietatis, quod cernitur in celebrandis sacris cœtibus & cōitionibus Sanctorum, quas hîc *ἱπιοὺν ἀγαγὼν* nomine intelligit. Primùm dehortatur à desertione Ecclesiasticorum cœtuum: deinde adhortatur ad eorum celebrationem, quam intelligit, cùm dicit adhortantes alij alios, h. e. in vnum coeuntes, vt adhortationes, instructiones, consolationes, & cætera huiusmodi officia, in Ecclesia Dei habeantur. *Sicuti*) Obiter reprehendit nonnullos, qui cœtus sacros non frequentabant. *Idque eo magis*) Exhortationis huius argumentum, à propinquitate ultimi illius diei, cuius testem appellat ipsorum conscientiam (videtis) inquit, h. e. huius rei ipsi estis conscij

26 *Nam si* Ultrò peccauerimus post acceptam cognitionem Veritatis, non adhuc pro peccatis reliqua est hostia.

27 *Sed horrenda quædam expectatio iudicij, & ignis feruor, qui deuoraturus est aduersarios.*

28 *Qui contempserit Mosis Legem absque misericordia ex duorum aut triũ testimonio moritur.*

29 *Quanto (putatis) acerbior supplicio dignus censëbitur qui Filium Dei conculcarit, & sanguinem fœderis, per quem fuerat sanctificatus, profanum duxerit, & Spiritum gratiæ contumelia affecerit?*

30 *Nouimus enim eum qui dixit, Meum est
 Mleisci, ego rependam, dicit Dominus. Et rursum,
 Dominus indicabit populum suum.*

31 *Horrendum est incidere in manus Dei viui.*

Non sicut Vltrò) Argumentum superiorum exhortationum, à pœna Apostasiæ & defectionis: quasi dicat, si non perstiterimus in fide, in spe, in charitate &c. sed post acceptam veritatis cognitionem vltro peccauerimus, non adhuc &c. *Vltrò peccauerimus*) His verbis habetur descriptio quædam Apostasiæ, siue defectionis, siue peccati in Spiritum sanctum. Primum est peccatum, deinde est peccatum in veritatem ipsam, h. e. in Euangelium Christi: Nam qui peccat in Spiritum sanctum, oppugnat ipsum Euangelium. Tertiò est peccatum in veritatem Euangelij agnitam: Nam qui peccat in Spiritum sanctum, non ex ignorantia, sed ex scientia, & contra conscientiam suam peccat. Quartò peccatum est quod vltro admittitur, & sponte, hoc est, ex malitioso animi proposito. Nam qui peccat in Spiritum sanctum non ex infirmitate peccat, sed ex malitia & pertinacia animi. *Post acceptam*) hoc est, postquam semel fuerit illustratus, gustaueritque donum cœleste. Heb. 6. 4. & deinceps. *Non adhuc*) id est, nullum est sacrificium reliquum, quo expietur ejus peccatum: quod si enim esset, illud esset vel Christi sacrificium, vel alterius cujusdam noui Mediatoris. Sed Christi

sacrificium non est : nam postquam semel admissum est hoc peccatum , quod vocatur in Spiritum sanctum, quo conculcatur Dei Filius, profanatur sanguis fœderis , & Spiritus gratiæ contumelia afficitur. Iam Christi sacrificium ad eum qui sic peccauit , non amplius pertinet, & qui sic peccauit, amittit prorsus jus omne in Christi sacrificium. Ergo non est Christi sacrificium quo expiatur huiusmodi peccatum. Non est alterius cuiusquam noui Mediatoris sacrificium , quo expiatur hoc peccatum : Nam nouus aliquis Mediator dari non potest, vt neque nouum fœdus gratiæ. Sequitur ergo nullum pro peccato hoc reliquum esse sacrificium. Heb. 6. 6. pro eo quod hîc dicitur, non adhuc pro peccatis &c. habet fieri non posse vt denuò renouentur per resipiscentiam.

27 *Sed horrenda*) Hoc altera pars pœnæ est. Nam prima fuit , quòd nulla sit peccati remissio : hæc secunda est , expectatio Iudicij futuri. Hanc horrendam vocat , quia vel ipsa expectatio inferorum horrorem incutit. Porro horrenda expectatio hoc loco nihil aliud videtur esse, quàm metus qui spei opponitur. Nam vt spes est futuri boni, ita metus est futuri mali. *Et ignis*) Hæc species pœnæ est futuræ siue iudicij, nempè absumptio per ignis feruorem. *Qui deuoraturus*) Descriptio quædam est feruoris ignis quem dixit, ab effectu suo , qui est in deuorandis aduersarijs , hoc est , ijs qui Deo tanquam

quam hosti bellum indicunt, & elata manus peccant.

28 *Qui contempserit*) Poenam hanc quam dixit confirmat ex minori exemplo ejus, qui contempsit Mosis Legem. Simile argumentum vide Heb. 2. 2. 3. *Absque misericordia*) Nota quum Deus jubet morte afficere peccatorem, tum præposteram esse misericordiam qua ei parcitur.

29 *Qui Filium Dei*) His omnibus modis peccat apostata, & qui à veritate deficit. Heb. 6. 6. in eundem sensum dicuntur apostatæ rursus crucifigere sibi metipsis Filium Dei, & ad ignominiam exponere. Tribus modis dicitur hâc peccare apostata. Primum peccat in Christum, qua λόγος est, & Filius Dei. Deindè peccat in Christum, quâ homo est crucifixus. Tertiò peccat in Spiritum sanctum. Vnde apostasia ista vocatur peccatum in Spiritum sanctum.

30 *Novimus enim eum*) Alterum poenæ siue supplicij apostasiæ argumentum, à testimonio ipsius Dei, qui profitetur se ultorem omnium peccatorum. Vide Deut. 32. 35. Rom. 12. 19.

31 *Et rursus*) Hoc alterum est testimonium idipsum confirmans ex eodem loco. Deut. 32. 36. *Horrendum est*) Conclusio est hujus loci ἐπιφωνηματικὴ Dei viui) Hoc epitheto viui, ostendit quod dixit, horrendum esse incidere in ejus manus. Nam cum qui manibus quasi

ſuis peccatorem diſcerpit, adeò viuus ſit, & potens ac robuſtus, neceſſe eſt horrendum eſſe in ejus manus incidere. Sic 2. Theſſ. 1.9. grauitatem & æternitatem ſupplicij impiorum arguit à potentia gloriæ Domini.

32 *Reuocate Verò in memoriam ſuperiores dies, quibus poſtquàm illuſtrati fuiſtis, ingens certamen afflictionum ſuſtinuiſtis.*

33 *Partim quidem, dum & cum probris, & cum oppreſſionibus, in theatrum eſtis producti: partim Verò, dum ſocij facti eſtis eorum qui in eo ſtatu verſantur.*

34 *Nam & de vinculis meis mecum doluiſtis, & direptionem facultatum veſtrarum cum gaudio accepiftis, ut qui ſciretis vos habere apud vos potiore ſubſtantiam in cælis, & qua permaneat.*

35 *Ne igitur abjcite liberam illam profeſſionem veſtram, qua magnam habet præmij retributionem.*

36 *Nam patientia vobis eſt opus, ut voluntati Dei obſequuti reportetis promiſſionem.*

37 *Adhuc enim tantillum, tantillum, inquam, & qui venturus eſt, veniet, neque tardabit.*

38 *Iuſtus autem ex fide viuet: at ſi quis ſe ſubduxerit, non probat eum animus meus.*

39 *At nos non ij ſumus qui nos ſubducamus ad exitium, ſed qui credamus ad animæ ſalutem.*

Reuocate Verò) Dehortatur à defectione ſiue apoſtaſia, & hortatur ad perſeuerantiam, ab afflictioni-

afflictionibus quas superioribus diebus pro fide sunt perpeſſi. Nam non decet eos tam multa paſſos eſſe fruſtrà. Gal. 3. 4. Propoſitio exhortationis hoc loco eſt, vt reuocent in memoriam ſuperiores dies : non enim è memoria noſtra excidere debet ſuperior noſtra conditio, ſue proſpera ſue aduerſa. Mementote vos quondam Gentes in carne. Eph. 2. 11. 12. *Quibus poſtquam*) Definitio quædam eſt ſuperiorum dierum, ab afflictionibus quibus illis diebus exercitati ſunt. *Illustrati fuiſtis*) Tempus afflictionum notat, quod erat non ante fidem, ſed poſt fidem & illuminationem. Nam fidem & illuminationem mentis ſequitur Crux, Dei conſilio immiſſa ad fidem explorandam. Certamen vocat afflictionum, quia cum afflictionibus certamus & conflictamur in hac vita.

33) *Partim quidem*) Distributione explicat afflictiones quas dixit : partim erant afflictiones quas ipſi perpeſſi ſunt, partim erant *συμ-
μαχία*, qua cum afflictis alijs doluerunt. *Cum probris*) Afflictionem quam ipſi perpeſſi ſunt in eo ponit, quod producti ſint in theatrum cum probris & oppreſſionibus, h. e. quod publice & inſpectante quaſi mundo, & probroſe, & injurioſe tradati ſunt. Ergo productio hæc in publicum, & quaſi in theatrum, auget & exaggerat duo illa afflictionum genera, nempe probrum & oppreſſiones. *Dum ſocij*) In hanc ſententiã loqui videtur Paulus. 2. Timoth. 1. 8.

cùm monet Timotheum nè pudeat eum ipsius, qui tum erat captivus Christi, sed potius sit particeps afflictionum Evangelij.

34 *Nam & de Vinculis*) Καὶ τὸ ἐπ' αὐτῶν explicat superiora afflictionum membra : posterius enim priori loco declarat, prius autem posteriori. *De Vinculis*) De συμπάθειᾳ hac vide Rom. 12. 15. Flete cum flentibus. *Cum gaudio*) Non dicit simpliciter perpeſſos, eſſe eos direptionem facultatum ſuarum; verùm addit, cum gaudio perpeſſos. Hoc eorum afflictionem commendat. In martyrio duo requiruntur: Primùm, ut ſit bona cauſſa : Secundum, ut adſit gaudium. Vtrumque complexus eſt Petrus 1. Epist. 4. 16. Sed ſi (inquit) ut Chriſtianus affligitur aliquis, ne pudeſcit, imò glorificet Deum tanquam Patrem. Quibus verbis habes & martyrij cauſſam optimam, nempe fidem Chriſti, & gaudium quo affici debet animus in martyrio. *Ut qui ſciretis*) Ratio cur cum gaudio acceperint direptionem facultatum ſuarum, à fide & ſpe quam habebant, adepturos ſe cœleſtem ſubſtantiam, quam cum terrenis facultatibus comparat Apoſtolus, & in bonitate, & in ſtabilitate. Quod ad bonitatem potior eſt : quod ad ſtabilitatem permanet in æternum.

35 *Nō igitur*) Concludit principalem exhortationem : perſtandùm nimirùm eſſe in fide ſive fiducia. *Quæ*) Argumentum exhortationis duode-

duodecimum, à mercede fidei. Nota mercedē esse, non operum nostrorum, sed fidei, h. e. meriti Christi, quod fide apprehenditur.

36 *Nam patientia*) Occupatio. Obiici enim potuit: Dicis fiduciam habere magnam præmij retributionem: nos verò fiduciæ siue fidei nullū fructū percipimus præter afflictiones. Respondet. Credentibus opus esse patientia. *Vt ubi*) Quo fine sit opus patientia ostendit. Nempè vt posteaquam ex volūtate Dei perpassi fuerint afflictiones, reportēt promissionem, h. e. promissam mercedē. Nota, promissiones vitæ æternæ fiunt cū exceptione afflictionum. Quamobrem cū fide in promissiones, necessariò coniungenda est patientia, cuius beneficio duramus sub afflictionibus.

37 *Adhuc enim*) Altera occupatio. At tardat Dominus; ac proindē, non nisi tardē reportaturi sumus promissam mercedem? Respondet, paululum admodum temporis adhuc superesse dum veniat Dominus. vide 2. Pet. 3. 9.

38 *Iustus autem*) Cui demū tribuenda sit vita in aduentu Domini ostendit, nempe ei qui iustus est, hoc est, fide Christi iustificatus, is ex fide illa qua iustificatus est viuet. *At si quis*) E diuerso docet cui non sit tribuenda vita in aduentu Domini, ei nimirum vita non est adiudicanda qui se subduxerit, h. e. qui à fide defecerit. *Non probat*) Pro eo quod dicendum erat non viuet, dixit, non probare

eum animam ipsius. Hic versus desumptus est ex Propheta Abacuc. cap. 2. vers 4. vbi legitur. Ecce ebullat in quo nō est rectus animus ipsius: iustus autem ex fide sua viuet. Verūm Apostolus hoc loco verba Prophetæ non adduxit ex professo, sed talem sententiam accommodauit hominibus sui tēporis, qualem Propheta olim accommodauit ijs qui prisco illo seculo vixerunt. Atque hīc habes argumentum principalis exhortationis decimum-tertium.

39. *At nos non*) Correctio est & mitigatio superioris sententiæ, quæ fortassis durior ac seuerior videri potuit. Hac igitur correctione Hebræos eximit è numero Apostatarum, & credentibus accenset. *Ad exitium*) Obscurè deterret ab apostasia & defectione à fide, argumento ab exitio illo quod manet Apostatas. *Ad animæ salutem*) Obscurè ad perseueratiā in fide Hebræos excitat, argumento à salute illa æterna, quæ manet credentes.

Argumentum Capitis Undecimi.

Hoc capite digressio est in commendationem fidei, ad quam hactenus est hortatus. Eam autem commendat ab effectis, primū generalibus ad versum 4. deinde specialibus, à versu 4. ad finem capitis.

CAPVT XI.

I Est autem fides, illud quo extant quæ sperantur, & quæ demonstrat quæ non videntur.

2 *Obeam enim testimonio sunt ornati maiores.*

3 *Per fidem intelligimus constructum fuisse mundum verbo Dei, ut quæ cernimus non sint ex apparentibus facta.*

Est autem fides) Digreditur in commendationem fidei illius, ad quam hætenus est hortatus: commendatio est ab effectis, primum generalibus, tribus primis versibus. Primum effectum generale est quod fides sit substantia eorum quæ sperantur, hoc est, existere faciat res quæ nondum sunt, sed quæ sperantur. Fides existere facit ea quæ nondum sunt, ex parte, non autem secundum se tota: nam dum credimus in promissiones de vita futura, præsens quædam est illius vitæ fruitio. *Et quod demonstrat* (Idem re aliis verbis repetitur: *ἰλεγχὼν* siue demonstrationem vocat, quia ex parte oculis animi repræsentat ea, quæ secundum se tota non videntur: nam ut dum credimus in promissiones de vita æterna, tunc eius ex parte est fruitio & participatio: ita eiusdem aspectus est ex parte. Quæ non videntur hoc loco, sunt eadem quæ sperantur: nam quod non videmus speramus. Rom. 8. 25. Hoc igitur loco innuit Apostolus admirabilem esse fidei efficaciam, qua fit ut quæ non subsistunt subsistant, quæ non videntur videantur. Quibus verbis nihil aliud significat, quàm per fidem inchoari in hac vita vitam illam æternam.

2 *Obeam*) Secundum effectum generale, si-

des maiorum, siue Patrum effecit vt testimonio honorifico aliquo sint ornati. Hoc videbimus postea in inductione particularium fidei effectuum. Nota: Commendatio piorum in veteri & noua Scriptura est ex fide propriè. Si quæ sit ex operibus expressa commendatio, ea est qua per opera tanquam effecta notiora, arguitur & ostenditur fides. Ergo commendatio est ex operibus, non tanquam causis, sed effectis & testimonijs fidei in Christum, quæ vera est commendationis omnis causa.

3 *Per fidem*) Tertium effectum fidei generale. Beneficio fidei non tantum videmus apprehendimusque futura, vt in primo effectum, sed videmus etiam quæ multis retrò seculis facta sunt. Videmus ipsam mundi creationem, imò per fidem videmus quæ ante tempora secularia in æterno Dei consilio fuerunt; vt electionem & prædestinationem nostram. *Verbo Dei*) Per fidem non tantum intelligimus mundum constructum fuisse, verum constructum fuisse solo verbo & nutu Dei, neque id modò, sed ex nihilo fuisse constructum. *Vt quæ*) Sensus est, ac si dixisset: adeò vt mundus iste quem cernimus, non sit ex aliqua apparente ac subsistente materia, sed ex nihilo, conditus. Videntur hæc verba *ἰνὰ φωνημάτων* subiecta esse superioribus. Habent enim quandam exclamationis & admirationis speciem.

4 *Abel per fidem, maioris pretij sacrificium obtinuit*

obtulit Deo quàm Cain: per quam testimonium obtinuit quod esset iustus, testimonium perhibente Deo de donis eius: & per hanc mortuus adhuc loquitur.

5 Per fidem Enoch fuit translatus, ne videret mortem: nec fuit inuentus, propterea quod transtulerat eum Deus: priusquàm enim transferretur, testimonium obtinuerat quod placuisset Deo.

6 Atqui fieri non potest ut sine fide quisquam ei placeat: nam qui accedit ad Deum, hunc credere oportet esse Deum, & premia largiri ijs qui ipsum requirunt.

7 Per fidem diuinitus admonitus Noe de ijs quæ nondum videbantur, veritus, apparauit arcam ad seruandam domum suam: per quam arcam condēnauit mundum, & eius quæ ex fide est iustitia factus est hæres.

8 Per fidē vocatus Abraham auscultauit Deo ut abiret in locū quem accepturus erat in hereditatē: & exiuit, nesciens quò esset venturus.

9 Per fidem commoratus est in terra promissa ut aliena, commoratus est in Tabernaculis cum Isaac & Iacob cohæredibus eiusdem promissionis

10 Expectabat enim urbem habentem fundamenta, cuius artifex & conditor est Deus.

11 Per fidem & ipsa Sara vim ad concipiendum semen accepit, ac præter ætatis rationem peperit: quòd fidelem esse duxerit eum qui promiserat.

12 Quapropter & ex vno, eoque iam emortuo, nati sunt posterī, quanta est astrorum cœli multitudo, & quasi arena illa innumerabilis quæ est ad oram maris.

13 Secundùm fidem mortui sunt isti omnes non adepti promissa, sed eminiùs ea conspicati, postquam ipsis fuissent persuasa, & ea amplexi essent ac professi fuissent se hospites & aduenas esse in terra.

14 Nam qui hæc dicunt, palàm ostendunt se patriam querere.

15 Quòd si illius memores fuissent ex qua exierant, habere poterant tempus ad reuertendum.

16 Atqui meliorem expetunt, hoc est, cœlestē, quapropter non dedignatur ipse Deus, cognominari Deus eorum: parauerat enim eis urbem.

17 Abraham quum tentaretur, obtulit Isaac per fidem, vnigenitum, inquam, illum obtulit is qui promissiones exceperat.

18 Ad quem dictum fuerat, in Isaac vocabitur tibi semen.

19 Cùm ratiocinatus statuisset, Deum vel à mortuis excitare posse: vnde etiam illum similitudine quadam recepit.

20 Per fidem de futuris benedixit Isaac filio Iacobo & Esauo.

21 Per fidem, Iacob moriens singulis filijs Ioseph benedixit, & adorauit baculo innixus.

22 Per fidem, Ioseph moriens de egressione filiorum Israel meminit, deque ossibus suis mandauit.

23 Per

23 Per fidem, Moses quum natus esset, occultatus est menses tres à parentibus suis, quòd viderent venustum esse puerulum, & non timuerunt edictum regis.

24 Per fidem, Moses iam grandis renuit vocari filius filia Pharaonis.

25 Potius eligens simul malis vexari cum populo Dei, quàm temporariam retinere peccati fruitionem,

26 Maiores arbitratus diuitias probrũ Christi, quàm Egyptiorum thesauros. Intuebatur enim in præmij largitionem.

27 Per fidem reliquit Egyptum, nihil timens iram regis: nam vt qui videret eum qui est inuisibilis, ita forti animo fuit.

28 Per fidem peregit pascha & effusionem illam sanguinis, ne qui perimebat primogenita, ipsos angeret.

29 Per fidem transierunt rubrum mare veluti per siccam terram: cuius maris facto periculo Egyptij absorpti sunt.

30 Per fidem mœnia Iericho conciderunt, quũ circumdata fuissent ad dies septem.

31 Per fidem, Rahab meretrix illa non perijt vnà cum ijs qui non obedierant, quũ pacificè excessisset hospitio exploratores.

32 Et quid prætereà loquor? deficiet enim tempus commemorantem de Gedeone, de Barac, & Sampson, & Iephthe, & Dauide, & Samuele, ac Prophetis.

33 Qui per fidem debellarunt regna, exercuerunt iustitiā, assequuti sunt promissiones, occluserunt ora leonum.

34 Extinxerunt vim ignis, effugerunt acies gladij, validi facti sunt ex imbecillis, effecti sunt robusti in bello, exercitus exterorum in fugam verterunt.

35 Mulieres acceperunt ex resurrectione mortuos suos: alij verò distenti sunt neglecta liberatione, ut potiozem resurrectionem nanciscerentur.

36 Alij rursus ludibria, & flagella sunt experti, insuper & vincula & carcerem.

37 Lapidati sunt, dissecti sunt, tentati sunt, gladio cæsi occubuerunt, oberrauerunt cum ouillis & caprinis pellibus, destituti, oppressi, malè vexati.

38 Quibus indignus erat mundus: in desertis errantes, & montibus ac speluncis, & cauernis terræ.

39 Atque omnes hi testimonium adepti per fidem, non obtinuerunt promissum illud.

40 Quòd Deus de nobis melius quoddam prouiderat, ne absque nobis consecrarentur.

Abel per fidem) Sequuntur particularia fidei effecta, ex quibus eam commendat. Particularia voco effecta, ea quæ sunt fidei certarum quarundam personarū. Ac primū quidē habemus effecta fidei particularia quorundam Patrum, qui vixerunt primo illo mundi seculo
ante

ante diluviū, nimirū Abelis, Enochi, & Noahi. Fide Abelis tria hīc numerantur effecta: primū est, quod fides ejus effecerit vt majoris precij sacrificiū obtulerit Deo, quā Cain. Per fidem enim, primū placuit Deo persona, deinde oblatio. *Per quam*) Secundum est effectum fidei Abelis, obtinuit testimonium quod justus esset. Hoc pertinet ad illustrandum secundum illud effectū generale, de quo suprà v. 2. *Testimoniū*) Ostendit proximū effectū siue testimoniū justitiæ, quod obtinuit Abel, ex testimonio quod Deus perhibuit de donis ejus, h. e. de sacrificio ab eo oblato. Nihil expressé legitur in Genes. de hoc testimonio, verū probabile est ex collatione similium exemplorū: vt Aaronis Leuit. 9. 24. Eliæ 1. Reg. 18. 38. Davidis 1. Paralip. 21. 28. Solomonis 2. Para. 7. 1. probabile (inquam) est, sacrificium illius igne cœlitus demisso, consumptum fuisse. *Et per*) Tertium est effectum fidei Abelis: fides ejus facit vt, licet jam pridem sit mortuus, tamen adhuc viuat quodammodò & loquatur. Vide infrà 12. 24. vide Genes. 4. 10. vbi dicitur sanguinem Abelis vindictā à Deo poscere.

5 *Per fidem Enoch*) Sequitur particulare effectum fidei Enochi, sursum assumptus est à Deo. *Ne videret*) Finis, vt eriperetur à morte. *Nec fuit*) Illustratio translationis siue assumptionis ejus, ex eo quod eam sequutum est. Sic translatus est vt amplius non fuerit inuentus.

Propterea) Ratio cur non fuerit inuentus: quem enim Deus transtulit & assumpsit, quis inuenire potest? *Priusquam*) Probat per fidem fuisse translatum, hoc syllogismo. Fieri non potest ut quisquam sine fide Deo placeat: atqui Enoch priusquam transferretur testimonium obtinuerat quòd Deo placuisset: Ergo per fidem placuit Deo, & ex consequenti per fidem translatus fuit. Assumptio præcedit, Propositionis sequitur initio sequentis versus. De translatione Enoch habes Genes. 5. 22. & deinceps, ubi scribit Moses eum continenter ambulasse cum Deo: pro quo dicit hîc Apostolus eum placuisse Deo. *Testimonium obtinuerat*) Hoc pertinet ad illustrandum generale fidei effectum secundum.

6 *Nam qui accedit*) Ratio propositionis, quasi dicat, cui in animo est placere Deo, oportet eum credere, &c. Accedere enim ad Deum hoc loco est ei placere. Duo sunt hîc de Deo credenda. Primum est quòd sit Deus: Secundum est quòd talis sit, h. e. iustus sit ac benignus in eos qui ipsum requirunt. Quod de Deo primum credendum est, ad eius naturam spectat absolutè in se consideratam: quod verò de Deo secundò credendum est, de Deo est, non absolutè in se considerato, sed ut sese ad nos demittit.

7 *Per fidem*) Hoc tertium est particulare effectum fidei, nempe Noæ. Objectum fidei Noæ fuit

uit diuina admonitio , quam dicit fuisse de ijs
ebus , quæ nondum cernebantur , nempe de
diluuio post annos centum viginti euenturo.
Vide Genes. 6. Porro hæc verba indicant ef-
fectum hoc speciale fidei Noë pertinere ad il-
lustrandum generale illud effectum fidei pri-
mum. *Veritus*) Hoc primum est fidei Noë
effectum, interna nimirum reuerentia & obe-
dientia *Apparauit arcam*) Secundum effectum
fidei Noë, externa obedientia in arca apparan-
da. *Ad seruandam*) Secundum hoc effectum
illustrat, primum suo fine, ad seruandam fami-
liam suam ab aquarum diluuio, quod Dei ver-
bo credens certò futurum expectabat. *Per
quam arcam*) Deinde illustrat hoc effectum ex
duobus alijs effectis ipsum consequentibus.
Primum respicit priscum illum mūdum, quem
condemnavit per arcam illam. Nam Noë dua-
bus rebus inexcusabilem fecit priscum illum
mundum, primum verbo à se prædicato , (quo
hortatus est ad resipiscentiam, vt venturum ju-
dicium effugerent, fuit enim præco justitiæ. 2
Pet. 2. 5.) propterea quòd ei non adhibita sit
fides. Deinde verbo, ad ipsius veritatem con-
firmandam , adiecit sacramentum , arcam : vt
tum verbo , tum sacramento , priscum illum
mundum condemnaret. *Eteius quæ*) Alterum
effectum arcæ apparationem consequens, i-
psam Noë respicit , ipsius nimirum justificatio
& salus , prisci mundi condemnationi oppo-

sita. Nam factus est hæres ejus quæ per fidem est iustitiæ. Iustitiam intelligo imputatam quæ Christus tanquam hæreditatem impertit omnibus, qui per fidem ipsum apprehendunt.

8 *Per fidem vocatus*) Hactenus fuerunt effecta fidei particularia Patrum quorundam qui vixerunt ante diluvium. Sequuntur effecta fidei particularia Patrum quorundam qui vixerunt post diluvium, usque ad exitum populi ex Ægypto: & primum quidem Abrahami, qui Pater credentium vocatur. Rom. 4. 11. Effectum fidei Abrahami, est obedientia Dei voci præstita, quod Deo ipsum vocanti ex Vre Chaldæorum auscultauerit. *Vt abiret*) Descriptio quædam obedientiæ Abrahami, qua ostenditur in quo posita fuerit hæc obedientia, in eo nimirum quod abierit in eum locum, quem accepturus erat in hæreditatem, h. e. terram Canaan, quæ typus erat cælorum. *Et exiit nesciens*) Amplificat illam obedientiam Abrahami ab ignorance loci in quem venturus erat, Deus non nominavit ei locum quod iturus esset, sed dixit ei, Abi in eam terram quam monstraturus sum tibi. Genes. 12. 1. Abrahamus nihil cunctatus, in hac Dei vocatione acquievit, & Deum vocantem quasi clausis oculis secutus est, paratus ire quocunque ipsum duceret.

9 *Per fidem commoratus*) Secundum effectum fidei Abrahami. Non tantum per fidem abiit in terram promissam, sed etiam per fidem in ea commo-

commoratus est. *Vt aliena*) Exaggerat hoc effectum commorationis in terra promissa, ex duplici ipsius modo. Primùm commoratus est in ea vt aliena. Quamuis enim ad ipsum vi promissionis Dei iure spectabat, tamen Abrahamus se inquilinum & peregrinum in ea professus est. Genes. 23. 4. *In tabernaculis*) Alter commorationis modus: Commoratus est in Tabernaculis, vt hoc quasi sacramento obsignaret quod professus est, ostenderetque se stabilem sibi sedem in ea regione nō fixisse, sed in ea peregrinari. *Cum Isaac*) Illustrat nunc alterum commorationis Abrahami modum, à simili exemplo filij & nepotis, Isaaci & Iacobi; vbi obiter vides speciale hoc effectū fidei Abrahami, cum Isaaco & Iacobo communicari. *Cohæredibus*) Descriptio est Isaaci & Iacobi: quòd hæredes fuerint ejusdem cum Abrahamo promissionis. Nam facta est promissio terræ illius, non soli Abrahamo, sed & semini ipsius, & eadem promissio Isaaco & Iacobo aliquoties repetita est. Gen. 26. 3. & 28. 13. & 35. 12.

10 *Expectabat enim*) Ratio cur Abrahamus in terra promissa commoratus sit in tabernaculis: à spe urbis firmioris. Expectabat urbem habentem fundamenta, propterea nōlebat fixam sibi sedem in terra promissa statuere, sed contentus fuit commorari in tabernaculis. Per urbem habentem fundamenta intelligit cœlū,

quod eodem sensu vocatur regnum quod concuti non potest, Heb. 12. 28. Cujus Sacramentum erat terra illa Canaan. Nota igitur veteres illos Patriarchas non acquieuisse in figuris & umbris, sed per figuras & umbras intuitos esse res ipsas, quarum erant figuræ & umbræ: ut per terram Canaan Abrahamus intuitus est cælum. Nam terrestrem illam Canaan propter se non tanti fecerunt, sed propter rem significatam, neque enim promissiones Patribus factæ fuerunt rerum terrestrium, sed cælestium, quas sub terrestribus illis intellexit, & respexit Deus. Atque ita etiam impleuit Deus Patribus promissionem, data ipsis re significata, & regno cælorum, quum interea signi, h. e. terræ Canaan possessionem non essent adepti. *Cuius artifex*) Urbem hanc habentem fundamenta describit ab Authore suo, & conditore Deo.

II *Per fidem & ipsa*) Exemplo fidei Abrahami, cum quo coniunxit exemplum fidei Isaaci & Iacobi, subjungit etiam exemplum fidei Saræ; eamq; ex effectis suis commendat. *Vim ad*) Primum effectum fidei Saræ; vim ad concipiendum semen accepit, h. e. fides in Sara amissam naturæ facultatem ad concipiendum redintegrauit. Nam fides etiam collapsam naturam restaurat. *Ac præter*) Secundum effectum fidei Saræ, quod cum per ætatem, & ad parvum, & ad conceptionem inepta esset, accepit
tamen

tamen vim etiam ad partum: & re ipsa præter ætatis jam grandioris rationem peperit. *Quòd fidelem*) Causam explicat horum effectuum fidei in Sara, conceptionis videlicet, & partus, quòd fidelem, h. e. veracem judicârit Deum, quem hoc loco circumscribit promissione illa partus Saræ, de qua Genes. 18. 14. Nota ex hoc loco, qui credit obsignat quòd Deus sit verax. Ioh. 3. 33. qui verò dubitat de Dei promissione is judicat Deum non veracem.

12 *Quapropter &*) Ex proxima ratione inferit effectum illud secundum fidei Saræ, sed variè amplificatum: non solum peperit Sara, verum etiam nati sunt, non ex multis viris, sed ex vno eoque non adhuc viribus ad gignendum integro, sed jam emortuo propter ætatem. (Genes. 17. 17. 18. Rom. 4. 19) nati, inquam, sunt posterì, ijque numero infiniti. *Quanta est*) Infinitam posterorum multitudinem ostendit duplici cõparatione parium; cum numero astrorum, & arenæ maris. Hoc effectum partitur hoc loco inter fidem Abrahami & Saræ, per fidẽ, inquit, & ipsa Sara &c. vt commune sit vtriusque effectum. At Rom. 4. 18. totum tribuit soli fidei Abrahami; qui contra spem sub spe credidit, vt fieret Pater multarum gentium, quia in hoc effecto præcipuè enituit fides Abrahami, quæ tanta fuit vt Pater omnium credentium dictus fuerit. Ibid. vers. 16.

13 *Secundum fidem*) Commune effectum &

dei trium Patriarcharum, Abrahami, Isaaci, Iacobi. Per fidem mortui sunt, hoc est, mortem æqui bonique consuluerunt, & contenti fuerunt mori. *Non adepti*) Amplificatio huius fidei qua contenti fuerunt mori, ab ipsorum conditione in morte: cujus duæ sunt partes. Prima est, quòd nondùm res promissas adepti essent, sed eminùs eas conspicati. Neque enim ipsi ynquam terram promissam hæreditariò possederunt, sed eminùs viderunt eam à posteris suis fuisse possidendam. *Postquam credidissent*) Explicat quomodo conspicati sunt promissa, credentes nimirum, & fide ac spe ea amplectentes, eoque conspicati sunt ea oculo fidei. Fides igitur est, quæ facit vt etiam in maximarum rerum expectatione libenter tamen moriamur, & patiamur nos ab ijs diuelli. *Ac professi*) Altera pars conditionis ipsorum in morte: professi sunt se hospites & aduenas esse in terra, eoque terram illam, etsi a Deo ipsis promissam, non tamen esse ipsorum patriam.

14. *Nam que hæc*) Occupatio. An igitur aliam patriam quæsiuerunt? Responso affirmata est, & affirmationis ratio redditur, ex illa Patriarcharum professione. Qui dicunt se in terra hospites esse & aduenas, palàm ostendunt se patriam quærere. Cùm enim profiteor me hospitem esse in terra, idem est ac si dicerè, patriam meam esse alibi, ideoque eam profiteor me alibi

alibi quærere. Ergo hæc duo coniunguntur, hospitem esse in terra, & quærere cœlum.

15 *Quod si illius*) Occupatio vt priùs. Obiici potuit. Quærebant fortasse Patriarchæ, Abraham, Isaac, Iacob, patriam ex qua exierât, h. e. Vr Chaldæorum, Respondet negando, & negationis rationem affert syllogismo cōnexo. Si memores fuissēt illius Patriæ ex qua exierant, & eam quæsiuissent, potuissent in eā reuerti, habebant enim tempus ad reuertendū. At non sunt reuersi. Ergo non quærebant patriam, ex qua exierant.

16 *Nunc autem*) Occupatio tertia: Quam igitur patriam quærebant? Respondet eos meliorem expetere, eamque nominat cœlestem. *Quapropter non*) Probat eos cœlestem Patriam expetiuisse, à titulo quo se vocari voluit Deus. Vocauit se Deū Abrahami, Isaaci, & Iacobi. Ergo expetiuerunt illi cœlestem Patriā. Nam hic ipse titulus arguebat eos ciues esse regni Dei, & cœlestis patriæ. Non ait simpliciter, Deum vocasse se eorum Deum: sed non erubuisse vocari eorum Deum: quo significatur Deum se iis quodammodo demississe hoc ipso quod vocari voluerit eorum Deus. *Parauerat enim*) Ratio consecutionis. Ideò voluit vocari eorum Deus, quia parauerat iis urbem. Ergo vel hic ipse Dei titulus testatur eos aliā urbē, illam nimirum cœlestem, expetiuisse. Urbem enim intelligit habentem fundamēta, de qua

ſuprà verſ. 10. quam parauerat ijs Deus ab æterno. Vnde Math. 25 34. vocatur regnum electis paratum à jactis mundi fundamentis.

17 *Abraham quam*) Tertium effectum fidei Abrahami. Cùm à Deo tentaretur & exploraretur, per fidem obtulit Isaacum. Dicitur Abrahamus Isaacum obtuliſſe, quia etſi non re ipſa & facto, tamen intentione & propoſito eum obtulit, & Isaacus Abrahami propoſito erat iam mortuus & occiſus. *Vnigenitum*) Amplificatio effecti huius Abrahami, quòd obtulerit eum quamvis vnigenitum, quod maius eſt quàm ſi filium tantùm obtuliſſet. *Is qui promiſſiones*) Secunda amplificatio à perſona offerentis: is ipſe obtulit Isaacum, qui promiſſiones acceperat.

18 *Ad quem dictum*) Tertia amplificatio à promiſſione ipſa, quæ non fuit generalis, de quocunque filio ex Abrahamo genito, aut gignendo, ſed ſpecialis de Isaac nominatim: vt oſtenditur recitatis promiſſionis verbis. In Isaac vocabitur tibi ſemen. Genes. 21. 12.

19 *Quum illud*) Cauſam oſtēdit; quæ mouit Abrahamum vt offerret filium ſuum Isaacum. Cauſa fuit conſideratio potentiæ Dei, qua vel ex mortuis excitare potuit Isaacum, eumque viuificare. Niſi enim perpendiſſet ſecum, Deū poſſe Isaacum mortuum viuificare, vt in eo ſemen vocaretur, nequaquam eum obtuliſſet. Fundamētum igitur tantę in Abrahamo fidei, fuit,

fuit potentia Dei, de qua fuit persuasus. Idem fundamentum fidei Abrahami habes etiam Rom. 4. 17. vbi dicitur credidisse Deo viuificantem mortuos, & vocanti ea quæ non sunt tanquam sint: & ibidem vers. 10. 21 aduersus promissionem Dei non disceptauit infidelitate, sed robustus factus est fide tributa gloria Deo, ac plenè persuasum habēs, πληροφοροῦς, eum quod promiserat posse etiā facere. Πληροφορία hæc potentia diuinæ hominem ita sustentat, vt etiam summas difficultates, quæ promissionibus Dei videntur esse prorsus contrariæ, earumque impletionem impedire, facillè superet. *Vnde etiam*) Euentus fidei quæ Dei illa potentia nitebatur: recepit eum similitudine quadam quasi à mortuis excitatum. Neque enim vera fuit Isaaci mors, sed similitudinaria (mortuus enim est mēte & proposito Abrahami) eoque etiam similitudine quadam à mortuis resurrexit. Hæc autē similitudinaria mors & resurrectio Isaaci, typus fuit veræ mortis & resurrectionis Christi.

20 *Per fidem*) Secundum particulare exemplum fidei Patrum, qui fuerunt ante exitum populi ex Ægypto, est Isaaci. Isaacus per fidem benedixit duobus filiis, Iacobo & Esauo, Iacobum Esauo præponit, quia ius primogenituræ pertinebat ad Iacobum, qui propterea primam accepit benedictionem, e. m. q; non rerum temporalium tantum, sed etiam spirituali-

um. Et (au secundam accepit benedictionem, rerum temporalium tantum, non spiritualium. Benedictio hæc utrâq; processit ex fide, qua Isaac tanquam propheta Dei credidit hæc ita esse futura quemadmodum prædicebat. Ergo pertinet hoc effectum ad illustrandû generale illud fidei effectum primum, quod commune est cuiusq; fidei, & hîc ad extraordinariam fidem qualis fuit Prophetarum, extenditur.

21 *Per fidem Iacob*) Tertium particulare exemplum fidei Patrum, ante exitum populi ex Ægypto, est Iacobi, qui per fidem (extraordinariam intellige qualis fuit Prophetarum) moriens benedixit duobus filiis Iosephi, Ephraim & Manasse. Nota igitur, ne ipsam quidem mortem imminuentem impedire operationem Spiritus sancti per fidem. *Et adorauit*) Alterum effectum fidei Iacobi. Per fidem adorauit Deum post prolatam benedictionem, ut eam Deus effectam redderet. *Baculo innixus*) Situs adorantis notatur, ex Genes. 47. 31. ubi in Hebræo dicitur adorasse ad cervical lecti: quum hîc dicatur adorasse baculo innixus, prout etiam locum illum Genesios verterunt septuaginta interpretes, sed utrumque coniunctim erat verum. Nam senex Iacob benedicturus filiis Iosephi, surrexit è lecto, & baculum manu prehendit quo se sustineret, absoluit autem benedictione inclinavit se ad cervical lecti, ut interea aliqua ex parte etiam

tiam baculo inniteretur. Hebræa autem vox quæ hic habetur, variatis punctis, vel ceruical, vel baculum significat.

22 *Per fidem Ioseph*) Quartum exemplū particulare fidei Patrum ante exitum populi ex Ægypto, est Iosephi: primū effectum fidei Iosephi est, quod meminit de egressione filiorum Israel ex Ægypto. Pertinet hoc ad illustrandum generale illud fidei effectum primum. *Deque ossibus*) Secundum effectum fidei Iosephi: mandauit de ossibus suis, vt perferrentur in terram Canaan: oritur ex primo effectu, quo certò persuasus fuit Iosephus filios Israelis terram Canaan possessuros.

23 *Per fidem Moses*) Sequitur tertia classis effectorum fidei particularium, Patrum quī fuerunt ab exitu populi ex Ægypto vsque ad introitum in terram promissam, initio sumpto à Mose qui populum ex Ægypto eduxit. Verum effectus fidei Mosi præmittit effecta fidei parentum Mosi, quibus transit quodammodò ad effecta Mosi ipsius. Effecta fidei parentum Mosi duo sunt, καὶ ὅτι ἐπαῶσιν proposita. Primum enim effectum in fine versus est internum in corde: non timuerunt iniustum & impium Pharaonis edictum, quo mandauerat vt omnes filij qui nascerentur Israelitis in riuum proiicerentur: Fides enim timorem expulerat. Secundum effectum (de quo initio versus) ex hoc priori sequitur, externum nimirum

ipforum factum in occultando Mose per tres menses. *Quod viderent*) Causa impellens parentes Mosi ad eum occultandum, venustas pueruli extraordinaria (fuit enim diuinitus venustus. Act. 7. 20.) quæ adiuuans fuit causa illius fidei, qua occultarunt Mosem: fides enim ipsa, qua diuina inspiratione præuiderunt puerulum illum fore liberatorem populi, fuit causa principalis.

24 *Per fidem*) Sequuntur particularia effecta fidei Mosi ipsius: Primum est, quod iam grandis natu renuit vocari filius filię Pharaonis.

25 *Potius eligens*) Fundamentum affert hujus effecti, cur renuerit Moses vocari filius filię Pharaonis, quod est electio Mosi factum hoc præcedens, qua ex duobus propositis alterum eligit. Duo hæc erant Mosi proposita, vel vt malis afficeretur cum populo Dei, vel vt temporarijs commodis peccati fruëretur. Ex his duobus eligit Moses potius vt malis afficeretur cum populo Dei, electionem hanc sequitur factum, renuit vocari filius filię Pharaonis.

Temporarys commodis) Peccato tribuit commodi sua: nam ministrat hominibus honores, dignitates, opes, &c. quibus tanquam illecebris Diabolus ad peccandum sollicitat: verum hæc omnia commodi temporaria sunt: nam interea dum his commodis fruitur homo, peccatum eum præcipitat in inferos, & mortem æternam affert: nam finis peccati mors, Rom. 6. 23.

26 *Maiores arbitratus*) Ratio & fundamentum electionis huius: neque enim temerè elegit Moyses sed præcedente mentis iudicio & arbitrio. Propositis enim duobus illis de quibus dictum, primùm de propositis mens iudicat, & resoluit in alteram partem, maiores nimirum esse diuitias probrum Christi, & afflictiones cum populo ipsius, quàm Ægyptiorum thesauros. Mentis iudiciũ sequitur voluntatis electio, eligit potiùs probrum Christi, & malis affligi cum Ecclesia ipsius, quàm temporaria peccati cõmoda: electionem postremò sequitur actio. Probrum Christi vocat diuitias maiores quàm Ægyptiorum thesauros, quo quidem significat, nihil in hoc mundo gloriosius esse, nihil magis honorificum & pluris faciendum, quàm Christi probrum & crucem, quæ vel omnia regum terrenorum diademata facilè exuperat. Vnde solet Paulus hoc titulo, tanquam imprimis glorioso se ornare; quòd sit captivus Iesu Christi. Ephes. 3. 1. Philem. 1. & Gal. 6. 14. omnem aliam gloriandi materiã abominatur præter crucem Christi. *Intuebatur enim*) Fundamentum est resolutionis huius, quod mouit Moysen vt maiores arbitratus sit diuitias probrũ Christi, quàm Ægyptiorum thesauros. Non temerè mens in iudicando resoluit in alteram partem, sed in deliberando intuebatur in præmij largitionem: Deus enim largitur præmia ijs qui ipsum requirunt. suprà vers. 6. Præmium autẽ hĩc

tribuitur afflictionibus Moſis pro Chriſto, tanquam totidem testimonijs fidei ex qua fluxerunt. Itaque impropria eſt loquutio, qua præmium non aſcribitur fidei, & merito Chriſti fidem apprehenſo, h. e. cauſæ: ſed effectui eius, ut non ſit quod Papiſtæ in huiusmodi loquutionibus meritum ſuorum operum quærant.

27 *Per fidem reliquit*) Alterum effectum fidei Moſis: per fidem reliquit Ægyptum, poſtquam renuiſſet vocari filius filię Pharaonis: ita effecta fidei in Moſe incrementa capiunt. *Nihil timens*) Externum hoc fidei effectum oſtendit ab interno cordis effecto promanare: nam fides primùm reformat cor, illudq; ab affectibus vitioſis repurgat, ut hîc in Moſe expellit timorem iræ iniuſtæ Regis: deinde reformat etiam externas actiones. *Nam ut qui*) Hanc Moſis fortitudinē in nihil timēdo iram Regis, reſoluit in altius fundamentum, viſionem nimirum Dei inuiſibilis. Pertinet igitur hoc ad illuſtrandum generale fidei effectum primum, Demonſtrat ea quæ non videntur. Nota igitur effecta fidei non eſſe temeraria, ſed ſolidis niti fundamētis. Primū vidit Moſes eū qui eſt inuiſibilis. Hinc factū eſt ut forti animo fuerit, & nihil timuerit iram Regis: contempta Regis ira relinquit Ægyptum. Nota deindē, non eſt verē fortis animus niſi illius ſolūm hominis qui videt Deum. Nam fortitudinis cauſa eſt viſio Dei.

28 *Per fidem*) Effectum aliud fidei particulare Moſis

Mosis simul & populi, peregit pascha & effusione sanguinis. Nam Moses & populus ex Dei mandato obseruarunt pascha, ante liberationem ex Ægypto, & acceptum paruæ pecudis per singulas domos cæsæ sanguinem imposuerunt duobus postibus & superliminari portæ domus cuiusque Israelitarum, quo sanguine conspecto transiuit Iehoua præter portam illam, nec passus est interfectorem, (qui primogenita Ægyptiorum occidebat) ingredi domos ipsorum. Vnde finis effecti hujus Mosis & populi hîc adijcitur, ne angelus qui perimebat primogenita, ipsos tangeret. Vide Exod. 12. Nota igitur quanta fuerit vis in typo, in sanguine Agni, ad seruandum Israelitas, ne Angelus interfectior ipsos vel tangeret, nedum perimeret: quanto major vis ad seruandum est in ipso Christi sanguine pro nobis in cruce effuso.

29 *Per fidem transierunt*) Aliud effectum fidei Mosis & populi. Per fidem salui transierunt mare rubrum, veluti per siccam terram. Fides enim ipsorum in Christum aquas cohibuit & sustinuit, ne in ipsos irruerent. *Cuius facti*) Amplificatio hujus fidei Mosis & populi, qua mare rubrum transierunt, à contrario penitus euentu in Ægyptijs, qui sine fide eundem transitum tentantes aquis absorpti sunt.

30 *Per fidem mœnia*) Quarta classis effectuum fidei particularium, eorum Patrum qui

fuerunt ab introitu populi in terram promissam tempore Iudicum & Regum, usque ad tempus Machabæorum. Primum hoc effectum fidei, est Iosua & populi, qui crediderunt verbo Dei promittentis fore, ut postquam septem diebus circuissent Ierichuntem cum septem sacerdotibus clangentibus buccinis arietinis, & die septimo eam circuissent septies, conciderent ejus mœnia. Huic promissioni crediderunt Iosua, & populus, & juxta præscriptum Dei circuiuerunt mœnia Ierichuntis septem dies. Vnde secutus est euentus à Deo prædictus, conciderunt mœnia Ciuitatis. Vide Iosua 6.

31 *Per fidem Rahab*) Secundum particulare effectum fidei, Rahab meretricis. Obiectum fidei Rahab, fuit verbum Dei, quo promisit Israelitas possessuros terram Canaan. Huic credidit Rahab, ut ipsa profiteretur Iosua 2. 9. Hinc factum est ut seruaretur & non perierit, pereuntibus reliquis incolis Ierichuntis, qui verbo huic non crediderant & obedierant. *Is qui non*) Significat causam perditionis Ierichuntinorum fuisse infidelitatem, qua non obedierunt Dei verbo. *Quum pacificè*) Fidem illam Rahab meretricis illustrat suo opere: neque enim fuit fides otiosa, sed per charitatem agens. Nam pacificè, hoc est, pacato & beneuolo animo, exploratores Israelitarum hospitio excepit, eosque dimisit incolumes, quod veræ

veræ in ipsa fidei testimonium fuit, & eam vera fide coram Deo justificatam esse hominibus testabatur. Vnde dicit Iacobus eam ex operibus justificatam esse, hoc est, ex operibus suis hominibus ostendisse, se fide vera, non mortua & operum experte, coram Deo esse justificatam. Iacob. 2. 25.

32 *Et quid præterea*) Per præteritionem inducit cætera exempla, quæ sunt hujus classis à Iosua primo Iudice, ad ætatem Machabæorum. *Deficiet enim*) Ratio præteritionis: qua significat se breuitatis causa horum omnium Patrum exempla prætermittere: Inducit autem hîc nominatim exempla, primùm quatuor Iudicam, Gedeonis, Barac, Sampsonis, & Iephthæ. Deindè Regis vnus, Davidis: tertio Samuelis Iudicis, ac Prophetæ: postremò Prophetarum, vt Eliæ, Elisæi, Danielis &c.

33 *Qui per fidem*) Vt priùs accumulauit personas, ita nunc accumulatur personarum effectus ex fide promanantia: Nam fide illa qua crediderunt Dei verbo, siue ordinariè, siue extra ordinem reuelato, hæc omnia effecta producta sunt. Primùm effectū est, Per fidem debellarunt regna (adjacentia nimium) vt Ammonitarum, Edomæorum &c. *Exercuerunt*) Secundum effectum: exercuerunt iustitiam, vt Barac, Samuel, David, & reliqui ferè omnes. *Asssecuti sunt*) Tertium effectum omnibus commune: Asssecuti sunt promissiones. Sic David asssecu-

tus est regnum promissum. *Occluserunt ora*) Quartum effectum: Occluserunt per fidem ora leonum, vt Samson. Iudic. 14. 7. Dauid. 1. Sam. 17. 35. Benaja comes Dauidis. 2. Sam. 23. 20. Daniel. Dan. 6. 23. vbi expressè fidei Danieli tribuitur, quod occlusa sunt ora leonum.

34 *Extinxerunt vim*) Quintum effectum: extinxerunt vim ignis, vt socij Danielis, quorum in ignem injectorum ne pilum quidem capitis ignis exusserat, quamuis viros illos qui ipsos intrudebant interfecissent scintillæ ejus. Dan. 3. 22. 27. *Effugerunt*) Sextum effectum: Effugerunt aciem gladij, vt Elias quem maxime cupiebat Iezabel gladio occidere. 1. Reg. 19. 2. *Validis factis*) Septimum effectum. Validi euaserunt ex imbecillis, vt Ezechias qui ægrotauit vsquè ad mortem, fide sanitatem & valetudinem recuperauit. *Effecti sunt*) Octauum effectum: robusti effecti sunt in bello, vt Samson, qui maxilla asini percussit mille Philistæos: sic Barac, Iephthe, Dauid, & alij, *Exercitus*) Nonum effectum: Exercitus exterorum venterunt in fugam, vt Gedeon, Iephthe, & alij plerique.

35 *Mulieres acceperunt*) Decimum effectum quod mulieribus tribuitur. Per fidem acceperunt mortuos suos, ex resurrectione vitæ restitutos, vt vidua Sareptana recepit filium suum vitæ restitutum precibus Eliæ. 1. Reg. 17. 22. 23. Sic Schunamitis accepit filium suum vitæ redditum

ditum per Elifæum. 2. Reg. 4. 36. 37.

Alij verò dissenti) Quinta & vltima classis effectuum fidei particularium est earum personarum quæ fuerunt temporibus Machabæorum, vsque ad Christum. Breuitatis causa non distinxit hæc exempla, neque nominauit certas personas, sed suppressis nominibus con-gessit effecta fidei personarum. Sunt autem hæc effecta passionum magis quam actionum: quum præcedentia omnia fuerint actionum; vt videas fidem non minùs efficacem esse & potentem in patiundo, quàm in agendo. Hæc autem effecta quæ sunt passionum, partim sunt tentationes quæ mortem antecedunt, partim sunt mortis genera quæque crudelissima, partim denique cernuntur in fuga persecutio-num miserrima. Tentationum quæ mortem antecedunt, & ad defectionem sollicitant genera aliquot hîc inducuntur. Primum est quo distendebantur corpora sanctorum tympanis. Est autem *τυμπανὸν* instrumentum quo ita distendebantur fontes cùm erant cadendi, aut examinandi flagris, vt nullam corporis sui partem vel latum vnguem mouere possent; sed fustigantium & pulsantium plagis in omnes partes essent expositi. Hoc tormenti genere, plerique in immani illa Antiochi persecutione excruciiati sunt. 2. Machab. 6. *Neglecta*) Amplificatio tormenti huius, quod perpeffi sunt fideles nonnulli, quòd propositam ipsis condi-

tionem liberationis, si fidem abnegarent, neglexerint, & contempserint: vt de Eliazaro quodam legitur. 2. Machab. 6. 21. & deinceps. *Vt potiolem*) Finis propter quem neglecta liberatione acerbissima tormenta patienter sunt perpeffi, vt in vltimo illo die resurgeret à mortuis ad vitam æternam, quam vocat resurrectionem potiolem hac, quæ est à morte præfente, cum abnegatione veritatis, & salutis æternæ difpendio. Nota igitur: homini pio & fideli non elle, ne ipsam quidem corporis curam abijciendam, sed simul prospiciendum elle æternæ, tum corporis, tum animæ salutis.

36 *Alj rurſus*) Secundum genus tentationum. quæ mortem antecedunt & ad defectionem sollicitant, ludibria à quibus processerunt ad flagella. *Insuper &*) Tertium genus istarum tentationum, vincula & carceres.

37 *Lapidati sunt*) Secundus ordo passionum continet mortis genera quæque crudelissima. Cujusmodi hîc aliqua enumerantur, 1. lapidati sunt, 2. ferra dissecti sunt, vt de Isaia scribit Hieronymus. 3. cremati sunt & igni traditi. Nam pro *ἐπεπαρθεύσαν* tentati sunt, legendum videtur *ἐπυρπασθεύσαν* cremati sunt, quod cûm præcedentibus & sequentibus magis videtur congruere. 4. gladio cæsi occubuerunt. *Oberrauerunt*) Tertius ordo passionum: fuga à persecutione miserrima: quæ varijs adjunctis incommodis amplificatur: Primum oberrauerunt induti

yilibus

vilibus vestimentis , vtpote ouillis & caprinis pellibus : deinde bonis omnibus ad vitam pertinentibus destituti : tertio oppressi & omni ex parte malè habiti.

38 *Quibus indignus*) Obiter inserta est ratio, cur sic oberrauerint , & ad deserta loca confugerint , quia ijs indignus erat mundus , hoc est, mali in mundo homines , ideò mundo relicto confugerunt ad loca deserta: Putauit quidem mundus eos se & sua societate indignos : At contrà Deus mundum ijs indignum esse censuit, dum eos à mundo seuocaret. Hac ergo ratione exaggeratur hominum à quibus fugerunt, impietas. *In desertis errantes*) Secunda amplificatio fugæ sanctorum , à locis in quibus oberrauerunt , quæ, hîc aliquot inducuntur: vt deserta, montes, speluncæ, cauernæ, quæ ferarum, non hominum, habitationi destinantur.

39 *Atque hi omnes*) Amplificatio est , & commendatio fidei eorum , quod quamuis hæc omnia per fidem in promissionem sustinuerint , ac testimonium à Deo adepti sint per fidem , tamen non obtinuerunt promissum , hoc est, non viderunt Christum in carne manifestatum & exhibitum , sed eminùs tantùm venturum conipicari sunt. Cùm dicit eos per fidem testimonium adeptos, significat hæc particularia eorum effecta pertinere ad illustrandum fidei effectum generale secundum.

40 *Quod Deus de nobis*) Ratio cur non obtinuerunt promissum: Deus differendo promissum melius quiddam de nobis prouidit. Nam patefactio Christi & ejus aduentus in carne, dilata est in vltima tempora propter nos, in quos (teste Paulo) fines seculorum inciderunt. 1. Corinth. 10. 11. Vnde Petrus dicit, Christum patefactum vltimis temporibus propter nos, qui per eum credimus Deo. 1. Epistol. 1. 20. *Ne absque nobis*) Si venisset Christus ætate priscorum illorum Patrum, fuissent illi absque nobis consecrati & glorificati: nos autem fuissetus neglecti: quia exhibito Christo nihil aliud quàm finis mundi expectari potest. Ergo noluit Deus eos obtinere promissum, & Christum videre re ipsa exhibitum, vt nostræ salutis consuleret nè nos à participatione gloriæ excluderemur.

Argumentum Capitis duodecimi.

Hoc capite primùm redit ad institutam exhortationem ad perseverantiã in fide, cuiusque duo affert argumenta, decimumquartum & decimumquintum ad vers. 3. Deinde speciales aliquot sunt exhortationes, ad patientiam in afflictionibus, ad præeundum alijs bono exemplo, ad pacem, ad sanctimoniam &c. ad vers. vsque 25. Postremò redit ad exhortationem principalem, cuiusque tria adducit argumenta, ad finem capitis.

CAPVT. XII.

1 *Proinde nos quoque, quum tanta nos circumstet
testium*

testium nubes, abiecto omni pondere, & peccato ad nos circumcingendos procliui, constanter propositum nobis stadium decurramus.

2 *Intuentes in fidei ducem ac perfectorem Iesum, qui pro sibi proposito gaudio pertulit crucem, ignominia contempta, & ad dexteram throni Dei consedit.*

Proinde nos quoque) Post digressionem in commendationem fidei, redit ad institutâ exhortationem ad constantiam & perseverantiam in fide. Estque hoc argumentum exhortationis decimumquartum, à testibus, siue ab exemplis credētium, qui perseverârunt in fide. Accommodat enim ad institutum ea quæ in digressionem dicta sunt capite superiori. *Testium nubes)* Amplificatio argumenti est, à testiū multitudine, quæ nubis voce intelligitur, qua metaphoricōs multitudo quasi coagulata significatur. *Constanter propositum)* Exhortatio ipsa est metaphoricis verbis expressa. Metaphora est ab iis qui in stadio currūt, Scripturæ familiaris. vt 1. Cor. 9. 24. & deinceps. Heb. 6. 18. Nam hominis Christiani vita est quasi cursus in stadio, & Christianus homo quasi in stadio currit ad metā, & palmam illam supernæ vocationis, experiens ecquo modo perveniat ad resurrectionem mortuorum. Philip. 3. 11. 14. *Constanter)* Legem currendi præscribit, vt currant per patientiam. Neque enim satis est currere, sed servandę sunt leges in cur-

rando. Nō coronatur (inquit Paulus) nisi qui legitimè (hoc est, seruatis certandi legibus) certauerit. Hæc igitur lex est currendi præcipua, vt constanter & cum patientia decurrât, inoffenso pede, præteritis omnibus impedimenti quæ cursum ipsorū remorari possint. *Propositum*) Stadium vocat propositum, quia vt meta, ita vt stadiū ac via ad metam perueniendi nobis à Deo proponitur. Sic spem propositam dicit. *Heb. 6. 18. Abiecto omni*) Modus decurrendi constanter hoc stadium obiecto omni pondere: deindè pondus illud interpretatur peccatum. Neq; enim progressum aliquè in cursu potest facere, qui cum pondere currit: nullum autem pōdus est quo impedimur in hoc cursu præter peccatum, quo quidem abiecto facillimus nobis & expeditissimus esset cursus ad metam. Duobus autem modis hoc peccati pōdus abjicitur: Primum quidem dū imponitur quasi humeris Christi, qui volens peccata nostra pertulit in corpore suo super lignum. *1. Pet. 2. 24.* & factus est pro nobis peccatum. *2. Corinth. 5. 21.* Deindè dum per Spiritum Christi sanctificamur, & purgantur corda nostra ab inhærente in nobis peccato. Atque hoc quidem modo posteriore non profus in hac vita abjicitur peccati pōdus: Manēt enim aliquæ reliquiæ peccati quamdiu hīc sumus: Vnde est grauissima illa Pauli lamentatio: Miser ego homo, quis

me eripiet ex isto corpore mortis? Rom. 7. 24. & 2. Corinth. 5. 4. Suspiramus onerati: sed danda nobis est opera ut peccatum indies magis ac magis mortificetur in nobis, ut tandem aliquando prorsus leuati hoc onere ad metam perueniamus. *Ad nos circumcingendos*) Descriptio quædam est huius peccati ac ponderis, quod sua natura nos circumcingat, tanquam murus aut maceries quædam, vndique aditum nobis præcludens ad cælos, & cursum nostrum in hoc stadio impediens, ut nisi eo superato, & diruta quasi hæc macerie, propositum nobis stadium non possimus decurrere.

2. *Intuentes in fidei*) Argumentum exhortationis præcipuæ decimumquintum, ab ipsius Christi exemplo, quod maioris est momenti quam reliqua omnia sanctorum exempla. Iesus per mediam crucem & ignominiam decurrit stadium sibi propositum. Ergo intuendum nobis est in eum ut propositum &c. *Fide ducem*) Descriptio est Christi, ad commendationem personæ pertinaens, ut eò magis incitemur ad imitandum ipsius exemplum in decurrèdo hoc stadio. Vocat eum primum ducem fidei, quia præit nobis viam, & ducit nos in hoc fidei stadio, imò ipse est via qua nobis eundum est ad metam, ut se appellat Ioan. 14. 6. Deindè vocat eum fidei perfectorem, quia finis est fidei nostræ, in quo fides nostra consummatur ac per-

ficitur. Duo enim sunt quæ Christum respiciunt, fides & aspectus: fide incedimus in hac vita, ait Apost. 2. Corinth. 5. 7. & eatenus quidem Christus est dux fidei: At in altera vita fides mutabitur in aspectum, quia videbimus eum sicuti est. 1. Ioann. 3. 2. & tum quidem Christus erit fidei nostræ perfectior. Fides enim, ut & spes, imperfectum quiddam est, & via tantummodò ad perfectionem, eoque non est nobis in ea acquiescendum. Perfectio autem & beatitas nostra est in aspectu. Atque ita Christus perficiet fidem nostram, dum eam mutabit in aspectum. Ergo in decurrendo hoc stadium nobis propositum oportet perpetuò inueniri & ob oculos habere Christum, primum quidem ut præcursorem & ducem cursus nostri, præcuntem nobis per crucem & ignominiam: deindè ut finem & perfectionem cursus nostri & laborum nostrorum omnium coronam, quæ posita est in aspectu Christi glorificati, ut nunquam debeat oculus noster, neq; in hac vita, neque post hanc vitam in altera illa, à Christo distrahi. *Pertulit crucem*) Hæc via est qua præiuit nobis Christus, perferendo nimirum crucem. *Ignominia*) Docet quomodo hac via præiuerit, contempta videlicet ignominia, nempe crucis, quæ profectò omnium maxima fuit, siue externam illam respicias in morte omnium ignominiosissima, siue internam illam, quam interea in anima, iram Dei & horro-

horrores ac cruciatus inferorum perpetiente, sensit: cuius externa illa mortis ignominia fuit tantum testimonium externum. Quæ enim potest esse maior ignominia quam ea qua reprobis detectis ipsorum peccatis in ultimo die afficientur, quam Scriptura vocat pudorem, & confusionem, eamque æternam? Atque hæc fuit ignominia, quam imposuisti ipsi peccatis nostris pertulit Christus, sine qua nos ab æterna illa ignominia liberare nunquam potuisset. *Vice sibi propositi*) Amplificatio crucis quam pertulit, à contrario gaudio sibi proposito, quo utpotè Deus coæternus cum Patre frui potuisset: vice tamen gaudij huius, facta quasi permutatione, pertulit crucem. Vide Philip. 2. 6. 7. Cùm esset in forma Dei, non duxit rapinam æqualem esse cum Deo: sed ipse se exinaniuit &c. Vide igitur quantum mali sit in peccato, cui satisfieri non potuit, nisi Christus deposito quasi gaudio, & gloria Deitatis, pro nobis crucem pertulisset, & se exinaniuisset, factus obediens ad mortem, mortem autem crucis. Debet hoc nos mouere ad detestationem peccati, *Contempta*) Interea dum pateretur, crucem & ignominiam contempsit. At quomodo contempsit eam, cùm legamus in historia Evangelica eum gravissimè tulisse, ut quum queritur, Eli, Eli, lamma sabachthani. Matth. 27. 46. imò profitetur tristem fuisse animam suam usque ad mortem. Matth. 26. 38. quomodo igitur

ignominiam contempsit? Respondeo contemptum hunc positum esse in eo, quòd volēs ignominiam crucis subierit, quemadmodum pij mortem contemnunt, non quidem eam irridendo, sed voluntariè subeūdo, spe vitæ illius gloriosæ qua fruuntur. Causa verò cur Christus mortem tam grauitè tulerit, fuit, quia mortuus est peccati nomine. Cū autem quis moritur propter peccatum, nullus potest esse pœnæ modus, sed necesse est pœnam esse infinitam, vt in reprobis qui propter peccata sua moriuntur. Martyrum nullus mortuus est propter peccata, sed eius tantū causa, qui propter ipsorum peccata mortuus est, eoque certò persuasi erant remissa esse sibi peccata. Vnde internum quod sentiebant animi gaudium absorbebat externum corporis dolorem. *Et ad dexteram*) Commendatio crucis Christi, ab euentu qui hās eius perpeſſiones inſecutus eſt, qui continet argumentum quo nos excitemur ad ferendam crucem pro Christo. Conſedit ad dexteram throni Dei, hoc eſt, conſecutus eſt ſummam gloriam. De hac gloria Chriſti perpeſſiones inſecuta vide Philipp. 2. 9. Quapropter extulit eum Deus in ſummam ſublimitatem, & donauit ei nomen quod eſt ſupra omne nomen: &c. Sic & noſtras quoque afflictiones conſequitur gloria, ſed latum eſt diſcrimen. Nam Chriſti afflictiones & perpeſſiones promeritæ ſunt gloriam, quia
Deus

Deus passus est, ideò adhibetur eo loco particula causalis *ideo*, quapropter, (hoc est, propter illam humiliationem utpotè meritoriam) exaltauit eum Deus: Sed afflictiones nostræ non merentur gloriam: Non enim sunt paria quæ præsentì tempore perpetimur, futuræ gloriæ in nobis retegendæ. Rom. cap. 8. vers. 18.

3 *Reputate igitur quis ille sit qui talem sustinuit à peccatoribus aduersus sese contradictionem, ne animis remissi, fatiscatis.*

4 *Nondum ad sanguinem vsque restitistis, aduersus peccatum decertantes.*

5 *Et obliti estis exhortationis, quæ vobis tanquam filijs loquitur, Fili mi, ne negligito castigationem Domini, neque remissus esto quum ab eo argueris.*

6 *Quem enim diligit Dominus castigat, & flagellat quemcunque filium recipit.*

7 *Si castigationem sustinetis, Deus sese vobis offert ut filijs (quis enim est filius quem non castiget pater?)*

8 *Quòd si estis absque castigatione, cuius participes sunt omnes nempè spurij estis, & non filij.*

9 *Deinde corporum nostrorum patres habuimus castigatores, & eos reueriti sumus: an non multò magis subijciemur patri spirituum, & viuemus?*

10 *Nam illi ad paucos dies prout ipsis videbatur, nos castigabant: hîc autem ad com-*

modum nostrum, ut participes simus sanctimonie ipsius.

11 *Omnis autem castigatio in præsens quidem non videtur esse gaudij, sed tristitia: at postea fructum tranquillum iustitie reddit iis qui per eam fuerint exercitati.*

12 *Quapropter manus remissas & genua soluta surrigite.*

13 *Et rectas orbitas facite pedibus vestris, ne quod claudum est abducatur à via, sed ut sanetur potius.*

14 *Pacem sectamini cum omnibus, & sanctimoniam, sine qua nemo videbit Dominum.*

15 *Prospicientes ne quis deficiat à gratia Dei: nequa radix amara suppullulans obturbet, & per hanc inquinentur multi.*

16 *Ne quis sit scortator, aut profanus, velut Esau, qui unico edulio vendidit suum ius primogeniti.*

17 *Scitis enim eam etiam postea, quum vellet hereditario iure benedictionem assequi: reprobatum fuisse: nō enim reperit pœnitentie locū, quamvis cum lachrymis benedictionem illam exquisisset.*

18 *Non enim accessistis ad contrectabilem montem, & incensum ignem, ac turbinem & caliginem, & procellam:*

19 *Tubæque sonitum & vocem verborum: quam qui audierant, deprecati sunt ne ampliùs sibi fieret sermo.*

20 *(Non enim ferebant quod imperabatur, si vel*

Si vel bestia tetigerit montem, lapidabitur, aut iaculo configetur.

21 *Et Moses (adeò terribile erat visum quod apparebat) dixit, Expauēfactus sum ac tremebundus.)*

22 *Sed accessistis ad montem Sion, & ciuitatem Dei viui, Hierusalem cœlestem, & myriadas Angelorum.*

23 *Conuentum & concionem primogenitorum qui conscripti sunt in cœlis: & iudicem vniuersorum Deum, & spiritus iustorum consummatorum.*

24 *Et ad noui Testamenti mediatorem Iesum, & sanguinem aspersiois, præstantiora loquentem quàm loqueretur sanguis Abel.*

Reputate igitur) Quia Christus stadium sibi propositum per crucem & ignominiam decurrit, & per multas afflictiones gloriam consecutus est, ideò nos quoque exemplo Christi hortatur ad afflictiones fortiter sustinendas, nè animis deficientes fatiscamus, atque ita remouet impedimentum perseuerantiæ nostræ, afflictiones & persecutionem, nè propter eas deficiamus. Primum argumentum est ab exemplo afflictionum Christi, quod exaggeratur varijs circumstantijs, ad quarum seriam considerationem nos excitat, dum dicit (Reputate) Quo verbo innuit in passione Christi multa nobis esse diligenter consideranda & ponderanda, quæ in nullius alterius passione occur-

runt: Vt igitur Christi exemplo excitemur ad ferendum patienter afflictiones, oportet penitus inspiciamus omnes circumstantias passionis ipsius. *Quis ille*) Prima circumstantia est personæ eius qui afflictiones has sustinuit. *Quis*, id est, quàm dignus, quàm excellens, utpotè Dominus gloriæ. Quàm indignum sit Dominum gloriæ pati, & crucifigi significat Paulus quum dicit, Nequaquam Dominum gloriæ crucifixissent. 1. Corinth. 2. 8. ubi gloriam Christi, & crucis ignominiam, tanquam res inter se pugnatissimas opponit. Quæ enim potest esse consensio inter summam gloriam, & extremam ignominiam? Atque hæc causa etiam est cur temporaria ipsius mors æquiuallens fuerit morti æternæ, quæ peccatoribus debebatur, personæ nimirum dignitas, quod Filius Dei, Dominus gloriæ passus sit in carne. *Talem*) Secunda circumstantia est magnitudinis contradictionis, & omninò perpeffionum quas sustinuit: Nam contradictionis nomine, per synecdochen speciei intelliguntur omnes perpeffiones & afflictiones Christi. Vt prima circumstantia significat nullam vnquam fuisse tantam personam, ita secunda circumstantia subindiat, nullam vnquam fuisse talem & tantam pœnam. Itaque ex hoc loco colligendum est, Christum non exterius duntaxat passum in corpore (Nam si externam tantum passionem respicias, latrones duo qui cum eo crucifixi sunt

funt æqualem pœnam sustinuerunt) sed multò magis interius in anima, in qua pertulit cruciatus inferorum, & gravissimum illud pondus iræ Dei, quod necessariò ipsi incubuit propter suscepta in se peccata omnium hominum, quæ nisi summa & infinita pœna quæ omnes etiam reproborum cruciatus excederet, expiari non poterant. Atque hæc alia etiam causa est, cur temporaria ipsius mors æternam æquiparauerit, supplicij nimirum quòd ad tempus perpeffus est atrocitas. *A peccatoribus*) Tertia circumstantia est personæ persecutorum, erant peccatores, hoc est, homines, non vilissimi tantum, sed etiam sceleratissimi. *Ne animis*) Hortationis summa: Nè despondeamus animos & in afflictionibus fatiscamus, sed fortitè eas perferamus, ad hoc ut constanter propositum nobis stadium decurramus.

4 *Nondum ad sanguinem*) Secundum argumentum à leuitate afflictionum, quas hætenus sunt pepeffi. Nondum ad mortem usque sustinuitis afflictiones: ergo pergitè eas patienter sustinere. *Ad sanguinem usque*) id est, ad mortem siue sanguinis effusionem. *Resistis*) Significat afflictionem positam esse in resistendo, & opponendo. Christus quum afflictus est, dicitur sustinuisse contradictionem. Sic quum affliguntur pii, ijs resistitur & ipsi resistunt, ut non possit afflictio esse sine lucta & oppositione. Ergo dicet quis,

Afflicti non patiuntur voluntariè, quia resistunt? Respondeo eos resistere peccato, non afflictioni: Nam summa voluntate patiuntur afflictionem: etsi intereà dum patiuntur, continuò resistunt peccato, & decertant aduersus peccatum. Si enim peccato cederent non paterentur. Si Christus cessisset peccato, non fuisset crucifixus, sed cùm crucifixus est illi, lucta fuit cum peccato. Intereà tamen dùm aduersus peccatum decertaret, summa voluntate se cruci obtulit. Quia autem non cedunt pij peccato, ideò victores euadunt, etiam in ipsa morte.

5 *Et obliti estis*) Tertium argumentum ab authoritate & testimonio Solomonis. Prou. 3. 15. Testimonio huic præmittitur objurgatio, qua reprehendit eorum obliuionē, eamque exaggerat ex eo quòd amicè ijs loquatur Sapiēs, eos compellans filios. Nota igitur, ne has ipsas quidem compellationes quibus vtitur Scriptura, otiosas & inutiles esse, sed vnicuique suū inesse pondus. *Filii*) Subiicit ipsium testimonium, in quo dissuadet duo extrema, in quibus solent homines peccare. Primum est ne castigationem Domini omnino negligamus & leuiter prætereamus, sine vlla vitæ emendatione, quam respicit Deus in nobis castigandis. Alterum est, ne animo deficiamus: Vult ergo teneri à nobis medium, vt castigationem Domini patienter ferentes, vitam emendemus.

6 *Quem enim diligit*) Ratio exhortationis à Sapiente subiecta, à dilectione Domini quæ castigatione illa arguitur. Dominus castigat quem diligit, Ergo &c. Nota castigationes signa esse amoris diuini: Nisi enim tuos castigaret Dominus, perirent cum mundo: Cùm punimur (inquit Paulus) erudimur, nè cum mundo condemnemur. 1. Corinth. 11. 32. Loquitur autem hîc Apostolus, de paternis castigationibus, non autem de pœnis quæ proficiscuntur à Deo Iudice: Nam punit impios tanquam Iudex: At verò tuos non punit tanquam Iudex, sed castigat tanquam Pater, non ad interitum, sed ad vitæ emendationem & mortificationem. Ergo significat in afflictionibus attollendos esse animos ad amorem Dei, cujus aspectu acerbitas afflictionis tanta suauitate temperatur, vt in medijs afflictionibus exultemus gaudio ineffabili & glorioso.

7 *Si castigationem*) Applicat ad Hebræos hoc testimonium, quasi dicat, Si castigationem sustinetis, Deus, vt hîc testatur Solomon, sese vobis offert vt filijs. Nota: non dicit, si castigamini (vt postulare videbantur Sapientis verba) sed si castigationem sustinetis. Non enim satis est castigari, sed oportet sustinere, hoc est, patienter ferre afflictionem, & vt loquitur Petrus 1. Epist. 5. 6. submittere nos potenti Dei manui. Qui enim luctatur cum manu Dei, ei sese Deus non offert vt filio. Ergo dilectionem

Dei non oportet metiri ex afflictionibus, sed ex patientia in afflictionibus, sine qua nihil profunt afflictiones. *Quis enim est*) Ratio cur castigationem sustinentibus offerat se Deus ut filijs, ab ipso genere. Filius quilibet castigatur à Patre. Ergo hoc ipso quod vos castiget Deus & sustinetis, offert se vobis ut Pater filijs.

8 *Quòd si estis*) Illustratio hujus applicationis à contrario. Qui non castigatur est spurius, & non filius. Ergo &c. Quemadmodum castigatio est signum filij: ita impunitas ista cum quis non castigatur, signum est spurij & nothi. In educandis liberis videmus non tantam esse in parentibus spuriorum curam, quanta est filiorum legitimorum: quia non est ea parentum dilectio erga spurios, quæ est erga filios legitime procreatos. Ita Deus spurios, qui non sunt filij, præterit castigationis expertes, cum interea filios, quos paterna dilectione protequitur, castiget. *Cuius participes*) Obiter subindicat hanc esse communem filiorum conditionem, ut castigationis sint participes, ut si quis renuat castigationem sustinere, eo ipso arguat se non esse filium.

9 *Deinde corporum*) Argumentum quartum à minori. Patres corporum nostrorum castigarunt nos & eos sumus reueriti: Annon multò magis subiiciemur Deo, Patri Spirituū? Deum vocat Patrem Spirituum, hoc est, animarum nostrarum, quia Deus immediate animā creat, eamque

eamque in corpus infundit : Nam etsi corpora immediatè sint ab hominibus gignètibz propagatione naturali, animæ tamen non sunt ex traduce, neque à Parentibus procreantur, sed à Deo immediatè creantur. *Reueriti sumus*) hoc est, ijs nos submissimus, castigantibus. Quòd si patienter aliquid ab hominibus toleramus, qui carnem tantùm nostram genuerunt, annon multò magis à Deo, & corporum, & animarum genitore; qui corpora quidem genuit per homines, animam autem immediatè? Deus igitur plus habet in nos juris, quàm ullus homo, vel hoc ipso, quòd Pater sit Spirituum: eòque debemus Deo maiorem reuerentiam, quàm cuiquam homini, etiam patri, cui in Deo duntaxat parendum est. Homo non aliud jus, non aliam in nos potestatem, habet, quàm à Deo accepit, vt non sit absoluta potestas, nisi Dei solius: eòque etiam reuerentiã debemus, Deo primùm ac propriè, homini autem propter Deum. *Et viuemus*) Amplificatio subjectionis qua Deo subijcitur, ab effectu consequente. Debemus eò magis Deo subijci, quod reuerentiam & subjectionem erga castigantem nos Deum sequatur vita. Hominum castigatio nunquam affert vitam: at Dei castigatio vitam affert, eamque æternam.

10 *Nam illi ad*) Amplificatio superioris comparisonis minorum, à dissimili castigationis modo & fine. Patres castigabant nos prout

ipsis videbatur, sæpè ex corrupto aliquo affectu, non aliquo nostro bono Deus autem nos castigat ad commodum nostrum. Ergo multò magis debemus nos Deo castigati submittere quàm Patribus. *Ad paucos*) Notatur tempus castigationis, quod mihi quidè cōmune videtur vtriq; castigationi, & Dei, & hominis: nā vterq;, & Deus, & homo, ad paucos dies castigant. Vt enim castigatio paterna brevis est & momentanea, ita etiam illa Dei castigatio momentanea dicitur. 2. Corinth. 4. 17. *Vt participes*) Finis & usus castigationis Dei: Non castigamur propter peccatum, aut peccati nomine: id enim Christi passioni, qui perfectè pro omnibus peccatis nostris satisfecit plurimùm derogaret: sed castigationis finis est, vt mortificatio in nobis peccato, participes simul sanctimonie Dei.

II *Omnis autem*) Occupatio. At durum est & insuaue castigari, & tristitiam, non gaudium affert; Respondet concessione primum, deinde correctione: In præsens quidem, h. e. eo tempore quo quis castigatur, non videtur esse gaudij, sed tristitiæ. *Videtur*) Hoc verbo subinnuit castigationem non esse re ipsa materiam tristitiæ, sed potiùs gaudij, sed ita videri nobis qui in rebus judicandis fallimur, & quibus multa videntur esse id quod non sunt. Admiranda enim est hominis cæcitas, vt quod ipsi bonum est & salutare, sæpè videatur perniciosum,

sum, cōtrāque. Non igitur oportet res metiri ex præsenti sensu, sed intuendū est in exitum rei cuiusque. *At postea*) Correctio. Et si in præsens videtur esse tristitiæ, postea tamē fructū tranquillum reddit, &c. Afflictiones & exercitationes cōparat culturæ: Ager post culturam reddit fructum: Sic nos à Deo exculti per afflictiones fructus producimus. Sumus natura steriles, expertes omnis boni & gratiæ, fœcundi autē mali, similes terræ quæ profert spinas & tribulos, cuius exitus tendit ad exustionem. Heb. 6. 8. Oportet igitur à Deo excollamur, antequam bonos fructus proferamus. *Tranquillum*) Hoc epitheto significat contrariam conditionem afflictionum, & fructus afflictionem consequētis. Nam quamdiu affligitur quis, nihil sentit præter agitationē & commotionem perpetuam, cū animi, tum corporis, sed fructus afflictionis tranquillus est, & omnis agitationis expers. *Iustitia*) Fructus hic vocatur Iustitiæ: eodem sensu etiam corona iustitiæ appellatur. 2. Tim. 4. 8. quam rependit Deus iustis, h. e. iis qui iustitiæ ex animo student, vel quæ datur propter iustitiam, non illam quidem inhærentē in nobis, sed iustitiam Christi nobis per fidem imputatam. Rom. 5. 21. Gratia regnat per iustitiam in vitam æternam.

12 *Quapropter manus*) Conclusio est hortationis ad patientiam in afflictionibus, quasi

dicat, Ne despōdete animos, sed eos erigite, & vos ipsos ad afflictiones perferēdas cōfirmate. Habes hīc imaginem quandam hominis meticulosi, & animum planē despondentis. Manus habet remissas, tremulas, & pendulas. genua soluta, & sese inuicem collidētia, vt de Belthezaro legimus, Dan. 5. 6. Non oportet nos sic afflictionibus consternari, sed animo præsenti alacriter eas sustinere. Estque hæc prima exhortatio specialis, sub generali illa ad perseuerantiam comprehensa, ad afflictiones fortiter sustinendas.

13 *Et rectas facite*) Secunda exhortatio specialis, vt præeant alijs bono exemplo. Nam in stadio decurrēdo non tantū debemus nos ipsos respicere, sed & alios qui nos imitātur. Hęc exhortatio, vt & proximē superior, metaphoricis verbis concepta est. Rectas (inquit) facite orbitas pedibus vestris, hoc est, bono exemplo alijs præite, & inter ambulandū, recto, iustitiæque operam date. *Ne quod claudum*) Finis specialis huius exhortationis, vt consulatur saluti fratrum infirmorum, ne orbitis pedum vestrorum non rectis, hominum (qui alioqui tota vita claudicāt) pedes magis luxentur: vt hominis claudi pes, si ad iter asperum & non rectum offenderit, luxatur amplius, ad ipsius euerisionem. Nam in hanc sententiā accipiendū videtur verbū ἐκτρέπεσθαι pro eo quod est luxari, vel diuerti à iusto acet-

ceta-

cetabulo, & commissura ossium, ac si dixisset: Ne fortè si quis iam claudus est ex infirmitate pedum, ampliùs nouo offendiculo periclitetur, vt solutis iacturam faciat, sed potiùs vestigiis vestris rectis insistens, sanitatem recuperet. Vt igitur suprà versu 1. hortatus est ad currendum: Ita hîc modum currendi generaliore præscribit, vt rectas orbitas faciant: sequentibus autem hortationibus cum pacem, sanctimoniam &c. commendat, particulares explicat currendi modos, sub hoc generali comprehensos.

14 *Pacem seſtāmini*) Tertia specialis exhortatio ad pacem, quæ primus est currendi modus specialis. Pacis nomine intelligo non externā tantum illam, quæ in externa conjunctione posita est, sed etiam internā quæ posita est in conjunctione animorū. Est enim pax vinculū quo animi vniuntur, docente Paulo. Eph. 4.3. *Studētes seruare vnitatem Spiritus per vinculum pacis.* *Cum omnibus*) Ostendit cum quibus colenda sit pax, cum omnibus nimirum, h. e. cuiuscunque generis & conditionis hominibus, seruata tamen restrictione quam adijcit Paulus. Rom. 12.16. Si fieri potest, quantū in vobis est, cū omnibus hominibus in pace viuentes. Neq; enim vera est illa pax, quam cum nonnullis colimus, dum interea discordia nobis cum alijs intercedit. Nam vera pax ubiq; est, & cum omnib. hominibus, nullam cum quoquam dissen-

sionem admittens. *Et sanctimoniam*) Quarta exhortatio specialis, ad sanctimoniā: quæ secundus est currendi modus specialis. Sanctimoniam nomine intelligenda videtur hoc loco, tum in genere vitæ sanctitas, tum etiā in specie castitas; Nam infra vers. 16. fornicationem simul & profanitatem, tanquam sanctimoniam contrarias, coniungit. Castitas autem peculiariter interdum nomen sanctimoniam obtinet. vt 1. Thess. 4. 4. vbi sanctimoniam definit per abstinentiā à fornicatione. Hæc (inquit) est volūtas Dei, nempe sanctificatio vestra, id est, vt abstineatis à fornicatione: & castus peculiari modo purus & sanctus dicitur, vt contrā peculiarem quandam impuritatem in fornicatione innuit Paulus 1. Cor. 6. 18. Qui fornicatur in proprium corpus peccat. *Sine qua nemo*) Ratio hortationis ad sanctimoniam, à summo malo & incommodo, quod sanctimoniam defectum sequitur. Sine ea nemo videbit Dominum. Nullus enim impuro & polluto homini ad Deum patet aditus. Nam impuritas habitationem Spiritus sancti, omnemque Dei præsentiam, cum in corpore, tum in anima, penitus exterminat, vt videri Deus non possit: Cum contrā sanctimonia Dei præsentiam afferat. Vnde Christus: Beati mundo corde; quoniam ipsi Deum videbunt, Matt. 5. 8.

15 *Prospicientes ne quis*) Tertius currendi modus specialis, & exhortatio specialis quinta, quæ

quæ alios respicit, vt prospiciamus ne quis deficiat à gratia Dei. Sic obseruationem aliorum commendat, vt suprà 10. 24. Obseruemus alij alios. Attendendum nobis est etiam ad alios, vt illi vnà nobiscum currant, non autem prolabantur & deficient. *Ne qua radix*) Quartus currendi modus specialis, & exhortatio sexta, proximum etiam respiciens; vt prospiciamus ne qua suppullulet radix amara, h. e. hæresis, aut aliquid simile, quod sit offensioni, vt Deut. 29. 18. radix proferens cicutam, aut absinthium. Euellenda est huiusmodi amara radix, antequàm incipiat pullulare, ne offendiculo sit currentibus alijs. *Obturbet*) Amaræ huic radici duo tribuit effecta, quæ totidem sunt exhortationis argumenta. Primum est conturbatio. *Et per hanc*) Secundum est inquinatio multorum.

16 *Ne quis sit*) Quintus specialis currendi modus, & exhortatio septima, vt prospiciamus ne quis sit scortator aut profanus. Speciem præmittit generi: Nam profanitatis species quædam est scortatio. Est autem profanus qui Deum eiusque gratiam, sancta denique omnia & religiosa contemnit & irridet. *Velut Esau*) Dissuadet à profanitate, exemplo Esau, cuius profanitas factio ipsius exponitur; vnico edulio vendidit ius primogeniti. Vide Geneseos 25. 30. & deinceps. Ius autem primogeniti positum fuit in duabus prærogatiuis, vna dignitatis

qua inter fratres primatum tenebat, & eos sibi subiectos habebat. 2. Chron. 21. 3. Altera roboris, ex dupla portione quæ ipsi ex paterna hæreditate cedebat. Deut. 21. 17. Vide de hac duplici prærogatiua. Geneseos 49. 3. & 1. Chron. 5. 12. Vnde etiam primogenitus typus erat Christi primogeniti Dei, qui omnes fratres honore & potentia antecedit. Vendito igitur iure primogeniti, Esau, & recusauit typus esse Christi, eoque Christum contempsit, & hæreditatem amisit terræ Canaan, quæ typus erat regni cælorum.

17 *Scitis enim eum etiam*) Ostenditur iudicium quo punitum est profanum hoc factum, cum vellet hæreditario iure benedictionem assequi, reprobatus est à Deo per Isaacum, & ius primogenituræ, & in dignitate, & in dupla portione, datum est Iacobo, cui illud vendiderat. Vide Geneseos 27. 35. & deinceps. *Non enim reperit*) Reprobationem Esau ostendit, ex immutabilitate sententiæ benedictionis de Iacobo pronunciatae ab Isaac patre. Non reperit locum pœnitentiæ patris Isaac, h. e. non potuit efficere vt Isaacum patrem pœniteret benedictionis quantumuis ex errore in Iacobum collatae, vt sententiam illam benedictionis retractaret; quamuis cum lachrymis benedictionem illam exquisisset, vt benedictionem recuperaret. Vide Genes. 27. 39. Pronomen *αὐτῷ* proximè ad *μετανοίας* vocem

cem

cem referendum videtur. Est ergo hoc primum dehortationis à profanitate argumentū. Esau profanis tristem & miserabilem profanitatis suæ exitum consecutus est. Ergo cauenda est eius exemplo profanitas.

18 *Non enim accessistis*) Alterum argumentū dehortationis à profanitate, à præsentī eorum conditione, quam copiosè hoc loco describit: Est autem conditio hæc præsens eadem illa quam Paulus paucis verbis expressit. Rom. 6. 14. Peccatum vobis non dominabitur: non enim estis sub lege, sed sub gratia. Argumentum igitur est in hanc formam. Estis sub Evangelio: Ergo non oportet vos profanè vivere. In summa luce non debet quis ambulare ac si in tenebris esset. Interdiu enim compositè ambulandum. Nox processit (inquit Paulus) dies autem propinquat: Abijciamus igitur opera tenebrarum, & induamur habitu qui luci conueniat, vt interdiu compositè ambulemus. Rom. 13. 12. Habitum autem illum luci conuenientem, interpretatur esse Christum. vers. 14. Sic argumentatur etiam Apostolus. Tit. 2. 12. & deinceps. Illuxit gratia illa Dei salutifera omnibus hominibus, erudiens nos vt abnegata impietate &c. Tractatur hoc argumentum ex diuersis, καὶ ἀπὸ ἑνὸς & θείον. Contrarium vnum remouetur, alterum ponitur. Remouetur conditio sub lege, vt locus sit conditioni sub gratia & Euāgelio, Neq; enim vtraq;

cōditio potest simul cōsistere in eodē homine. Cōditio hæc sub lege amplificatur à terribili forma legis promulgatæ, quæ legis terrores indicat. *Contrectabilem*.) Forma promulgatæ legis suis quibusdā partibus exponitur: de quibus vide Exod. 19. Prima pars formæ legis promulgatæ, est in loco ex quo promulgata est Lex, Monte nimirū Sinai. Extenuatur autem hic locus à materia, fuit mons crassæ & terrenæ, eoque cōtrectabilis materiæ, qui manib. palpari posset, quo distinguitur hic locus à cœlo, quod manibus cōtrectari non potest. *Et incensum*) Secūda pars formæ promulgatæ legis, in terribilibus illis signis, quæ Dei præsentiam in illo monte testabantur, cū ex eo Lex promulgaretur, vt fuerunt hæc meteora, ignis incensus, turbo, caligo, procella. Deus enim ipse nullo sensu percipi potest, sed per sensibiles istas creaturas se præsentē declarat.

19 *Tubaque sonitum*.) Tertia pars formæ promulgatæ legis, in sonitu tubæ, quo præparabatur populus ad audiendum vocem Dei. *Et vocem*) Quarta pars est ipsa vox legis promulgatæ, quæ tubæ sonitum est insecuta. *Quam qui*) Amplificatio vocis huius quæ audita est ex hoc mōte, ab effecto (in terrorē incutiēdo audientibus) eoque duplici. Primum est in populo: alterū est in Mose ipso, duce populi. Effectum in populo est: Adeò ad auditam illam vocem exhorruerunt, vt audire eam non susti-

Justinuerint sed deprecati sunt nè amplius sibi fieret sermo per ipsum Deum immediatè, sed loqueretur per Moſen internuncium. Cauſſa autem hujus terroris fuit, quod terrore hoc externo in lege promulganda excitatus eſt internus conſcientiæ terror, quòd exactam illam Dei in lege juſtitiam (cui nullus hominum ſatisfacere poteſt) ferre non poſſent.

20 *Non enim ferebant* Altera cauſa terroris in populo, à Dei interdicto, quo per Moſen vt internuncium ſignificauerat Deus, morte afſiciendum eſſe quicquid mōtem tangeret, non homo tantum, ſed etiam beſtia. Vide Exod 19. 13. idque propter præſentiam ſacroſanctæ illius Majestatis Dei, ad quam impuræ & pollutæ creaturæ nullus patet accessus, niſi prius ſanctificetur. Itaque neceſſe fuit Moſen etiam ſanctificari antequam hunc montem attingeret.

21 *Et Moſes*) Effectum vocis auditæ in promulganda lege, in ipſo Moſe, qui & ipſe quoque eſt exterritus, vt hac voce conſeſſus eſt: Expauefactus ſum ac tremebundus. Hæc quidem Moſis verba non expreſſè in Scripturis habentur, ſed Exod. 19. 19. dicitur Moſes, quum populum obuiam Deo è caſtris eduxiſſet, totuſque mons ille tremere, locutus eſſe, antequam Deus planè ad montem Sinai deſcendiſſet: quid autem locutus ſit, eo loco non exprimitur, ſed hoc loco afferuntur verba, qui-

bus Moses sono illo tubæ territus de suo terrore conquestus est, & Deus ibi dicitur ipsi respondisse voce, hoc est, placidis verbis Moſen, de conſeruatiōe ſua agentem, conſolatus eſſe & confirmauiſſe. Hactenus fuit primum membrum diuerſorum. Conditio ſub lege, quam expreſſit terribili illa legis promulgatione.

22 *ſed acceſſiſtis*) Sequitur conditio ſub Euangelio, quæ amplificatur deſcriptione Eccleſiæ noui Teſtamenti. Deſcribit eam primum ex varijs, ijsque ſuauiſſimis appellationibus typicis, quibus locus innuitur: Primum vocatur mons Sion. Monti Sinai ex quo promulgata eſt lex, ex aduerſo opponit montem Sion (qui typus erat cœlorum) ex quo primum perſonauit Euangelium. Nam primum Chriſtus ipſe, deinde ejus Apoſtoli, perſpicuè ex Sione Euangelium promulgarunt, juxta Eſaiæ vaticinium. Ieſ. 2. 3. *Et ciuitatem*) Altera loci appellatio: vocatur ciuitas Dei viui, hoc eſt, cœleſtis Hieruſalem, quæ per terreſtrem illam figurabatur, vt ſubjecta tertia appellatione interpretatur: His ergo tribus nominibus, vnum eundemque locum ſignificat. *Et myriadas*) Secunda pars deſcriptionis Eccleſiæ, à perſonis varijs ijsque præſtantiſſimis, quæ ſunt in hoc loco, & ad quas accedimus. Perſonæ primum ſunt Angeli, ijque non pauci, ſed numero infiniti. Nā myriadas vocat Angelorū, numerum finitum pro infinito exprimens.

23. *Conuentum*) Deindè electi omnes quos vocat primogenitos, nec primogenitos tantum, sed conuentum & concionem primogenitorum, quo significat immensum eorum numerum: quò autem maior electorum numerus eò maior fœlicitas & gloria. Vocantur autem electi primogeniti, per allusionem ad primogenitos in populo Dei, qui habebant, tum dignitatem & authoritatem in reliquam familiam, tũ duplam hæreditatis portionem: Ita electi omnes obtinent primùm dignitatem cœlestem, cuius typus erat dignitas illa in familijs. Deindè hæreditariò possidebunt regnum paratum ipsis à jactis mundi fundamentis. Matth. 25. 34. *Qui conscripti*) Descriptio est primogenitorum: Conscripti sunt in cœlis, id est, à Deo electi sunt ad vitam æternam. Nam electorum nomina dicuntur scripta esse in cœlis. Luc. 10. 20. & in libro vitæ. Philipp. 4. 3. quibus phrasibus significatur eos æterno illo electionis decreto ad vitam æternam esse ordinatos. *Et iudicem vniuersorum*) Tertiò in personis, quarum præsentia fruimur in cœlesti illa Hierusalem, numeratur Deus, quem vocat iudicem vniuersorum, qui solus iustissimo suo iudicio afflictionem reddit ijs qui fideles affligunt, ipsis autem fidelibus relaxationem. 2. Thess. 1. 6. 7. *Et spiritus*) Quarto loco recenset spiritus iustorum conlectatorum, hoc est, animas fidelium defunctorum, jam in cœlum re-

ceptas. Nam homines qui sunt in Ecclesia, vel sunt adhuc in corpore degentes in terris, quos initio versus vocauit primogenitos: vel deposito hoc corporis Tabernaculo in cœlis triumphât cum Christo, vt sunt spiritus iustorum, qui consummati hîc dicuntur, hoc est, consummatam & perfectam sanctificationem & gloriam adepti, non quidem secundùm omnes consummationis gradus, sed secundùm aliquos tantùm: cùm quoad animam præsentes iam sint cū Domino. Consummati igitur sunt, non simpliciter, sed κατὰ τὴν, respectu nostri, qui adhuc aduenæ sumus in corpore, & peregrè à Domino absumus.

24. *Et ad noui*) Postremò inter personas recēsetur Iesus, noui fœderis Mediator, per quē solum *νοῦν ὡνίαν* habemus cum Angelis, cum primogenitis qui conscripti sunt in cœlo, cum Deo vniuersorum iudice, cum spirītibus deniq; iustorum. Nam in eo recolliguntur omnia, tum quæ in cœlis, tum quæ in terris. Ephes. 1. 10. Decitur noui Testamenti Mediator, qui nouum illud Testamentum, quo legauit nobis remissionem peccatorum, iustitiam & vitam æternam, sanciuit suo sanguine. *Et sanguinem*) Cum Christo coniungit ejus sanguinem, quo purgatur conscientia nostra, eumque à Christo seorsim nominat, vt doceat videndum nobis esse vt sanguine hoc aspersi & irrigati simus: cum alioqui nullum ex Christo beneficium perci-

percipere possimus. Ideoque sanguis asper-
sionis dicitur, quod eo per fidem aspersa fide-
lium corda sanctificentur, & à sordibus pecca-
torum abluantur, allusione facta ad veterem le-
gem, in qua omnia ferè sanguine asperso mun-
dabantur, suprà 9. 22. *Præstantiora*) Commen-
dat hunc Christi sanguinem ab effecto, quod
illustrat comparatione Abelis: Sanguis Chri-
sti præstantiora loquitur quàm sanguis A-
belis. Nam sanguis Abelis loquitur & po-
stulat à Deo vindictam: At sanguis Christi po-
stulat à Deo misericordiam & gratiam. Quan-
quam non incommodè, & tum ad græcum
contextum, tum ad sequentem exhortationem
magis etiam appositè, locutio hæc ad ipsas
personas referri possit; quod Christus suo san-
guine præstantiora loquatur, quàm Abel, qui
mortuus adhuc loquitur, suprà 11. 4. & vin-
dictam à Deo exposcit; cùm Christus suo
sanguine veniam & remissionem peccatorum
postulet.

25 *Videte ne aspernemini eum qui loquitur:*
nam si illi non effugerunt qui auersabantur eum
qui loquebatur Dei nomine in terra, multò magis
nos, si eum qui de cælis est auersemur.

26 *Cuius vox tunc concussit terram: nunc autè*
denuncianit, dicens, Adhuc semel ego concutiam
non solum terram, sed etiam cælum.

27 *Porro illud, Adhuc semel declarat instabi-*
lium rerum, ut pote scilicetiarum, a motione, ut ma-

neant quæ sunt stabilia.

28 *Quapropter regnum assumentes quod concuti non potest, teneamus gratiam per quam ita seruiamus Deo, ut ei placeamus cum verecundia & reuerentia.*

29 *Etenim Deus noster consumens ignis est.*

Videtene aspernemini) Occasione proximorum verborum quibus sanguinis Christi efficaciam commendauit, redit ad præcipuam exhortationem ad perseverantiam: Ne Christum loquentem aspernemur, sed teneamus ejus doctrinam. *Nam si illi*) Argumentum exhortationis decimum sextum, à judicio quod sequetur eos, qui Christum loquentem aspernantur: judicium hoc confirmatur duobus argumentis. Primum est à comparatione minorum. Si illi non effugerunt qui Moſen Dei nomine in terris loquentem, auersabantur: quanto magis non effugiemus nos, si Christum è cœlis loquentem aspernemur? Quod enim dignior est persona quæ loquitur, eò magis puniendi sunt qui loquentem auersantur. Simile argumentum vide Heb. 2. 2. 3. & 10. 28. 29.

26 *Cuius vox*) Secundum argumentum quo confirmat judicium eorum, qui Christum loquentem auersantur, est à vi & efficacia vocis Christi loquentis, tam præterita in promulganda lege, quàm præſenti in prædicando Evangelio. *Cuius vox tunc*) Cùm promulgaret legem concuſſit terram, hoc est, homines in terris degentes,

gentes, qui lege promulgata admiratione majestatis ipsius affecti sunt. At nunc (in prædicando Evangelio) non solum concutit terram, hoc est, homines, sed etiam cælum, hoc est, Angelos qui in cælis degunt, qui etiam ipsi in Evangelij prædicatione, in admirationem bonitatis & gratiæ Dei abripiuntur, & in mysteria Evangelij desiderant introspicere. 1. Pet. 1. 12. Cùm ergo tanta sit efficacia vocis ipsius, & nunc, & jam olim, non effugietis judicium, si eum loquentem aspernemini. *Dicens adhuc ego*) Concussionem hanc cælorum & terræ, in Evangelij prædicatione, confirmat testimonio Aggæi Prophetæ cap. 2. vers. 7. ubi prædicatur ista cælorum simul & terræ commotio in Evangelio prædicando, quæ summam arguit esse majestatem & dignitatem Evangelij. Quanquam non incommodè concussio ista intelligi possit de externa illa commotione cæli & terræ, ad vocem Christi exspirantis in cruce, cùm tenebris super totam terram inductis Sol obscuratus est, aulæum Templi fissum est medium, terra mota est, petreæ fissæ sunt. Matth. 27. 50. 51. & deinceps. Luc. 23. 44. 45.

27 *Porro illud adhuc*) Interpretatur illud Aggæi testimonium; & ex illis Prophetæ verbis (*adhuc semel*) deducit corollarium, de abrogatione Legis, & æternitate rerum per ceremonias legis & politiam Mosaicam significatarum, hoc est, sacerdotij, & regni Christi, ut inde

aliud institutæ hortationis argumētum eliciat. Cū enim dicit, *adhuc*, significat non satis esse quòd jam antea concussa esset terra in ferenda lege, sed adhuc oportere legis hujus immutationem esse. Cū autem addit *Semel*, significat vnicam duntaxat fore illam mutationem, vt quod in locum legis successorum sit, maneat perpetuū & immutabile. Τα σαλευόμενα ea quæ concutiuntur, vocat legem Mosaicam, omnesq; legis ceremonias: & instrumenta quæ legalibus ceremonijs seruiebant, quæ naturæ erant instabilis, & non permanentis. *Vt putà factarum*) Ratio instabilitatis istarum rerum, quia institutæ quidem & mandatæ erāt à Deo, sed ad certum aliquod tempus, ad aduentum vsque Christi. Galat. 3. 19. Cujus quom typi & vmbra essent, debebant aduentanti corpori cedere: τα μὴ σαλευόμενα, stabilia, vocat ea quæ per instabilia fuerūt significata, & in locum instabilium successerunt, vt est Christus ipse, ejus regnum, & omnia bona quæ consequimur in Christo, vt sunt justificatio, sanctificatio & cœlestis illa hæreditas, quæ omnia necessariò æterna manent.

28 *Quapropter regnum*) Ex hac conditione Regni Christi, ex interpretatione verborum Prophetæ sumpta, deducit argumentum nouum præcipuæ exhortationis, ad perseverandum in fide, & gratiam retinendam. Si gratiam tenuerimus, participes erimus regni illius, quod

quod concuti non potest. Ergo &c. Estq; hoc argumentū exhortationis decimūseptimum. Gratie nomine intelligo fidem ex Dei gratia profectam: metonymia efficientis. *Per quam*) Descriptio gratiæ siue fidei ab effectu: fides enim non potest esse otiosa in nobis: sed necessariò producit hoc effectum, vt seruiamus Deo. *Vt ei placeamus*) Modus seruiendi Deo præscribitur, primùm in genere, vt seruiamus ei ad ipsius voluntatē, & placitum, facientes ex animo quæ vult Deus. Ephes. 6. 6. Deinde in specie, cum verecundia & reuerētia. Verecundia est pudor, ex infirmitatis nostræ & indignitatis conscientia. Reuerentia est religiosus metus ex agnitione illius Maiestatis Dei nostri, cui seruiamus. Harum proprietatum exemplum habes in Publicano. Luc. 12. 13. vt & audaciæ, quæ his opponitur, in Phariseo.

29 *Etenim Deus*) Postremum exhortationis argumentum, à natura Dei nostri, est ignis cōsumens, eoque consumpturus est omnes qui non perseuerantes in fide, ipsi non seruiunt iuxta ipsius placitum. Hoc argumentum mutuatus est ex Mose. Deut. 4. 24.

Argumentum Capitis decimitertij.

Hoc capite primùm sunt speciales paræneses, quibus hortatur ad officia, maximè quæ ad secundam legis Tabulam pertinent ad versum vsque 18. Deinde commendat Hebræis preces pro se, ad vers. 19 vbi epistolā hanc

precibus primùm, deinde hortatione, postremò aliquot alijs varijs argumenti sermonibus concludit.

CAPVT XIII

1 *Fraterna charitas maneat.*

2 *Hospitalitatis ne sitis immemores: per hanc enim quidam inscy exceperunt Angelos hospitio.*

3 *Memores estote victorum tanquam vnà cū illis victi: eorum qui malis premuntur, ac si ipsi quoque corpore afflicti essetis.*

4 *Honorabile est inter quosuis coniugium & cubile impollutum: scortatores autem & adulteros damnabit Deus.*

5 *Sint mores alieni ab auaritia: estote cōtenti presentibus, dixit enim ipse, Non te deseram, neq; te derelinquam.*

6 *Adeo vt confidenti animo dicamus, Dominus mihi auxiliator: nec timebo quid faciat mihi homo.*

7 *Memores estote ductorum vestrorum, qui loquuti sunt vobis sermonem Dei: quorum imitmini fidem, considerantes qui fuerit exitus conuersationis ipsorum.*

8 *Iesus Christus heri & hodie idem est, & in secula.*

9 *Doctrinis varijs & peregrinis ne circumferimini: bonum enim est gratia constabiliri cor, non cibus, quibus non sunt adiuti qui in ipsis versati sunt.*

10 *Habemus altare ex quo non habent ius edendi qui tabernaculo deseruiunt.*

11 *Quorum enim animalium sanguis infertur pro peccato in sacrarium per Pontificem, horum corpora exuruntur extra castra.*

12 *Quapropter & Iesus, ut sanctificaret populum per proprium sanguinem, passus est extra portam.*

13 *Exeamus igitur ad eum extra castra, opprobrium eius portantes.*

14 *Non enim habemus hîc sitam ciuitatem, sed futuram inquirimus.*

15 *Per ipsum igitur assidue offeramus Deo sacrificium laudis, id est, fructum labiorum conscientium nomini eius.*

16 *Beneficentia Verò & communicationis ne obliuiscimini: talibus enim victimis delectatur Deus.*

17 *Obedite ductoribus vestris, & obsecundate: Vigilant enim ipsi pro animabus vestris, tanquam rationem reddituri: ut cum gaudio hoc faciant, & non gementes, id enim est vobis inutile.*

Fraterna charitas) Prima specialis præceptio qua charitatem commendat, non generatim quamlibet, (sed *φιλὰδελφία*, siue charitatē fraternam, qua tantum prosequendi sunt fratres, & domestici fidei, qui omnes eiusdem Patris filij sunt. Hanc distinguit Petrus à charitate, quam *ἀγάπῃ* vocat. 2. Epist. 1. 7.

2 *Hospitalitas*) Duobus versibus sequētibz

duo præcipiuntur officia , quæ ex charitate fraterna , tanquam propria ipsius effecta , profluunt: Hospitalitas nimirum & συμπαθῆα erga viñctos & afflictos , siue eorum recordatio : In his enim potissimum effectis , per illa tempora quæ persecutionibus feruebant (cum sanctorum peregrinationes & exilia , vinculaque & afflictiones frequentes essent) occasio exercendæ charitati , offerebatur. Hoc versu præcipitur hospitalitas. *Per hanc enim*) Hospitalitatem commēdat argumento sumpto ab honore illo singulari , qui Dei beneficio accidit quibusdam qui hospitalitatis erant studiosi , quod nimirum Angelos hospitio exceperint. *Inscy*) Amplificatur hoc eorum factum ex particulari circumstantia inscientiæ ipsorum , quod receperint Angelos cū putarent se homines recipere : Nemo enim tam est inhumanus , qui cognitos Angelos recusaret domo excipere. Intelligit autem de Abrahamo , qui tres Angelos hominum specie ipsi apparentes hospitio excepit. Gen. 18. 2. & deinceps , In his exemplis generalis doctrina includitur: Non carituros suo pæmio quicunque hospitalitati operam dederint.

3 *Memores estote*) Alterum charitatis officiū quod præcipit est συμπαθῆα & recordatio viñctorum & afflictorum propter Christum eiusque Euangelium. Modus huius recordationis adiungitur , quod perindē oporteat nos viñctorum

etorum & quomodocunque afflictorum meminisse, ac si vnà cum illis essemus vincti & afflicti. Nihil enim est, quod nos seriò misericordiæ sensu magis afficiat, quàm si eorum qui affliguntur personam in nos transferamus. *Ut qui ipsi*) Ratio præceptionis à communione cum vinctis, & afflictis pro Christo: Estis in eodem cum ipsis corpore, membra nimirum eiusdem corporis cuius Christus est caput: Debet autem inter membra eiusdem corporis esse *συμπατεία*, vt si patitur vnum membrum simul doleant omnia membra. 1. Corinth. 12. 26. Itaque græca verba *ὡς καὶ αὐτοὶ ὄντες ἐν σώματι*, sic ad verbum transferenda censuerim (vt qui ipsi etiam sitis in corpore.)

4 *Honorabile est*) Quarta præceptio specialis qua coniugium commendat, scortationem prohibet. Commendatur coniugium ex duobus adiunctis, primum est *τιμιόν*, hoc est, pretiosum, siue honorabile, non apud homines tantum sed etiam apud Deum, vt quod ab ipso institutum sit & celebratum in paradiso ante hominis lapsum, cum adhuc esset homo in statu innocentiae & integritatis. *Inter quosuis*) hoc est, inter cuiuscunque ordinis, & conditionis homines, vt in nullo hominum genere culpari debeat. *Et cubile impollutum*) Alterum adiunctum quo commendatur coniugium, quod cubile eius sit impollutum, hoc est, purum & omnis culpæ ac pollutionis ex-

pers, vtpotè quod à Deo sanctificatum sit, vt quibusuis hominibus eo bona conscientia vtiliceat. *Scortatores autem*) Ratio dehortationis à contraria scortatione & adulterio, est à iudicio Dei. Deus scortatores & adulteros iudicabit, hoc est, damnabit. Iudicium siue damnationem intellige æternam. Eodem sensu passim docet Paulus scortatores regni Dei hæreditatem nunquam possessuros. 1. Cor. 6. 9. 10. Gal. 5. 21. Ephes. 5. 5.

5 *Sint mores alieni*) Quinta præceptio (specialis, quæ prohibet auaritiam, contrà autem præcipit vt contenti sint præsentibus. Vide 1. Timoth. 6. 6. & deinceps. Vbi φιλαργυρίαν vocat malorum omnium radicem, animum autem sua sorte contētum coniungit cum pietate, tanquam eius effectum necessarium. Animi autem præsentibus contenti illustre exemplum in sua persona exhibuit nobis Paulus. Philipp. 4. 11. 12. 13. *Dixit enim ipse*) Ratio præceptionis à promissione Dei, quæ hîc à persona promittentis amplificatur, ipse inquit, hoc est, Dominus, dixit: & proferuntur in medium Dei verba, quibus Iosua ad vocationem suam alacriter obeundam confirmat. Iosu. cap. 1. vers. 5. hæc enim promissio Iosue tanquam duci populi sui facta, ad totum populum communiter spectabat, & ad omnes pios vocationi suæ incumbentes extenditur. Promittit autem Deus his verbis
perpetuam

perpetuam præsentiam suam, quæ sola nos præsentī conditione quacunque, & debet, & potest, contentos efficere. Auari animus ne toto quidem mundo contentus est, sed quò plura habet plura appetit. Est enim cupiditas animi humani infinita, eoque nunquam plenè satiari potest, nisi impleatur præsentia Dei, qui solus est infinitus. Argumentum igitur est: Deus iuxta promissionem à se factam perpetuò tibi præsens est. Ergo contentus esto præsentibus, & alienus sis ab avaritia. Avarus Deum non habet præsentem, sed pro Deo habet diuitias, vnde Idololatra vocatur. Ephes. cap. 5. vers. 5. & avaritia Idololatria. Coloss. 3. 5.

7 *Adeo ut confideti*) Amplificat hæc Dei promissionem ab effectu, fide nostra promissionē amplectente, & in ea confidenter gloriante. Gloriationis formulam singulis fidelibus præscribit, ex Psal. 118. 6. ubi Propheta fiducia præsentiae & auxilij Dei se confirmat aduersus quoscunque hominum conatus. Vnde inferri potest generatim, non esse timendum nobis à rebus aduersarijs quibuscunque, multò minùs à penuria & egestate.

8 *Memores estote*) Sexta præceptio specialis, qua commendat ijs memoriam ductorum suorum, & nominatim exprimit, quos ductores intelligat, eos nimirum qui locuti sunt ipsis sermonem Dei. Memoriam hanc definit in quo

sit posita, in imitatione videlicet fidei & cōuersationis ipsorum: Neq; enim nudam hīc fidem intelligit, sed (vt ex ratione subiecta perspicuum est) fidem agentem per charitatem, vt loquitur Paulus Galat. 5. 6. & in bona ac sancta conuersatione sese exerentem. *Considerantes*) Argumentum hortationis est à conuersationis ductorum fœlici exitu, ad cuius considerationem ipsos excitat, vtpotè cuius & ipsi quoque futuri sint participes, si eorum fidem imitētur. Nam similes in fide & conuersatione, necesse est etiam similem exitum obtinere. *Iesus Christus*) Probat eundem fore eorum exitum, qui fuit ductorum, si eorum fidem imitentur, ab immutabili natura Iesu Christi, qui semper idem est, & sibi similis, eoque quemadmodum ductorum fidem & conuersationem fœlici exitu compensauit, ita etiam similem ipsorum fidem & conuersationem simili exitu compensaturus est. Hac autem Christi descriptione, non tantum innuitur ipsius immutabilitas, sed & distinctione trium temporum præteriti, præsentis & futuri (vt Apocal. 1.8.) æternitas denotatur, quæ duæ sunt proprietates diuinæ naturæ.

9. *Doctrinis Varijs*) Septima præceptio specialis, qua dehortatur à doctrinis varijs & peregrinis. Dehortatio expressa est allegoria à nauibus petita, quæ in mari circumferuntur ventorum: Doctrinis varijs, inquit, ne circumferamini

feramini, Qui enim non satis firmi sunt in fide, doctrinis hominum tanquam ventis contrarijs huc illuc agitantur. Doctrinas varias & peregrinas vocat quascunque doctrinas, quæ vel à Deo nunquam sunt traditæ verbo suo, ut sunt hominum traditiones, vel quæ erant quidem veteri populo mandatæ, sed abrogatæ sunt in Christi aduentu, cuiusmodi fuit doctrina cæremoniarum legis quæ per Christum abolitæ sint. Hæ doctrinæ variæ dicuntur & peregrinæ, quod à doctrina Christi varient & à Deo pro suis non agnoscantur. *Bonum enim est*) Ratio præceptionis ab inutilitate, quòd hæ doctrinæ non conducant ad constabiliendum cor, & solidam ei consolationem ministrandum, sed oporteat cor constabiliri doctrina Evangelij, quam gratiam hîc appellat, quia tota est de gratia Dei in Christo Iesu, de reconciliatione nostra cum Deo, & redemptione gratuita per ipsius sanguinem nobis parata. Hæc solum doctrina vim habet stabiliendi corda, quæ alioqui necesse est fluctuare, & quasi vacillare. Gratia autem opponit cibos, hoc est, doctrinam de ciborum mundorum & immundorum discrimine legali observando, hac una specie *συνειδοχικῶς* omnē cultū cæremoniale intelligens. *Quibus non sunt*) Probat hujus doctrinæ inutilitatem ab experientia, quòd qui in cibis illis versati sunt, hoc est, ciborum discrimen superstitiosè retinuerunt, & cæremonijs

legalibus pertinaciter adhæserunt, ea re non sunt adjuvi.

10 *Habemus altare*) Alterum argumentum dehortationis à doctrina ciborum, omninoque ceremoniarum legis, sumptum à pugna inter Christum & ceremonias legis. Qui tabernaculo deseruiunt, hoc est, obstinatè retinent ceremonias legis, non possunt paticipes esse Christi. Nam Christus cum ceremonijs consistere non potest. Gal. 5. 2. quia ceremoniæ figurabant Christum venturum, & nondum venisse clamitabant. Ergo non sunt retinendæ ceremoniæ legis. Altaris nomen per metonymiam subiecti positum est pro victima in altari oblata: intelligit autè Christum, qui est Pascha nostrum pro nobis sacrificatum. 1. Corinth. 5. 7. Hunc habent omnes quorum corda gratia sunt constabilita. Edere ex hoc altari, est eius esse participem per fidem, forma loquendi ex lege desumpta: Qui enim sacris operabantur & assidebant altari (vt loquitur Paulus. 1. Cor. cap. 9. vers. 13.) edebant ex sacrificijs quæ offerebantur.

11 *Quorum enim*) Antecedentis ratio sumpta à consuetudine ex legis præscripto seruata, in offerendis sacrificijs expiatorijs, quæ typi erant vnici illius expiatorij sacrificij Christi: in hanc formam: Si Leuitæ & Sacerdotes qui tabernaculo deseruiebant, non habebant jus edendi ex illis animalibus, quorum sanguis inferebatur

rebatur pro peccato in sacrarium per Pontificē (quia eorū corpora tōta comburebantur extra castra) profectō neq; ex Christo jus edendi habent qui tabernaculo deseruiunt. At primum, Ergo secundum. Propositio non est quidem expresse posita, sed pendet ex analogia, quæ est inter typum & rem typo significatā. Quemadmodum enim eorum animalium quæ offerebantur pro peccato, sanguis inferebatur in sacrarium per Pontificem: Ita Christi sanguis illatus est in sacrarium illud cœleste per ipsummet Christum tanquam Pontificem. Deindē quemadmodum eorum animalium corpora comburebantur extra castra: Ita Christus passus est extra portam, vt sequenti versu ostenditur. Vnde sequitur, Quemadmodum qui tabernaculo deseruiabant, non habebant jus edendi ex illis animalibus, ita neque qui retinent ceremonias legis jus habent edendi ex Christo. Assumptio est hoc versu repetita ex lege Moysi, de sacrificijs pro errore summi sacerdotis & Ecclesiæ. Leuit. 4. 11. 12. & anniuersarijs diei expiationum. Leuit. 16. 27. Generalem legem vide Leuit 6. 23.

12 *Quapropter* &) Accommodatio rei significatæ ad typum, quo res in Christo implendæ præfigurabantur, de qua jam proximē diximus. Christus (vt quod in illorum animalium, quæ offerebantur pro peccato, exustione extra castra præfiguratum est impleretur) passus

est extra portam vrbis Hierusalem. *Vt sanctificaret*) Passionem hanc Christi illustrat suo fine. Finis est sanctificatio populi, hoc est, electorum omnium per proprium ipsius sanguinem : Sanctificationis nomine hîc intelligo non regenerationem, quæ propriè & immediate fit per Spiritum Christi, sed gratuitam peccatorum remissionem & imputationem iustitiæ ipsius, quæ propriè est per ipsius sanguinem quo aspersi inculpati & immaculati sistimur Deo Patri.

13 *Exeamus igitur*) Octaua præceptio specialis, ex proximis verbis ; quibus dictum est, Iesum vt sanctificaret populum extra portam passum esse, deducta : Hinc enim sequitur nobis etiam extra castra ad Deum exeundû esse, si sanctificationis per ipsius sanguinem volumus esse participes. Sensus est. Renunciandum nobis esse huic mundo, vt quasi exeamus extra eum, vt Christum sequamur, ferentes ipsius opprobrium. Neque enim Christû sequi possumus, & ipsius crucē ferre, quamdiu corda nostra mundo huic & mundanis affectibus addicta sunt, eoque tum demum eximus ad Christum cum corda nostra & omnes affectus erigimus ad Deum, & à mundo sejungimus, atque interea etiam dum in hoc mundo versamur gerimus nos vt municipales cœlorum. Philipp. 3. 20. quod qui faciunt Christum sequuntur, & crucem ipsius ferunt patientissimè, imò

nè, imò glorianur in afflictionibus. Rom. 5. 3.
 14 *Non enim habemus*) Ratio præceptionis:
 Non habemus in hoc mundo ciuitatem stabi-
 lem & permanentem, sed eam inquirimus fu-
 turam extra hunc mundum in cœlis ubi est
 Christus. Ergo ex eundum nobis est ad eum
 extra castra: eò enim nobis est eundum ubi est
 ciuitas nobis stabilis & firma. Ciuitatem futu-
 ram vocat fixam illam, stabilem, & æternam,
 quam vocauit urbem habentem fundamenta:
 supra II. 10. & cœlestem patriam. Ibidem
 vers. 16.

15 *Per ipsum igitur*) Nona præceptio specia-
 lis ad sacrificium laudis Deo offerendum, ex
 præcedentibus deducta. Cùm enim (vt dictum
 est) passus sit Christus, vt sanctificaret popu-
 lum, per ipsum assiduè offerendum est Deo sa-
 crificium laudis. Per Christum autem docet
 offerendum esse hoc sacrificium, quia nullum
 sacrificium potest Deo gratum & acceptum
 esse, nisi Christo mediante, & intercedente i-
 psius sacrificio, in quo, & nos ipsi & sacrificia
 nostra omnia Deo placent. *Id est fructum*) In-
 terpretatur hoc laudis sacrificium, quod (ab ex-
 terno organo quo vtitur cor in eo proferendo
 & exprimendo) vocat fructum labiorum con-
 fitentium nomini ejus. Videtur autem respice-
 re ad locum illum Oseæ. 14. 3. ubi laudes Deo
 exhibitæ vocantur vituli labiorum.

16 *Beneficentia*) Decima præceptio specia-

lis, qua aliud sacrificij genus commendat sacrificium nimirum beneficentiæ & communicationis facultatum, quas ad fratrum egentium necessitatem leuandam oportet imperitari: Nam hoc sacrificium spectat immediatè ad proximum, vt priùs illud immediatè ad Deum spectabat. *Talibus enim*) Ratio vtriusque præceptionis præcedentis, ab oblectatione Dei, qui nunc non typicis illis sacrificijs in lege præscriptis, sed is demùm veris sacrificijs, tanquam vnice sibi gratis, delectatur. Vocem *εὐαρίστηται* malè reddidit vetus interpres (promeretur) vt locum aliquem meritis nostris inueniret: neque enim his victimis quicquam possumus apud Deum promereri, aut ipsi nobis acquirere, sed *εὐαρίσθηται* dicitur Deus, quatenus hæc officia Deo placeant, ei que grata sunt & accepta. Hanc genuinam esse hujus vocis significationem faciliè animaduertet qui hunc locum contulerit cum Heb.ii.5.6.

17 *Obedite ducibus*) Vndecima præceptio specialis, vt ducibus, hoc est, pastoribus, ductoribus, gubernatoribus, obedientiam & submissionem præstemus. *Vigilant enim*) Præceptionis hujus duas affert rationes, prima est à ducum officio, in quo laborant & præsent gregi: Vigilant pro grege, & non pro ipsorum corporibus, sed pro animabus, vt salutem consequantur; atque eò magis obligamur ad obedi-

obedientiam ipsis præstandam. *Tanquam rationem*) Amplificatio hujus vigilantia pro animabus, ab obligatione qua obstringuntur Deo, utpote obiti hujus officij rationem ei reddituri. *Ut cum gaudio*) Ratio secunda est à fine obedientia ducibus præstita: ut hoc quod ipsis incumbit muneris obeant cum gaudio, non cum gemitu, quem necesse est sequi ex gregis inobedientia. *Idem est*) Probat non esse pastori vigilandum pro animabus cum gemitu, quod hac ratione nihil utilitatis ex ipsius laboribus redundet ad gregem, qui cum debuerit esse pastori materia gaudij, ut Pauli exemplo intelligi potest. 1. Thessal. 2. 19. 20. inobedientia sua gemendi occasionem ei præbet.

18 *Orate pro nobis: confidimus enim nos bonam conscientiam habere, ut qui in omnibus cupiamus honestè conuersari.*

19 *Amplius autem obsecro vos ut id faciatis, ut celerius restituatur vobis.*

Orate pro nobis) Secunda pars capitis, qua commendat Hebræis preces pro se. *Confidimus*) Causas precum quas vult pro se concipi duas affert, prima est à testimonio bonæ conscientia, cujus certum & indubitatum argumentum affert, à studio honestæ conuersationis in tota vita, & rebus omnibus, quod semper sibi adfuisse profiteretur.

19 *Amplius autem*) Secunda causa est, Apo-

stoli liberatio cum ipsorum commodo conjuncta, ut celerius ipsis restituatur ad communem nimirum consolationem percipiendam per tuam fidem, ut loquitur Paulus. Rom. I. 22. Atque hoc nomine eò magis seridè has pro se preces flagitat.

20 *Deus Verò pacis author, qui magnum illum oñium per sanguinem fœderis æterni pastorem, Dominum nostrum Iesum, à mortuis reduxit:*

21 *Perficiat vos in omni opere bono, ad præstandam ipsius voluntatem, efficiens in vobis quod acceptum sit in conspectu suo per Iesum Christum: cui sit gloria in secula seculorum. Amen.*

22 *Precor autem vos, fratres, sufferte sermonem exhortationis: etenim breuibus scripsi vobis.*

23 *Scitote fratrem nostrum Timotheum solutum esse, cum quo (si celerius venerit) visam vos.*

24 *Salutate omnes ductores vestros, & omnes sanctos. Salutant vos Itali.*

25 *Gratia sit cum omnibus vobis. Amen.*

Deus Verò pacis) Precatione primum, deinde hortatione, postremò alijs aliquot sermonibus varijs ac multiplicis argumèti, Epistolam concludit. Precatur Deum ut Hebræos perficiat in omni opere bono. Deum autem quem precatur describit ex duobus effectis. Primum effectum est pax. Pacem intellige illam Dei quæ superat omnem intellectum, quæque præsidio est cordibus ac mentibus nostris per Iesum

sum Christum. Philip. 4. 7. Alterum est excitatio Christi è mortuis, quæ ipsius potentiam ad id efficiendum quod precatur luculentissimè demonstrat. Nā in hoc effecto Deus admirabilem, suam potentiam maximè exeruit: Vnde Ephes. 1. 20. dicitur efficacitatem fortis roboris Dei exertam esse in Christo, cū excitauit eū ex mortuis. *Magnum illum*) Iesum à mortuis reductum vocat, tum magnum illum ouium Pastorem, tum Dominum nostrum. Pastor ouium vocatur, quia oves suas pascit; saluari pabulo verbi, eodémq; verbo veluti sceptro, & Spiritu suo, eas regit ad vitam æternam. Magnus ouium Pastor dicitur ad discrimen aliorum Pastorum omnium quos ipse constituit ministros, vt ei inseruiant in pascendis ouibus, quæ solius sunt Christi. Eodem sensu princeps Pastorum vocatur. 1. Pet. 5. 4. *Per sanguinem*) Ostendit quo iure Christus sit magnus ille ouium Pastor, quia nimirum sanguine suo eas acquisiuit. Act. 20. 28. & animam suam posuit pro ouibus. Ioan. 10. 11. Sanguinem hunc vocat fœderis æterni, quia hoc sanguine sancitum est & obsignatum æternum illud fœdus gratiæ, quod absque sanguine Mediatoris cum homine peccatore & fœdisfrago percuti nunquā potuisset. Nam absque sanguinis effusione non fit remissio Heb. 9. 22.

21 *Perficiat*) Petitio ipsa, qua postulat Hebræ-

Q

is à Deo perfectionē, non quidē in vna re aliqua, sed in omni opere bono. Opus autē bonum definit ex præstatione volūtatis Dei patefactæ nobis in ipsius lege, quæ non solum opus ipsum quoad substantiam, sed & operandi modum, & operis finem præcipit, vt nimirum fiat ex cordis sinceritate, & ad Dei gloriam referatur: his enim conditionibus opus bonum definitur. *Efficiens*) Declarat hanc quam ijs precatur perfectionē, à modo quo fit: perficit nos Deus in omni opere bono, dū ipse illud efficit in nobis: Deus est, inquit Paulus, qui efficit in vobis, & vt velitis, & vt efficiatis, pro gratuita sua beneuolentia. Philip. 2.13. Bonum autem opus hîc rursus definit, quod sit acceptum in conspectu ipsius. *Per Iesum*) Efficientiam hanc Patri tribuit per Iesum Christum tanquam Mediatorem: cuius beneficio omnis gratia abundē in nos confertur à Deo. Nisi malis hæc verba cum proximè præcedentibus coniungere, vt opus quod efficit Deus in nobis dicatur acceptum coram eo per Iesum Christum: Neque enim possunt opera nostra, etiam quæ Deus efficit in nobis, Deo esse grata, aut in eius cōspectum prodire, nisi sacrificij Christi odore perfusa, quo tota ipsorū imperfectio, quam à nobis tanquā instrumentis in quibus operatur Deus attrahunt, integatur *Cui sit gloria*) Preces suas ad Deum pro Hebræis con-

conclūdit glorificatione Dei Patris & Christi, ut enim illis optat perfectionem à Deo, ita Deo optat suam gloriam, & eam quidem æternam. Nam ut à gratia Dei omnia illi profluunt quæ pii precantur, ita in Dei gloriam debent redundare. Ex eo, & per eum, & in ipsum sūt omnia, ipsi sūt gloria in secula. Rom. II. 36. Atque ex hac optationis formula dicimus concludendas esse preces nostras & petitiones omnes, cum glorificatione nominis Dei illius, à quo omnia petimus, ut vel hoc ipso significemus, nos non tam respicere bonum aliquod hominum, quàm Dei in Christo Iesu gloriam, cuius respectu preces pro hominibus fundimus, ijsque bona omnia à Deo exoptamus.

22 *Precor autem*) Hebræos ad quos scribit, hortatur ut sermonem exhortationis sufferant, hoc est, æqui bonique consulant, eique obtemperent. Hanc Epistolam vocat sermonem exhortationis, quia tota ferè occupata est in exhortatione ad retinendam doctrinam quam acceperunt. *Etenim*) Ratio hortationis à scripti breuitate.

23 *Scitote Timotheum*) Narratio brevis, qua certiores eos facit de Timothei solutione è vinculis, cum quo se etiam ipsos inuisurum spondet, si celerius venerit. Hinc facile conspicitur, & Timotheum, paulò ante hanc Epistolam ad Hebræos missam, victum fuisse (de

cuius tamen vinculis nihil alibi scriptum legimus, vt quando in vincula inciderit difficile admodum sit diuinare) & Epistolæ huius auctorem liberum fuisse ac suæ potestatis cum hæc scriberet.

24 *Salutate omnes*) Paucis complectitur salutationes, primùm (vt sic dicam) rogatas, quibus saluari petit, tum omnes ductores ipsorum & Pastores, tum generatim omnes sanctos: deindè (vt sic dicam) missas ab Italicis fratribus.

25 *Gratia sit*) Hebræis valedicens precatur ijs gratiam, quo nomine intelligo, primùm gratuitum Dei fauorem, deindè spirituales in Christo benedictiones, quæ ex gratuito Dei fauore omnes emanant; cuiusmodi sunt remissio peccatorum, iustificatio, sanctificatio, vita denique æterna. Hanc gratiam exoptat omnibus, quia vt sua natura ad omnes pertinet (vt videre est Rom. 5. 15. & deinceps) ita à Pastore non est contrahenda ad certos duntaxat aliquot, sed omnibus & singulis quantum

in ipso est, communicanda &

exoptanda à Deo, cui

in Christo sit o-

mnis gloria.

Amen.

TRACTATUS DE IUSTIFICATIONE.

IUSTIFICATIONIS NOMĒ duobus modis accipitur, physicè (vt sic loquar) & politicè. Physicè acceptū Iustificationis nomē significat inhærentē mutationē hominis è qualitate iustitię inhærentē in qualitātē iustitię inhærentē. Hoc modo intelligi videtur Iustificationis nomen. Apoc. 22. 11. Qui iustus est, iustificetur adhuc: & iustus vocatur ab inhærente iustitia. 1. Ioh. 3. 7. Qui exercet iustitiam iustus est. Sic accepta Iustificatio nihil aliud est quàm sanctificatio, quæ mutatio quædā est inter terminos contrarios inhærentes: sed de hac acceptione satis. Altera Iustificationis acceptio est qua significat pronūciationē iustitię de aliquo, eamq; à iudice è tribunali. Rom. 8. 33. Quis accusabit electos Dei? Deus est qui iustificat. Hæc acceptio cōmunis est, & ijs qui habent iustitiam suam inhærentē, & ijs qui inhærentem non habent & suam propriè, verūm alienam: Nam qui in se iustus est, pronuciari potest à Iudice iustus ex inhærente illa iustitia; Sic iustificantur beati Angeli à Deo, nimirum ex iustitia sua & inhærente, sic iustificatus fuisset homo si stetisset in originali illa iustitia. Similiter iustificari dicitur quis, hoc est, pronuciari iustus, à iustitia quæ in ipso non inhæret, sed quæ aliena est, facta tamen ipsius est aliquo

paſto: Hoc modo debitor aliquis iuſtificatur ex iuſtitia ſpōſoris, qui ipſius nomine creditori debitū exoluit: ſic iuſtificatur homo peccator ex iuſtitia & ſatiffaſtione Chriſti mediatoris.

Vt verbum Iuſtificationis, ita quoque verbum Imputationis commune eſt. Nam & imputari ei Iuſtitia dicitur, qui eſt in ſe & inhærenter iuſtus, & imputari ei iuſtitia dicitur, qui non habet ſuam & inhærentem iuſtitiam, verū alienam: vt Chriſti. Quod autē Iuſtificationis verbum commune ſit etiam ijs qui ſuam & inhærentē habent iuſtitiam ſatis conſpicitur, vel ex hac phraſi Apoſtoli, qua dicit hominē non iuſtificari ex operibus legis, ſed per fidem Ieſu Chriſti. Rom. 3. 28. Gal. 2. 16. Hac enim locutione, non obſcurē innuit iuſtificari, h. e. pronunciarī hominem iuſtum poſſe ex operibus & iuſtitia quadam ſua, ſi modō reipſa eſſent ea opera, non ſecus atque iuſtificari dicitur quis per fidem, h. e. per alienam & Chriſti iuſtitiam. Imputandi quoque verbum intelligitur commune eſſe ex verbis Apoſtoli. Rom. 4. 4. cū dicit, Ei qui operatur merces non imputatur ex gratia, ſed ex debito. Quibus verbis ſignificat iuſtitiam operum, h. e. inhærentem dici poſſe imputari, ſi modō reipſa eſſet ea iuſtitia.

Iuſtificationis hominis qua pronuncietur quis iuſtus ex aliena, hoc eſt, Chriſti iuſtitia, vt de ea in ſpecie dicamus, hoc ordine procedit, primum eſt vocatio efficax in qua Deus offert Chri-

Christum cum iustitia sua , peccator autem oblatum fide apprehendit. In Vocatione enim efficaci applicatio duplex est, prima est Dei offerentis Christum cum iustitia sua , secunda est hominis peccatoris per fidem oblatum Christum apprehendentis sibi que applicantis. Post vocationem efficacem sequitur Iustificatio, qua Deus iustitiam illam Christi fide iam apprehensam in efficaci vocatione peccatori imputat tanquam suam , vel pronunciat eum iustum in illa Christi iustitia, peccator autem imputatam sibi à Deo iustitiam fide recipit. In iustificatione duplex similiter est applicatio, prior est imputatio Dei , posterior est imputata à Deo iustitiæ alienæ per fidem peccatoris apprehensio & applicatio. Differunt hæ duæ applicationes quæ in iustificatione sunt à duabus illis quæ fuerunt in Vocatione efficaci. Nam in Vocatione applicatio Dei appellata est oblatio siue omninò vocatio : In Iustificatione verò applicatio Dei appellatur imputatio. Deinde in Vocatione applicatio hominis iustitiæ oblatae per fidem apprehensio, siue fides in iustitiam oblatam , in Iustificatione verò applicatio hominis vocatur fides in iustitiam imputatam. Ex his observa duplex esse fidei munus , vnum quidem in Vocatione efficaci, dum Christum vnà cum iustitia sua oblatum recipit : Alterum in Iustificatione, dum Christum cum sua iustitia imputatam recipit. No-

tandum autem est, quod cum dicitur hominem per fidem iustificari, intelligenda sit ea fides quæ antecessit in Vocatione efficaci, nempe quæ apprehendit Christum oblatum cum iustitia sua. Quod ad fidem quæ in Iustificatione apprehendit imputatam Christi iustitiam per eam magis propriè seruari dicimur. Ephes. 2. 8. Gratia Dei seruati estis per fidem: Salus enim æterna iustificationem sequitur. Atque hæc paucis de ordine quo ad iustificationem peccatorum proceditur à Deo.

Quæritur, annon cum in efficaci Vocatione apprehendatur per fidem Christi iustitia ab illa iustitia iustificatus iam quis dicitur? Respondéo minimè: Nam Iustificatio est sententiæ pronuntiatio, in vocatione autem nulla est sententiæ pronuntiatio, quare iustificatus dici nequit ex sola vocatione. Atqui cum per fidem ei insit Christi iustitia qui vocatus est, annon ex ea iustitia quæ ipsi inest per fidem denominari saltem iustus potest? Illud equidem non planè negarim re ipsa quodammodò, h. e. per fidem iustum esse, iustū dici & appellari posse non dixerim, cum nondum lata & pronunciata de eo sit Iudicis sententia, sententia videlicet illa quæ ex noua quadam gratia existit, nam non nisi ex Dei gratia est quod iam in efficaci vocatione per fidem iustos, Deus iustos esse pronunciet, & imputet ijs alienam iustitiam tanquam suam.

Iustifi-

Iustificationis causæ sunt quatuor, Efficiens, materialis, formalis, & finalis. Efficiens causa est Deus, Deus is est qui iustificat. Rom. 8. 33. Modi efficiendi quibus dici potest Deus iustificare varij sunt. Primùm dicitur Deus iustificare ex operibus, & inhærente iustitia: sic iustificat beatos Angelos, sic iustificasset hominem si in primæua & originali iustitia stetisset. Hūc iustificationis modum, qui est ex operibus legis sectabantur Iudæi. Rom. 9. 31. 32. Deinde dicitur Deus iustificare ex fide, vel per fidem: Fidei nomine intelligo Christum cum iustitia, siue satisfactione, siue obedientia, siue merito suo fide apprehensum. In hoc igitur modo duo sunt comprehensa. Primùm Christus siue meritū Christi, deinde fides nostra sine qua Christi meritum non applicatur ad nos ad hoc ut efficax sit ad nos iustificandos. Nam de merito Christi ut nonnihil paulò altius repetamus, Causa quidem est omnium benedictionū spiritualiū quas in nos cōfert Deus, verū alio atq; alio modo: nam Christus cum merito suo est causa æternæ Prædestinationis nostri citra fidē nostram, vel præsentem, vel futuram, vel præuisam. Elegit nos in ipso, subaudi Christo. Eph. 1. 4. Rursus Christus cum merito suo causa est Vocationis efficacis quæ fit in tempore, verū citra fidem nostram, cū fides in ipsa demum detur, & altera vocationis pars sit. Tercio Christus cum merito suo causa est Iustifi-

cationis nostri, verum non sine fide qua in efficaci vocatione ipsum cum merito suo apprehendimus: Denique Christus cum merito suo causa est glorificationis nostri, sed cum fide imputatam illam Christi iustitiam apprehendente in Iustificatione. Ex his videmus iustificari hominem per Christi meritum tanquam per modum quo Deus eum iustificat, verum non sine fide meritum illud oblatum in efficaci vocatione apprehendente. Vnde Apost. ad Rom. & Gal. modum hunc, qui compositum quiddam est, unico fidei vocabulo expressit, nonnunquam cum fide Iesum Christum coniungit. Rom. 3. 22. Iustitiam Dei vocat per fidem Iesu Christi. Sic Gal. 2. 16. iustificari nos dicit per fidem Iesu Christi, & Rom. 3. 25. vocat fidem in ipsius sanguine. Postremò inter modos quibus Deus iustificat hominem censetur gratia Dei siue misericordia. Gratia cum fide optimè conuenit, verum inter gratiam & opera summa est dissensio. Rom. 11. 6. Ephes. 2. 8. 9. Consentunt igitur ista, Deus iustificat ex fide, & Deus iustificat ex gratia; Verum quæstio est de ordine, vtra fidesne an gratia prior sit, vtrum fides sit causa gratiæ, an verò gratia sit causa fidei? Respondeo fidem præcedere, gratiam autem subsequi, & fidem, hoc est, Christum cum merito suo fide apprehensum in efficaci vocatione causam esse nouæ illius gratiæ, qua fit vt Deus hominem iustificet. Vt de hoc non nihil

nonnihil paulò altius repetamus. Omnis spiritalis benedictio, vt Prædestinatio, Vocatio, Iustificatio, Glorificatio, ex Dei gratia est: gratia autem Dei ex Christo ipsiusque merito est: verbi gratia: In Prædestinatione hominis ad vitam primùm est Christus cum suo merito, hinc sequitur gratia Dei, tanquam Christi & meriti ipsius effectum, ex gratia Dei deinde sequitur Prædestinatio. In efficaci Vocatione primùm est Christi meritum, deinde est gratia Dei quam sequitur vocatio. Similiter in Iustificatione primùm est meritum Christi quod in efficaci vocatione apprehensum est, deinde est gratia Dei, ex qua rursus sequitur Iustificatio. Sic denique in Glorificatione primùm est meritum Christi, quod quidem imputatum in Iustificatione per fidem apprehensum est, deinde est gratia Dei quam sequitur Glorificatio. Hoc autem in his determinatum est, quod in Prædestinatione & Vocatione meritum Christi solum sine fide nostra causa sit gratiæ: In Iustificatione verò & Glorificatione meritum Christi fide apprehensum causa sit gratiæ. Ex his quæ diximus apparet fidem seu Christum cum merito suo fide apprehensum causam esse gratiæ illius qua Deus hominem iustificat: unde Rom. 3. 24. postquàm dixit, Iustificantur autē gratis, id est, ejus gratia, continuò addidit per redemptionem factā in Iesu Christo, quibus verbis causam illius gratiæ qua iustifican-

tur homines designauit, nempè redemptionem Christi fide apprehensam in efficaci vocatione & Rom. 4. 16. Propterea ex fide est hæreditas, vt sit per gratiam, quibus verbis significat vitam æternam: ideò ex fide esse vt locus sit gratiæ, quæ effectum est fidei iustitiam Christi imputatam apprehendentis in Iustificatione.

Hic si quæras quomodò fieri potest vt meritum Christi, & gratia Dei, siue gratuitus Dei fauor, qui merito contrarius est, vnà consistât? Respondeo meritum Christi, non autem nostrum ipsorum optimè cum gratia Dei consistere. Nam Christi satisfactio qua satisfecit iustitiæ patris, ipsa est quæ promeretur Dei erga nos gratiam: sin loquaris de nostro ipsorum merito, profectò nostrum meritum & gratia Dei vnà consistere non possunt, sed tota natura sua pugnant. De efficiente justificationis causa hæc hætenus.

Materia Iustificationis est homo peccator primùm, vnde dicitur Deus iustificare impiũ. Rom. 4. 5. deinde credens: Iustitia Dei per fidẽ Iesu Christi in omnes & super omnes qui credunt. Rom. 3. 22. Materiæ nomine intelligo subiectum de quo Deus è tribunali suo pronunciat absolutionis sententiam: Sic accepto materiæ vocabulo, Christus dici non potest Iustificationis materia: Iustitię quidem materia siue subiectum vocari potest, Iustificationis non item. Hæc de materia,

Forma

Forma siue causa formalis Iustificationis est iustitia illa Christi, quæ de credente pronuntiatur, & iustificationis motu quasi introducit in credentem: Formalis enim causa motus cuiusque dicitur ea quæ introducit formam. Verum quidem est eandem illam Christi iustitiam esse quoque efficientem & meritoriam Iustificationis causam, sed efficiens est quatenus in vocatione efficaci oblata fide apprehenditur: Forma autem est quatenus in Iustificatione imputata fide apprehenditur. De iustitia Christi tanquam causa formali loquitur Scriptura cum dicit Deum imputare iustitiam absque operibus, Rom. 4. 6. Vocatur iustitia Dei, Rom. 3. 22. & donum iustitiæ. Rom. 5. 17. & iustitia quæ est ex Deo, Philipp. 3. 9. quo loco opponitur iustitia quam nostram vocat, & quam definit iustitiam quæ est ex lege. Iustitia fateor quæ inheret, ut ea quæ fuit primi hominis, & quæ est Angelorum beatorum, iustitia quoque Dei vocari potest, nam ex Deo est, & Dei donum est, verum Deus specialiter eam iustitiam pro sua habet quæ non inheret, sed quam ipse ex gratia imputat peccatori. Haftenus de forma. Sequitur nunc ut de fine dicamus: is geminus est, proximus & ultimus: Proximus quidem est salus nostra, ultimus verò ac præcipuus est Dei gloria in illa iustitia sua imputata. Ad declarandam iustitiam suam præsentì tempore. Rom. 3. 26.

Quemadmodum enim glorificatur Deus in iustitia, ea, quæ ipsi essentialis est, ita glorificatur in iustitia Christi filij sui, quæ ipsa quoque iustitia Dei dicitur.

Iustificationis partes sunt duæ prior est peccatorum remissio, posterior iustitiæ imputatio, vel iustificatio propriè dicta. Sciendum est non esse istos diuerfos & numero differentes quasi motus, verùm vnicum esse quasi motum re ipsa & numero, habere autem hunc vnicum quasi motum diuersas appellationes ratione duorum terminorū, ratione quidem termini à quo vocari peccatorū remissionem, seu absolutionem à peccato, seu non imputationem peccati: Ratione verò termini ad quem vocari Iustificationem seu iustitiæ imputationem: Idem autē re ipsa est & numero motus quo aboletur peccatum, & introducitur iustitia: ratione tamen terminorum distingui potest: Quòd autem vnicus sit numero quasi motus apparet ex Rom. 4.6.7. vbi quod David in Psalmo tuo vocauit remissionem peccatorum, Apostolus eodem sensu vocat imputationem iustitiæ.

Vt igitur de priori Iustificationis parte dicamus, Remissio peccati non est quidem deletio & expunctio peccati è subjecto suo, ita vt iam desinat illud in subjecto inhærere, sed est, qua Deus, cùm in sit peccatum in subjecto, tamen censet nō inesse, non imputat ipsum, sed peccatorem habet pro non peccatore. Dum
censet

censet nullum peccatū inesse simul aufert peccati reatum, quod est meritum pœnæ, & pœnam ipsam siue mortem: Ergo in remissione peccatorum tria sunt quæ simul aufert Deus, primum peccatum ipsum, dum censet illud non inesse, deindè peccati reatum, tertio pœnam; Ablatio duorum istorum posteriorum, h. e. reatus & pœnæ ex ablatione peccati necessario consequitur. Pars autem ista Iustificationis nomen accipit à peccato qui propriè terminus est à quo procedit motus, & de quo primū est absolutionis sententia: Nam sententia est quoque de reatu & pœna, sed secundo loco.

Nunc de posteriori Iustificationis parte dicamus. Iustificatio propriè dicta, seu iustitiæ imputatio non est introductio in subjectum inhærentis alicujus iustitiæ, verū est qua Deus censet eum, qui in se peccator est, iustum esse in aliena, h. e. Christi iustitia per fidem apprehensa, siue qua imputat peccatori Christi iustitiam: Hæc enim proportio est inter remissionem peccati & iustificationem, quòd quemadmodum in remissione peccati non imputat Deus peccatum, quod tamen inest, ita in iustificatione imputat Deus iustitiam quæ non inhæret. Iustitiam imputatam sequitur meritum vitæ pariter & vita ipsa: Nam quemadmodum sententia remissionis peccati est de tribus, de peccato, de reatu, & pœnæ merito, ac pœna ipsa, ita sententia iustificationis est de tri-

bus, de iustitia siue satisfactione Christi, de merito illius iustitiæ siue satisfactionis, (nam vitæ æternæ meritoria est) denique de ipsa vita. Licet de his omnibus sit Iustificationis sententia, tamen nomen suum sortitur à iustitia Christi, quam reliqua duo necessariò consequuntur.

Executio sententiæ hujus Dei in nobis iustificandis tum fit cū per Spiritum suum sanctum nos regenerat, h. e. vitam illam nouam in nobis creat, ad quam jam prius nos justificationis sententia adjudicauit: Ergo executio sententiæ justificationis propriè respicit vitam illam spirituales & æternam, de qua postremo loco diximus justificationis esse sententiam: Sed de hoc in doctrina regenerationis fusiùs.

His ita expositis hanc Iustificationis plenā ac realem, vt vocant, definitionem colligimus, vt sit Iustificatio sententia Dei iudicis è tribunali suo pronunciata, qua homini peccatori & credenti ex fide Christi & gratia sua remittit peccata & imputat iustitiam suam, ad vitam ipsius hominis æternam, & ad gloriam gratiæ siue iustitiæ suæ quam gratis imputat. In hac definitione habes primū ipsā nominis definitionē, habes deinde quatuor Iustificationis causas, habes denique duas Iustificationis partes.

Quæritur hoc loco, an Iustificatio perficiatur in hac vita? Respondeo hoc sumpto initio, duo sunt genera beneficiorum Dei in Christo, vnum eorum quæ non inhærent, cuiusmodi
sunt

sunt Prædestinatio ab æterno. Iustificatio, Adoptio: Alterũ eorum quæ inhærent, vt Vocatio & Glorificatio: Hoc commune habent duo hæc beneficiorũ genera, quòd non antè manifestationẽ Christi plena perfectaque sit futura eorum manifestatio & patefactio, non Prædestinationis, non Iustificationis, nõ Adoptionis, nõ Vocationis, nõ Glorificationis. Cœpit quidem eorũ in prima Christi manifestatione patefactio, vnde Apost. Rom. 3. 21. Nũc autẽ patefacta est iustitia Dei, &c: verũm nõdum plena est eorũ patefactio, vnde 1. Ioh. 3. 2. Filij Dei iã sumus, sed nondũ apparet quod erimus. In hoc autẽ differunt duo hæc beneficiorũ genera, quod ea quæ diximus non inhærentia perficiãtur & absoluantur re ipsa in hac vita: filij Dei, inquit, nunc sumus: sic iã prædestinati sumus: sic iã iustificati sumus: Ea verò quæ inhærentia esse diximus nõ perficiantur suis omnib. gradibus, licet in hac vita inchoetur. Ex his conspicitur Iustificationem quidẽ in hac præseti vita perfici atq; absolui re ipsa, non autẽ plenè manifestari. Quæstio est annò in die illo iudicij iustificaturus sit Christ' eos qui in hac vita crediderũt? quòd si ita sit annò in altera demũ vita perficiẽda est Iustificatio? Respondeo in die illo iudicij Christus non tã iustificaturus est credentes, quã declaraturus est ex operib. eorũ eos in hac vita credidisse & iustificatos fuisse: sic enim iustificandi ver-

bum nonnunquam accipitur, ut sit iustificare declarare iustificatum: sic dixit Iacobus hoc sensu hominem iustificari ex operibus.

Quæritur rursus annon petimus quotidie à Deo remissionem peccatorum, h.e. iustificationem? quod si ita sit, an dicemus Iustificationem simul & semel totam perfici in hac vita? Respondedo dum precamur remissionem peccatorum non precamur ipsum beneficium quasi nondum datum, sed precamur incrementum fiducia nostræ & applicationis beneficij quæ fit per fidem & fidei incrementum.

Quæritur postremò, annon Iustificatio sententia est de vita, vita autem non perficitur nisi in Christi aduentu: Ergo Iustificatio non perficitur nisi in Christi demùm aduentu? Respondedo aliud est perfici sententiam de vita, aliud perfici vitam ipsam: sententia quidem de vita perficitur in hac vita: at vita ipsa non perficitur nisi in ipso Christi aduentu. Quamobrem argumentatio hæc fallax est & capiosa.

Cum Iustificationis doctrina coniungo doctrinam Adoptionis, de qua principio paulò altius repetito sic erit dicendum: Beneficia Dei quæ in Christo conferuntur in tempore sunt Vocatio efficax, Iustificatio, sub qua comprehenditur adoptio, denique Regeneratio siue Glorificatio. Vnumquodque ex his beneficijs constat applicatione Christi & gratiæ ipsius,

ipſius, vel in vnoquoque ex his eſt Chriſti cum gratia ſua quædam applicatio: Applicatio Chriſti duplex eſt, prima qua ipſe Deus nobis eum applicat, ſecunda eſt qua nos applicatum nobis à Deo Chriſtum ipſi deinde nobis applicamus: Ergo prima applicatio eſt Dei, ſecunda noſtra: Applicatio noſtra in genere vocatur fides Chriſti. Cum Dei applicatione ſemper coniunctus eſt Spiritus ſanctus, per quem ipſe operatur in nobis applicationem noſtram, vel applicationis noſtræ instrumentum, h. e. fidem.

Hæc quæ in genere dicimus primùm de applicatione Dei, deindè noſtra, apertiora euadent ſi viderimus quæ ſit vtraque applicatio ſeorſim in ſingulis Dei beneficijs. Primùm itaque in Vocatione efficaci eſt applicatio Dei qua Chriſtum cum vniuerſa gratia ſua nobis offert in verbo ſuo, cuius quidem verbi comes eſt Spiritus ſanctus. Applicatio autem noſtra eſt qua fide per verbum & Spiritum ſanctum in cordibus noſtris accenſa Chriſtum cum vniuerſa gratia ſua oblatum apprehendimus.

Deinde in Iuſtificatione applicatio Dei eſt qua Chriſtum illum in efficaci vocatione iam applicatum cum gratia ſua vniuerſa propius ad nos admouet & applicat, imputando nobis ipſum ipſiusque ſpecialem quandam gratiam, nempe iuſtitiam: Cùm hac Dei imputatione coniunctus eſt Spiritus ſanctus: noſtra

autem applicatio in Iustificatione est qua nos Christum cum ipsius iustitia à Deo imputatum per fidem accensam in cordibus nostris beneficio Spiritus illius Dei apprehendimus. Iustificationi succedit Adoptio. In Adoptione (vt de ea nunc dicamus) applicatio Dei est qua adhuc ad nos propius admouet & applicat Christum tanquam fratrem nostrum, censendo nos primogeniti sui fratres, ac proinde filios suos in eo. Vt enim in Iustificatione applicauit Deus nobis Christum tanquam iustum, ita in Adoptione applicat nobis Christum tanquam fratrem primogenitum, qui vlterior quidam est & arctior applicationis & conjunctionis gradus: Cum hac quoque applicatione Dei conjunctus est Spiritus sanctus. In Adoptione applicatio nostra est qua per fidē beneficio Spiritus sancti accensam applicamus nobis Christum tanquam fratrem primogenitum, siue (vt sic dicam) filiationem in Christo, quam Deus nobis imputauit. Denique in Regeneratione (vt de ea nonnihil etiam nunc dicamus) primū est applicatio Dei, qua etiamnum Christum ad nos propius admouet, eumque nobiscum coniungit tanquam caput cum corpore: Cum hac quoque applicatione Dei conjunctus est Spiritus sanctus. In hac applicatione coniungit Deus nobiscum Christum primū mortuum ad mortificationem carnis: deinde ex mortuis suscitatum ad viuificationem spiritus. In

Regene-


Regeneratione deinde applicatio nostra est, qua nos conjunctum nobiscum Christum in morte & in vita sua fide per Spiritum sanctum excitata apprehendimus: Atque in hac applicatione primum Dei, deinde nostra, qua fit ut Christus nobiscum jungatur tanquam caput cum corpore, cernitur nostri Regeneratio: vna enim eademque opera, & conjungitur Christus nobiscum tanquam caput, & nos regeneramur siue renouamur: Sed de Regeneratione suo loco erit dicendum. Ex his autem quæ diximus videmus quæ sit Adoptionis natura, in qua explicanda non est opus ut diutius immoremur.

Hoc postremo ad superiora adijcimus, Spiritum illum qui datur à Deo dum nobis applicat singula beneficia, nomen sortiri à singulis, cum tamen vnus idemque sit Dei Spiritus: Qui enim in Vocatione datur Spiritus, Spiritus vocationis appellatur: Qui in Iustificatione Spiritus justificationis, qui in Adoptione Spiritus adoptionis, qui denique in Regeneratione, Spiritus regenerationis.


FINIS.

111.
111.


My Lord
Grange
















17
663

r

